

宋史

冊
番



宋史卷二百九十九

書 右丞相總裁脫脫一等修

列傳第五十八

孫祖德 孫祖德 張若谷

石揚休 祖士衡 李垂 張洞

李仕衡 李溥 胡則 薛顏

許元 鍾離瑾 孫冲 崔嶧

田瑜 施昌言

狄棐字輔之潭州長沙人少隨父官徐州以文謁路振振器愛之妻以女舉進

士甲科以大理評事知分宜縣歷開封府司錄知壁州道長安為寇準所厚準

復入相乃薦通判益州擢開封府判官歷京西益州路轉運江淮制置發運使

累遷太常少卿知廣州加直昭文館代還不以南海物自隨人稱其廉拜右諫

議大夫龍圖閣直學士權判吏部流內銓出知滑州進給事中徙天雄軍會給

郊賞帛不善士卒譁譟趣府門棐不能治事聞命侍御史劉夔按視未及境衆不自安棐馳白夔請給以行河事夔至與轉運使李絳誅首惡數人棐坐罷懦降知隨州徙同州勾當三班院進樞密直學士歷知陝鄭州河中河南府復判流內銓出知揚州未行卒有狄國賓者仁傑之後分仁傑告身與棐棐奏錄國賓一官而自稱仁傑十四世孫棐在河中時有中貴人過郡言將援棐於上前棐荅以他語退謂所親曰吾湘潭一寒士今官侍從可以老而自污耶其爲政愷悌不爲表暴死之日家無餘貲子遵度字元規少穎悟篤志於學每讀書意有所得卽仰屋瞪視人呼之弗聞也少舉進士一斤於有司恥不復爲以父任爲襄縣主簿居數月棄去好爲古文著春秋雜說多所發明嘗患時學靡敝作擬皇太子冊文除侍御史制裴晉公傳人多稱之尤嗜杜甫詩嘗讚其集一夕夢見甫爲誦世所未見詩及覺纔記十餘字遵度足成之爲佳城篇後數月卒有集十二卷

郎簡字叔廉杭州臨安人幼孤貧借書錄之多至成誦進士及第補試祕書省

校書郎知寧國縣徙福清令縣有石塘陂歲久湮塞募民浚築溉廢田百餘頃邑人爲立生祠調隨州推官及引對真宗曰簡歷官無過而無一人薦是必恬於進者特改祕書省著作佐郎知分宜縣徙知寶州縣吏死子幼贅壻爲券冒有其貲及子長屢訴不得直乃訟于朝下簡劾治簡示以舊牘曰此爾翁書耶曰然又取僞券示之弗類也始伏罪徙藤州興學養士一變其俗藤自是始有舉進士者通判海州提點利州路刑獄官罷知泉州累遷尙書度支員外郎廣南東路轉運使擢祕書少監知廣州捕斬賊馮佐臣入判大理寺出知越州復歸判尙書刑部出知江寧府歷右諫議大夫給事中知揚州徙明州以尙書工部侍郎致仕祀明堂遷刑部卒年八十有九特贈吏部侍郎簡性和易喜賓客卽錢塘城北治園廬自號武林居士道引服餌晚歲顏如丹尤好醫術人有疾多自處方以療之有集驗方數十行于世一日謂其子絜曰吾退居十五年未嘗小不憚今意倦豈不逝歟就寢而絕幼從學四明朱頔長學文於沈天錫旣仕均奉資之後二人亡又訪其子孫爲主婚嫁平居宴語惟以宣上德救民

患爲意孫沔知杭州榜其里門曰德壽坊然在廣州無廉稱蓋爲絜所累絜終
尙書都官員外郎

孫祖德字延仲維州北海人父航監察御史淮南轉運祖德進士及第調濠州
推官校勘館閣書籍時校勘官不爲常職滿歲而去改大理寺丞知榆次縣上
書言刑法重輕以尙書屯田員外郎通判西京留守司方冬苦寒詔罷內外工
作而錢惟演督脩天津橋格詔不下祖德曰詔書可稽留耶卒白罷役入爲殿
中侍御史遷侍御史章獻太后春秋高疾加劇祖德請還政已而疾少間祖德
大恐及太后崩諸嘗言還政者多進用遂擢尙書兵部員外郎兼起居舍人知
諫院言郭皇后不當廢獲罪以贖論久之遷天章閣待制時三司判官許申因
宦官閻文應獻計以藥化鐵成銅可鑄錢裨國用祖德言僞銅法所禁而官自
爲是教民欺也固爭之出知兗徐蔡州永興軍徙鳳翔府請置鄉兵改龍圖閣
直學士知梓州累遷右諫議大夫知河中府歷陳許蔡潞鄆亳州應天府以疾
得潁州除吏部侍郎致仕卒有論事七卷祖德少清約及致仕娶富人妻以規

有其財已而妻悍反資以財而出之子珪江東轉運使

張若谷字德繇南劍沙縣人進士及第爲巴州軍事推官會蜀寇掠隣郡若谷攝州事率衆爲守禦備賊乃引去調全州軍事推官入見真宗識其名顧曰是嘗在巴州禦賊者耶特改大理寺丞知濛陽縣三司言廣寧監歲鑄緡錢四十萬其主監宜擇人乃以命若谷歲餘所鑄贏三十萬緡擢知處州歷江湖淮南益州路轉運江淮制置發運使入爲三司度支鹽鐵副使累遷右諫議大夫知并州先是麟府歲以繒錦市蕃部馬前守輒罷之若谷以爲互市所以利戎落而通邊情且中國得戰馬亟罷之則猜阻不安奏復市如故而馬入歲增提舉諸司庫務權判大理寺進樞密直學士歷知澶州成德軍揚州江寧府入知審官院糾察在京刑獄知通進銀臺司應天府改龍圖閣學士徙杭州會歲饑斥餘廩爲糜粥賑救之權判吏部流內銓知洪州累官至尙書左丞致仕若谷素爲宰相張士遜引拔然所至亦自有循良跡不激訐取名云

石揚休字昌言其先江都人唐兵部郎中仲覽之後後徙京兆七代祖藏用右

羽林大將軍明於曆數嘗召家人謂曰天下將有變而蜀爲最安處乃去依其親眉州刺史李瀉遂爲眉州人揚休少孤力學進士高第爲同州觀察推官遷著作佐郎知中牟縣縣當國西門衣冠往來之衝也地瘠民貧賦役煩重富人隸太常爲樂工僥倖免役者凡六十餘家揚休請悉罷之改祕書丞爲祕閣校理開封府推官累遷尙書祠部員外郎歷三司度支鹽鐵判官坐前在開封嘗失盜出知宿州頃之召入爲度支判官脩起居注初記注官與講讀諸儒皆得侍坐邇英閣揚休奏史官記言動當立以待從其言判鹽鐵勾院以刑部員外郎知制誥同判太常寺初內出香祠温成廟帝誤書名稱臣揚休言此奉宗廟禮有司承誤不以聞帝嘉之兼勾當三班院爲宗正寺脩玉牒官遷工部郎中未及謝卒揚休喜閑放平居養猿鶴玩圖書吟詠自適與家人言未嘗及朝廷事及卒發楮中所得上封事十餘章其大略請增諫官以廣言路置五經博士使學者專其業出御史按察諸道以防壅蔽復齒冑之禮以強宗室擇守令重農桑禁奢侈皆有補於時者然揚休爲人慎默世未常以能言待之也至於誥

命尤非所長平生好殖財因使契丹道感寒毒得風痺謁告歸鄉別墳墓揚休
初在鄉時衣食不足徒步去家十八年後以從官還鄉里疇昔同貧窶之人尙
在皆曰昌言來必賙我矣揚休卒不揮一金反遍受里中富人金以去

祖士衡字平叔蔡州上蔡人少孤博學有文爲李宗諤所知妻以兄子楊億謂
劉筠曰祖士衡辭學日新後生可畏也舉進士甲科授大理評事通判蘄州再
遷殿中丞直集賢院改右正言戶部判官未幾提舉在京諸司庫務遷起居舍
人注釋御集檢閱官遂知制誥爲史館脩撰糾察在京刑獄同知通進銀臺司
天聖初以附丁謂落職知吉州言者又以在郡不脩飭復降監江州稅士衡兒
時過外家有僧善相見之語人曰是兒神骨秀異他日有名于時若年過四十
當位極人臣年三十九卒于官

李垂字舜工聊城人咸平中登進士第上兵制將制書自湖州錄事參軍召爲
崇文校勘累遷著作郎館閣校理上導河形勝書三卷欲復九河故道時論重
之又累脩起居注丁謂執政垂未嘗往謁或問其故垂曰謂爲宰相不以公道

副天下望而恃權怙勢觀其所爲必遊朱崖吾不欲在其黨中謂聞而惡之罷知亳州遷潁晉絳三州明道中還朝閣門祇候李康伯謂曰舜工文學議論稱於天下諸公欲用爲知制誥但宰相以舜工未嘗相識盍一往見之垂曰我若昔謁丁崖州則乾興初已爲翰林學士矣今已老大見大臣不公常欲面折之焉能趨炎附熱看人眉睫以冀推輓乎道之不行命也執政知之出知均州卒年六十九五子仲昌最知名銳於進取嘗獻計脩六塔河無功自殿中丞責英州文學參軍

張洞字仲通開封祥符人父惟簡太常少卿洞爲人長大眉目如畫自幼開悟卓犖不羣惟簡異之抱以訪里之卜者曰郎君生甚奇必在策名後當以文學政事顯旣誦書日數千言爲文甚敏未冠曄然有聲遇事慷慨自許以有爲時趙元昊叛擾邊關隴蕭然困於飛輓且屢喪師仁宗太息思聞中外之謀洞以布衣求上方略召試舍人院擢試將作監主簿尋舉進士中第調漣水軍判官遭親喪去再調潁州推官民劉甲者強弟柳使鞭其婦旣而投杖夫婦相持而

泣甲怒逼柳使再鞭之婦以無罪死吏當夫極法知州歐陽脩欲從之洞曰律以教令者爲首夫爲從且非其意不當死衆不聽洞卽稱疾不出不得已讞於朝果如洞言脩甚重之晏殊知永興軍奏管勾機宜文字殊儒臣喜客游其門者皆名士尤深敬洞改大理丞知鞏縣會殊留守西京復奏知司錄殊晚節驟用刑幕府無敢言洞平居與殊賦詩飲酒傾倒無不至當事有官責持議甚堅殊爲沮止洞亦自以不負其知樞密副使高若訥參知政事吳育薦其文學宜爲館職召試學士院充祕閣校理判祠部時天下戶口日蕃民去爲僧者衆洞奏至和元年敕增歲度僧舊敕諸路三百人度一人後率百人度一人又文武官內臣墳墓得置寺撥放近歲滋廣若以勳勞宜假之者當依古給戶守冢禁毋樵採而已今祠部帳至三十餘萬僧失不裁損後不勝其弊朝廷用其言始三分減一知太常禮院宰相陳執中將葬洞與同列謚爲榮靈其孫訴之詔孫抃等復議改曰恭洞駁奏執中位宰相無功德而罪戾多生不能正法以黜之死猶當正名以誅之竟從抃等議初皇后郭氏忤旨得罪廢沒後仁宗悔之詔

追復其號二十餘年矣至是有司請祔於廟知制誥劉敞以謂春秋書禘于太廟用致夫人致者不宜致也且古者不二嫡當許其號不許其禮洞奏后嘗母天下無大過惡中外所知陛下既察其偶失恭順洗之於既沒猶曰不許其禮於義無當且廢后立后何嫌於嫡此當時大臣護已然之失乖正名之典而敞復引春秋用致夫人按左氏哀姜之惡所不忍道而二傳有非嫡之辭敞議非是若從變禮尙當別立廟不行轉太常博士判登聞鼓院仁宗方嚮儒術洞在館閣久數有建明仁宗以爲知經會覆攷進士崇政殿因賜飛白善經字寵之洞獻詩謝復賜詔獎諭出知棣州轉尙書祠部員外郎河北地當六塔之衝者歲決溢病民田水退強者遂冒占弱者耕居無所洞奏一切官爲標給蠲其租以綏新集河北東路民富蠶桑契丹謂之綾絹州朝廷以爲內地不慮洞奏今滄景契丹可入之道兵守多缺契丹時以販鹽爲名舟往來境上此不可不察願度形勢置帥增屯戍以控扼之時天下久安薦紳崇尚虛名以寬厚沉默爲德於事無所補洞以謂非朝廷福又謂諫官持諫以震人主不數年至顯仕此

何爲者當重其任而緩其遷使端良之士不亟易而浮躁者絕意致書歐陽脩極論之召權開封府推官英宗卽位轉度支員外郎英宗哀疚或經旬不御正殿洞上言陛下春秋鼎盛初嗣大統豈宜久屈剛健自比冲幼之主當躬萬機攬羣材以稱先帝付畀之意厭元元之望大臣亦以爲言遂聽政命考試開封進士旣罷進賦題曰孝慈則忠時方議濮安懿王稱皇事英宗曰張洞意諷朕宰相韓琦進曰言之者無罪聞之者足以戒英宗意解詔訊祁國公宗說獄宗說恃近屬貴驕不道獄具英宗以爲辱國不欲暴其惡洞曰宗說罪在不宥雖然陛下將懲惡而難暴之獨以其阬不辜數人置諸法可矣英宗喜曰卿知大體洞因言唐宗室多賢宰相名士蓋其知學問使然國家本支蕃衍無親疎一切厚廩之不使知辛苦婢妾聲伎無多寡之限至滅禮義極嗜欲貸之則亂公共之法刑之則傷骨肉之愛宜因秩品立制度更選老成教授之宗室緣是怨洞痛詆訾言上亦起藩邸賴察之不罪也轉司封員外郎權三司度支判官對便殿稱旨英宗遂欲進用大臣忌之出爲江西轉運使江西游饑徵民積歲賦

洞爲奏免之又民輸油絹不中度者舊責以滿匹洞命計尺寸輸錢民便之移淮南轉運使轉工部郎中淮南地不宜麥民艱於所輸洞復命輸錢官爲糴麥不踰時而足洞在棣時夢人稱敕召者旣出如拜官然顧視旌旗吏卒羅于庭至是夢之如初自以年不能永教諸子部分家事未幾卒年四十九

李仕衡字天均秦州成紀人後家京兆府進士及第調鄂縣主簿田重進守京兆命仕衡鞫死囚五人活者四人重進卽其家謂曰子有陰施此門當高大之徙知彭山縣就加大理評事遷光祿寺丞父益以不法誅仕衡亦坐除名後會赦寇準薦其材盡復其官領渭橋輦運通判邠州再遷祕書丞徙知劍州王均反仕衡度州兵不足守卽棄城焚芻粟輦金帛東守劍門旣而賊陷漢州攻劍州州空無所資卽趨劍門仕衡預招賊衆得千餘人待之不疑賊將至與鈐轄裴臻迎擊之斬首數千級乃乘驛入奏擢尙書度支員外郎賜服緋魚已而使者言仕衡嘗棄城降監虔州稅召還判三司鹽鐵勾院度支使梁鼎言商人入粟于邊率高其直而售以解鹽商利益博國用日耗請調丁夫轉粟而輦鹽諸

州官自鬻之歲可得緡錢三十萬仕衡曰安邊無大於息民今不得已而調斂之又增以轉粟輓鹽之役欲其不困何可得哉不聽遂行鼎議而關中大擾乃罷鼎度支使以仕衡爲荆湖北路轉運使徙陝西初歲出內帑緡錢三十萬助陝西軍費仕衡言歲計可自辦遂罷給真宗謁陵寢四幸洛仕衡獻粟五十萬斛又以三十萬斛餽京西朝廷以爲材召爲度支副使上言關右旣弛鹽禁而永興同華耀四州猶率賣鹽年額錢請減十之四詔悉除之累遷司封郎中爲河北轉運使又奏罷內帑所助緡錢百萬建言河北歲給諸軍帛七十萬而民艱於得錢悉預假於里豪出倍償之息以是工機之利愈薄方春民不足請戶給錢至夏輸帛則民獲利而官用足矣詔優其直仍推其法于天下封泰山獻錢帛芻糧各十萬見于行宮遷右諫議大夫祀汾陰又助錢帛三十萬乃命同林特提舉西京陝西轉運事權知永興軍進給事中踰月以樞密院直學士知益州頃之河北闕軍儲議者以爲仕衡前過助封祀費真宗聞之以爲河北都轉運使駕如亳州又貢絲綿縑帛各二十萬後集粟塞下至鉅萬斛或言粟腐

不可食朝廷遣使取視之而粟不腐也棣州污下苦水患仕衡奏徙州西北七十里既而大水沒故城丈餘南郊復進錢帛八十萬先是每有大禮仕衡必以所部供軍物爲貢言者以爲不實仕衡乃條析進六十萬皆上供者二十萬卽其羨餘帝不之罪謂王旦曰仕衡應猝有材人欲以此中之然朝廷所須隨大小卽辦亦其所長也明年旱蝗發積粟賑民又移五萬斛濟京西遷尙書工部侍郎權知天雄軍民有盜瓜傷主者法當死仕衡以歲饑奏貸之盜起淄青間遷刑部侍郎知青州前守捕羣盜妻子寘棘園中仕衡至悉縱罷之使去未幾其徒有梟賊首至者入爲三司使帝作寬財利論以賜之乃更陝西入粟法使民得受錢與茶舊市羊及木責吏送京師而羊多道死木至湍險處往往漂失吏至破產不能償仕衡乃許吏私附羊免其算使得補死者聽民自採木輸官用入粟法償其直遷吏部侍郎仁宗卽位拜尙書左丞以足疾改同州觀察使知陳州州大水築大隄以障水患徙潁州復知陳州曹利用仕衡壻也利用被罪降仕衡左龍武軍大將軍分司西京歲餘改左衛大將軍卒其後諸子訴其

父有勞於國非意左遷詔追復同州觀察使仕衡前後管計事二十年雖才智過人然素貪家貲至累鉅萬建大第長安里中嚴若官府子丕緒蔭補將作監主簿及仕衡歸老丕緒時爲尙書虞部員外郎請解官就養朝廷以爲郎故事不許請削一官乃聽未幾還之居十餘年仕衡死服除久之不出大臣爲言起簽書永興軍節度判官事歷通判永興軍同州知解州興元府華州累遷司農卿致仕卒丕緒居官廉靜不爲矯激家多圖書集歷代石刻爲數百卷藏之

李溥河南人初爲三司小吏陰狡多智數時天下新定太宗厲精政事嘗論及財賦欲有所更革引三司吏二十七人對便殿問以職事溥詢其目請退而條上命至中書列七十一事以聞四十四事卽日行之餘下三司議可否於是帝以溥等爲能語輔臣曰朕嘗諭陳恕等如溥輩雖無學至於金穀利害必能究知本末宜假以色辭誘令開陳而恕等強愎自用莫肯詢問呂端對曰耕當問奴織當問婢寇準曰孔子入太廟每事問蓋以貴下賤先有司之義也帝以爲然悉擢溥等以官賜錢幣有差溥爲左侍禁提點三司孔目官請著內外百官

諸軍奉祿爲定式加閣門祇候催運陝西糧草赴清遠軍還提舉在京倉草場勾當北作坊齊州大水壞民廬舍欲徙州城未決命溥往視遂徙城而還又與李仕衡使陝西增酒權緡錢歲二十五萬三遷崇儀使景德中茶法旣弊命與林特劉承珪更定法募人入金帛京師入芻粟塞下與東南茶皆倍其數卽以溥制置江淮等路茶鹽礬稅兼發運事使推行之歲課緡錢果增其舊特等皆受賞溥時已爲發運副使遷爲使仍改西京作坊使然茶法行之數年課復損於舊江淮歲運米輸京師舊止五百餘萬斛至溥乃增至六百萬而諸路猶有餘畜高郵軍新開湖水散漫多風濤溥令漕舟東下者還過泗州因載石輪湖中積爲長隄自是舟行無患累遷北作坊使時營建玉清昭應宮溥與丁謂相表裏盡括東南巧匠遣詣京且多致奇木怪石以傳會帝意建安軍鑄玉皇聖祖溥典其事丁謂言溥蔬食者周歲而溥亦數奏祥應遂以爲迎奉聖像都監領順州刺史遷獎州團練使溥自言江淮歲入茶視舊額增五百七十餘萬斤并言漕舟舊以使臣若軍大將人掌一綱多侵盜自溥併三綱爲一以三人共

主之使更相司察大中祥符九年初運米一百二十五萬石纔失二百石會溥當代詔留再任特遷宮苑使初譙縣尉陳齊論權茶法溥薦齊任京官御史中丞王嗣宗方判吏部銓言齊豪民子不可用真宗以問執政馮拯對曰若用有材豈限貧富帝曰卿言是也因稱溥畏慎小心言事未嘗不中利害以故任之益不疑然溥久專利權內倚丁謂所言輒聽帝嘗語執政曰羣臣上書論事法官輒沮之云非有大益無改舊章然則何以廣言路王旦對曰法制數更則詔令牴牾故重於變易因言溥嘗請盜販茶鹽者贓仗皆沒官已可之矣帝曰此特畏溥之強不敢退卻自今雖小吏言亦宜詳究行之溥既專且貪繇是寢爲不法發運使黃震條其罪狀以聞罷知潭州命御史鞠治得溥私役兵爲姻家林特起第附官舟販竹木奸贓十數事未論決會赦貶忠武軍節度副使仁宗卽位起知淮陽軍歷光黃二州復以贓貶蔡州團練副使久之監徐州利國監以千牛衛將軍致仕卒

胡則字子正婺州永康人果敢有材氣以進士起家補許田縣尉再調憲州錄

事參軍時靈夏用兵轉運使索湘命則部送芻糧爲一月計則曰爲百日備尙恐不支奈何爲一月邪湘懼無以給遣則遂入奏太宗因問以邊策對稱旨顧左右曰州縣豈乏人命記姓名中書後李繼隆討賊久不解湘語則曰微子幾敗我事一日繼隆移文轉運司曰兵且深入糧有繼乎則告湘曰彼師老將歸欲以糧乏爲辭耳姑以有餘報之已而果爲則所料湘爲河北轉運使奏改祕書省著作佐郎簽書貝州觀察判官事後以太常博士提舉兩浙權茶就知睦州徙温州歲餘提舉江南路銀銅場鑄錢監得吏所匿銅數萬斤吏懼且死則曰馬伏波哀重囚而縱之吾豈重貨而輕數人之生乎籍爲羨餘不之罪改江淮制置發運使累遷尙書戶部員外郎真宗幸亳還擢三司度支副使初丁謂舉進士客許田則厚遇之謂貴顯故則驟進用至是謂罷政事出則爲京西轉運使遷禮部郎中部內民訛言相驚至遣使安撫乃定坐是徙廣西路轉運使有番船遭風至瓊州且告食乏不能去則命貸錢三百萬吏白夷人狡詐又風波不可期則曰彼以急難投我可拒而不與邪已而償所貸如期又按宣州重

辟十九人爲辨活者九人復爲發運使累遷太常少卿乾寧初坐丁謂黨降知信州徙福州以右諫議大夫知杭州入權吏部流內銓坐失舉復爲太常少卿知池州未行復諫議大夫知永興軍徙河北都轉運使以給事中權三司使通京東西陝西鹽法人便之初則在河北殿中侍御史王沿嘗就則假官舟販鹽又以其子爲名祈買酒場至是張宗誨擿發之按驗得實出則知陳州踰月授工部侍郎集賢院學士劉隨上疏言則奸邪貪濫聞天下比命知池州不肯行今以罪去驟加美職何以風勸在位後徙杭州再遷兵部侍郎致仕卒則無廉名喜交結尙風義丁謂貶崖州賓客隨散落獨則間遣人至海上饋問如平日在福州時前守陳絳嘗延蜀人龍昌期爲衆人講易得錢十萬絳旣坐罪遂自成都械昌期至則破械館以賓禮出俸錢爲償之昌期者嘗註易詩書論語孝經陰符經老子其說詭誕穿鑿至詆斥周公初用薦者補國子四門助教文彥博守成都召置府學奏改祕書省校書郎後以殿中丞致仕著書百餘卷嘉祐中詔取其書昌期時年八十餘野服自詣京師賜緋魚絹百匹歐陽脩言其異

端害道不當推獎奪所賜服罷歸卒

薛顏字彥回河中萬泉人舉三禮中第爲嘉州司戶參軍代還引見太宗顧問之對稱旨改將作監丞監華州酒稅以祕書省著作佐郎使夔峽疏決刑獄還改太子左贊善大夫知雲安軍徙渝閬二州擢三司鹽鐵判官河北計置糧草初丁謂招撫溪蠻有威惠部人愛之留五年詔謂自舉代謂薦顏爲峽路轉運使累遷尙書虞部員外郎始孟氏據蜀徙夔州于東山據峽以拒王師而民居不便也顏爲復其故城宜州陳進反命勾當廣南東西路轉運司事賊平遷金部員外郎改河東轉運使祀汾陰徙陝西河中浮橋歲爲水所敗顏卽北岸釀上流爲支渠以殺水怒因取渠水溉其旁田民頗利之坊州募人鍊礬歲久課益重至有破產被繫不能償者顏奏罷坊礬則晉礬當大售後如其策徙河北歷知河陽杭徐州累遷光祿少卿以少府監知江寧府邏者晝劫人反執平人以告顏視其色動曰若真盜也械之果引伏轉右諫議大夫知河南府仁宗卽位遷給事中丁謂分司西京以顏雅與善徙知應天府又徙耀州部有豪姓李

甲結客數十人號沒命社少不如意則推一人以死鬪之積數年爲鄉人患莫敢發顏至大索其黨會赦當免特杖甲流海上餘悉籍于軍以光祿卿分司西京卒于家嘗屬杜衍爲墓誌衍却之仁宗聞其事他日謂衍曰薛顏有醜行卿不欲誌其墓誠清識也孫向自有傳

許元字子春宣州宣城人以父蔭爲太廟齋郎改大理寺丞累遷國子博士監在京權貨務三門發運判官元爲吏強敏尤能商財利慶曆中江淮歲漕不給京師乏軍儲參知政事范仲淹薦元可獨倚辦擢江淮制置發運判官至則悉發瀕江州縣藏粟所在留三月食遠近以次相補引千餘艘轉漕而西未幾京師足食朝廷以爲任職就遷副使遂以尙書主客員外郎爲使進金部特賜進士出身遷侍御史嘗欲與施昌言分行二浙江南調發軍食仁宗聞之語輔臣曰東南歲比不登民力匱乏嘗詔損歲漕百萬石而元與昌言乃更欲分道而出是必誅求疲民以自爲功非朕志也下詔戒飭旣而元欲專六路財賦收羨餘以媚三司憚諸部不從請以六路轉運司自隸旣可之矣而轉運使多論其

罪事遂寢擢天章閣待制再遷郎中以疾請還歷知揚越秦州卒元在江淮十三年以聚斂刻剝爲能急於進取多聚珍奇以賂遺京師權貴尤爲王堯臣所知發運使治所在真州衣冠之求官舟者日數十輩元視勢家貴族立權巨艦與之卽小官惇獨伺候歲月有不能得人以是憤怒而元自以爲當然無所愧

憚

鍾離瑾字公瑜廬州合肥人舉進士爲簡州推官以殿中丞通判益州建言州郡旣上雨後雖凶旱多隱之以成前奏請令監司劾其不實者擢開封府推官出提點兩浙刑獄衢潤州饑聚餓者食之頗廢農作請發米二萬斛賑給家毋過一斛後徙淮南轉運副使歷京西河東河北轉運使改江淮制置發運使殿直王乙者請自揚州召伯埭東至瓜州濬河百二十里以廢二埭詔瑾規度以工大不可就止置牓召伯埭旁人以爲利累遷尙書刑部郎中爲三司戶部副使除龍圖閣待制權知開封府未踰月得疾仁宗封藥賜之使未及門而卒

孫冲字升伯趙州平棘人舉明經歷古田青陽尉鹽山麗水主簿嘗併喪父母

去官有司循五代故事必六年乃聽調冲援古制以書干宰相不納後舉進士登甲科授將作監丞歷通判晉州保州坐與保州守爭事降監吉州酒累遷太常博士河決棣州知天雄軍寇準請徙州治河命冲往按視還言徙州動民亦未免治堤不若塞河爲便遂以冲知棣州自秋至春凡四決冲皆塞之就除殿中侍御史準爲樞密使卒徙州信陽而冲坐守護河堤過嚴民輸送往來堤上者輒榜之爲使者論奏徙知襄州冲復上疏論徙州非便著河書以獻會京西蝗真宗遣中使督捕至襄怒冲不出迎乃奏蝗唯襄爲甚而州將日置酒無卹民意帝怒命卽州置獄冲得屬縣言歲稔狀馳驛上之時使者猶未還帝悟爲追使者笞之以侍御史爲京西轉運塞滑州決河權知滑州參知政事魯宗道總河事用太常博士李渭策欲盛夏興役冲言徒費薪楫困人力雖塞必決遂罷知河陽累遷刑部郎中歷湖北河東轉運使會南郊賞賜軍士而汾州廣勇軍所得帛不逮他軍一軍大譟捍守佐堂下劫之約與善帛乃免城中戒備遣兵圍廣勇營冲適至命解圍弛備置酒張樂推首惡十六人斬之遂定初守佐

以亂軍所約者上聞詔給善帛使者至潞冲促之還曰以亂而得所約是愈誘之亂也卒留不與入判登聞鼓院以目疾改兵部郎中直史館知河中府徙潞州復爲河東轉運使遷太常少卿擢右諫議大夫復知潞州遷翰林院學士及徙同州權西京留司御史臺遷給事中喪明卒冲爲吏所至以強幹稱能任鉤距多得事情然無家法晚節尤寡廉聲孫永自有傳

崔嶧字之才京兆長安人進士及第累官尚書職方員外郎知遂州建議瞿塘峽置關如劍門以察奸人事旣施行徙提點刑獄嘉陵江歲調民丁治堤塌嶧更用州兵代其役文州蕃卒數剽攻邊戶守臣慮生事多以牛酒和遣嶧請守臣歲時得行邊益募勇壯伺其發一切捕擊之後無復內寇就除轉運使歷三司戶部判官河東轉運使會更錢法潞州民大擾推其首惡誅之人心遂定後爲戶部副使以右諫議大夫爲河東都轉運使遷給事中還糾察在京刑獄諫官御史言宰相陳執中縱嬖妾殺婢命按治嶧以爲執中自以婢不恪笞之死非妾殺之頗左右執中卽授龍圖閣待制知慶州羌并阮族亂潛兵討平歷知

同州鳳翔府改工部侍郎集賢院學士知河中府嶧所至貪奸比老益甚在鳳翔轉運使薛向按之急不得已至河中請老以刑部侍郎致仕卒

田瑜字資忠河南壽安人舉進士歷袁郢合三州軍事推官遷大理寺丞知鹿邑建陽縣徙知蒙江二州累遷尙書司封員外郎提點廣南西路刑獄慶曆中區希範誘溪洞環州蠻叛上以瑜習知南方事就除荆湖北路轉運使瑜檄屬郡募民擊賊又督轉粟以守要害故兵所至皆不乏食賊勢大挫徙兩浙轉運按察使杭州龍山堤歲決水冒民居輒賦芻塞之瑜與民約每芻十束更輸石一尺率五歲得石百萬爲石堤堤固而歲不調民加直史館益州路轉運使改江淮制置發運使擢天章閣待制知廣州累遷諫議大夫權三司戶部副使儂智高犯邕瑜條上用兵禦賊十事智高平召對便殿具言南方山川險要所以備守之策乃以爲廣南東路體量安撫使還糾察刑獄同判吏部流內銓除龍圖閣直學士知青州城中有殺人投屍井中者吏以其無主名不以聞瑜廉得之大出金帛購賊後數日隣州民執賊以告屬歲凶多盜瑜立賞罰設方略捕

格之境中肅然徒知澶州背發疽卒瑜謹厚少文而於吏事頗盡心然御下急無廉稱

施昌言字正臣通州靜海人舉進士高第授將作監丞通判滁州後以太常博士召試館職不中選遷尚書屯田員外郎知太平州上政論三十篇入為殿中侍御史開封府判官安撫淮南還以禮部員外郎兼侍御史知雜事遷三司度支副使除天章閣待制河北都轉運使言事者以為濱棣等六州河可涉宜有城守如邊以待契丹詔昌言與宦官楊懷敏往視懷敏以為當城如邊昌言曰六州地千里又河數移徙城之甚難而無利契丹未渝盟先自困非便也或請於麟府立十二砦以拓境又詔昌言與明鎬張元度可否昌言獨以為麟府在河外於國家無毫髮入而至今魏守者徒以畏虜國之虛名今不當又事無利之砦以重困財力就除知慶州在州所為不法語徹朝廷昌言疑通判陳湜言之追發湜罪湜坐廢昌言亦降知華州歷知滄州河陽移河北都轉運使議塞商胡埽決河令復故道與北京留守賈昌朝累論徙江淮發運使加龍圖閣直

學士知應天府又知延州召還會塞六塔河以爲都大脩河制置使辭弗許加樞密直學士知澶州以便役事河決奪一官知滑州又知杭州加龍圖閣學士復知滑州以老求罷乃以知越州至京師卒昌言爲發運使時召范仲淹後堂出婢子爲優雜男子慢戲無所不言仲淹怪問之則皆昌言子也仲淹大不懌而去其治家如此

論曰狄棐郎簡孫祖德張若谷石揚休祖士衡並以文辭高第累侍從歷方州始爲名臣終鮮大過考其行事可見也李垂寧去華近不肯見宰相張洞以直言正論爲大臣所忌則其抱負從可知矣若李仕衡而下十人皆能任劇繁然或寡廉稱或有醜行君子恥之

宋史卷二百九十九

宋

史

卷二百九十九

列傳

古

中華書局聚

卷之三十五

...

...

...

...

...

...

...

...

...

...

...

...

宋史卷三百

元中書右丞相總裁脫脫等修

列傳第五十九

楊偕

王沿

子鼎

杜杞

楊畋

周湛

徐的

姚仲孫

陳太素

馬尋杜會附

李虛己

張傳

俞獻卿

陳從易

楊大雅

楊偕字次公坊州中部人唐左僕射於陵六世孫父守慶仕廣南劉氏歸朝爲坊州司馬因家焉偕少從种放學於終南山舉進士釋褐坊州軍事推官知汧源縣再調漢州軍事判官道遇術士曰君知世有化瓦石爲黃金者乎就偕試之既驗欲授以方偕曰吾從吏祿安事化金哉術士曰子志若此非吾所及也出戶失所之在官數上書論時政又上所著文論召試學士院不中改永興軍節度推官又上書論陝西邊事復召試不赴即遷祕書省著作佐郎爲審刑院

詳議官再遷太常博士宋綬薦爲監察御史改殿中侍御史與曹脩古連疏言
劉從德遺奏恩太濫貶太常博士監舒州稅以尙書祠部員外郎知光州改侍
御史爲三司度支判官時郭皇后廢偕與孔道輔范仲淹力爭道輔仲淹旣出
偕止罰金乃言願得與道輔等皆貶不報富民陳氏女選入宮將以爲后偕復
上疏諫上以尙書戶部員外郎兼侍御史知雜事馬季良以罪斥置滁州自言
得致仕偕以謂致仕用優賢者不當以寵罪人又數論陞降之弊仁宗嘉納之
判吏部流內銓徙三司度支副使擢天章閣待制河北轉運使按知定州夏守
恩賊數萬守恩流嶺南明年丁母憂願終制不許進龍圖閣直學士知河中府
元昊反劉平石元孫戰沒偕聞乃僞爲書馳告延州曰朝廷遣救兵十萬至矣
命旁郡縣大具芻糧什器以俟比書至賊已解去夏竦爲陝西經略使請增置
土兵易戍兵歸衛京師偕言方關中財用乏復增土兵徒耗國用今賊勢方盛
雖大增土兵亦未能減戍兵東歸第竦懼敗事欲以兵少爲解爾竦復奏偕不
忠沮邊計偕爭愈力時陝西議立五保偕又以爲擾民疏請罷之徙陝州又徙

河東都轉運使詔大選三路之民募爲兵偕復言方今兵不爲少苟多而不練則其勢易以敗又困國而難供時論者惟務多兵而偕論常如此進樞密直學士知并州及元昊入寇密詔偕選強壯萬人策應麟府偕奏出師臨陣無紀律則士不用命今發農卒赴邊慮在路逃逸及臨陣退縮不稟號令請以軍法從事詔如所請并人大驚畏都轉運使文彥博奏罷之有中官預軍事素橫前帥優遇之偕至一繩以法命率所部兵從副總管赴河外戒曰遇賊將戰一稟副總管節度中人不復捧檄訴偕叱曰汝知違主帥命卽斬首乎監軍怖汗不覺墮笏翌日告疾未幾遂卒於是軍政肅然元昊大掠河北詔脩寧遠砦偕言寧遠砦在河外介麟豐二州之間無水泉可守請建新麟州於嵐州有白塔地可建砦屯兵謂遷有五利不遷有三害省國用惜民力利一也內禦岢嵐石府州沿河一帶賊所出路利二也我據其要則河冰雖合賊不敢逾河而東利三也商旅往來以通貨財利四也方河凍時得所屯兵馬五七千人以張軍勢利五也今麟州轉輸束芻斗粟費直千錢若因循不遷則河東之民困於調發無已

時害一也以孤壘餌敵害二也道路艱阻援兵難繼害三也且州之四面屬羌
遭賊驅脅蕩然一空止存孤壘猶四支盡廢首面心腹獨存也今契丹又與西
賊共謀待冰合來攻河東若朝廷不思禦捍之計而脩寧遠若是求虛名而忽
大患也況靈夏二州皆漢唐郡一旦棄之一麟州何足惜哉書奏帝謂輔臣曰
麟州古郡也咸平中嘗經寇兵攻圍非不可守今遽欲棄之是將退而以河爲
界也宜諭偕速脩復寧遠以援麟州明年改左司郎中本路經略安撫招討使
賜錢五十萬偕列六事于朝一罷中人預軍事二徙麟州三以便宜從事四出
冗師五募武士六專捕援且曰能用臣言則受命不然則已朝廷不從偕累奏
不已乃罷知邢州徙滄州求面論兵事召還令間日入對偕在并州日嘗論八
陣圖及進神楯劈陣刀其法外環以車內比以楯至是帝命以步卒五百如其
法布陣於庭善之乃下其法於諸路其後王吉果用偕刀楯法敗元昊於兔毛
川久之遷翰林侍讀學士知審官院復以爲左司郎中元昊乞和而不稱臣偕
以謂連年出師國力日蹙宜權許之徐圖誅滅之計諫官王素歐陽脩蔡襄累

章劾奏僭職爲從官不思爲國討賊而助元昊不臣之請罪當誅陛下未忍加戮請出之不宜留處京師帝以其章示僭僭不自安乃求知越州道改杭州時襄謁告過杭而輕遊里市或謂僭合言於朝對曰襄嘗緣公事抵我我豈可以私報耶又上太平可致十象圖還判太常司農寺改右諫議大夫請老以尙書工部侍郎致仕於其歸特賜宴嘗召問賜不拜卒遺奏兵論一篇帝憐之特贈兵部侍郎僭性剛而忠朴敢爲大言數上書論天下事議者以爲迂闊難用與人少合尤喜古今兵法有兵書十五卷集十卷子忱慥皆有雋才早卒

王沿字聖源大名館陶人少治春秋中進士第試祕書省校書郎歷知彭城新昌二縣改相州觀察推官知宗城縣張知白薦其才擢著作佐郎入爲審刑院詳議官再遷太常博士上書論漢唐之初兵革纔定未暇治邊圉則屈意以講和承平之後武力有餘而外侮不已則以兵治之孝武之於匈奴太宗之於突厥頡利是也宋興七十年而契丹數侵深趙貝魏之間先朝患征調之不已也故屈己與之盟然彼以戈矛爲耒耜以剽虜爲商賈而我壘不堅兵不練而規

規于盟敵之間豈久安之策哉夫善禦敵者必思所以務農實邊之計河北爲天下根本其民儉嗇勤苦地方數千里古號豐實今其地十三爲契丹所有餘出征賦者七分而已魏史起鑿十二渠引漳水溉斥鹵之田而河內饒足唐至德後渠廢而相魏磁洺之地並漳水者累遭決溢今皆斥鹵不可耕故沿邊郡縣數蠲租稅而又牧監芻地占民田數百千頃是河北之地雖十有其七而得賦之實者四分而已以四分之力給十萬防秋之師生民不得不困也且牧監養馬數萬徒耗芻豢未嘗獲其用請擇壯者配軍衰者徙之河南孳息者養之民間罷諸坳牧以其地爲屯田發役卒刑徒田之歲可用獲穀數十萬斛夫漳水一石其泥數斗古人以爲利今人以爲害繫乎用與不用爾願募民復十二渠渠復則水分水分則無奔決之患以之灌溉可使數郡瘠鹵之田變爲膏腴如是則民富十倍而帑廩有餘矣以此馭敵何求而不可詔河北轉運使規度而通判洛州王軫言漳河岸高水下未易疏導又其流濁不可溉田沿方遷監察御史卽上書駁軫說帝雖嘉之而不卽行語在河渠志時樞密副使晏殊以

笏擊從者折齒知開封府陳堯咨判官張宗晦日嗜酒惰事沿皆彈奏之天聖五年安撫關陝減諸縣秋稅十二三還爲開封府推官又體量河朔饑民所至不俟詔發官廩濟之就除轉運副使上言本朝制兵刑未幾於古自契丹通好三十年二邊常屯重兵坐耗國用而未知所以處之請教河北強壯以代就糧禁卒之闕罷招廂軍以其冗者隸作屯田行之數年禁卒當漸銷滅而強壯悉爲精兵矣古者刑平國用中典而比者以敕處罪多重於律以絹估罪者敕以緡直代之律坐髡欽而役者敕黥竄以爲卒比諸州上言謫卒太多衣食不足願勿復謫者七十餘州以律言之皆不至是以繁文罔之而寘于理也誠願削深文而用正律以錢定罪者悉從絹估黥竄爲卒者止從髡欽此所謂勝殘去殺無待百年者也被詔鞠曹訥獄于真定府遷殿中侍御史母喪服除改尙書工部員外郎知邢州復起爲河北轉運使奏罷二牧監以地賦民導相衛邢趙水下天平景祐諸渠溉田數萬頃因詣闕奏事上所著春秋集傳十六卷復上書以春秋論時事授直昭文館爲三司戶部副使徙鹽鐵遷兵部員外郎天

章閣待制陝西都轉運使時朝廷將減卒戍就食內地詔與知州總管鈐轄等議沿卽奏減卒數萬知樞密院李諮以爲不可復下沿邊都監議沿上疏曰兵機當在廊廟之上豈可取責小人哉諮惡其言奏罷之降知滑州徙成德軍建學校行鄉飲酒禮遷刑部郎中河東都轉運使加龍圖閣直學士知并州時元昊數寇河東建議徙豐州不報已而州果陷進樞密直學士右司郎中爲涇原路經略安撫招討使兼知滑州增屯兵城中隘甚乃築西關城五里改涇州觀察使元昊入寇副都總管葛懷敏率兵出捍沿教懷敏率兵據瓦亭待之懷敏進兵鎮戎沿以書戒勿入第背城爲砦以羸師誘賊賊至發兵擊之可有功懷敏不聽進至定川果爲所敗賊乘勝犯渭州沿率州人乘城多張旗幟爲疑兵賊遂引去坐懷敏敗復爲龍圖閣直學士刑部郎中知號州尋降天章閣待制而爲權御史中丞賈昌朝所奏落待制未幾徙知成德軍復待制又徙河中府卒沿好建明當世事而其論多齟齬初與河北水利導諸渠溉民田論者以爲無益已而邢州民有爭渠水至殺人者然後人知沿所建爲利嘗論以春秋法

斷事然真定之獄人以爲沿傳致之有文集二十卷唐志二十一卷子鼎

鼎字鼎臣以進士第累遷太常博士王堯臣領三司舉勾當公事數上書論時政得失時天子患吏治多弛監司不舉職而范仲淹等方執政擇諸路使者令按舉不法以鼎提點江東刑獄與轉運使楊紘判官王綽競擿發吏至微隱罪無所貸於是所部官吏怨之目爲三虎仁宗聞之不說後傳惟幾奉使江東戒以毋效三虎爲也仲淹等罷鼎與紘綽皆爲人所言時鼎提點兩浙刑獄降知深州王則以貝州反深卒龐旦以其徒謀以元日殺軍校劫庫兵應之前一日有告者鼎夜出檄遣軍校攝事外邑而陰爲之備翌日會僚吏置酒如常叛黨愕不敢動鼎刺得實徐捕首謀十八人送獄獄具候轉運使至審決未至軍中恟恟謀劫囚鼎因謂僚吏曰吾不以累諸君獨命取囚桀驚者數人斬于市衆皆失色一郡帖然轉運使至囚未決者半訊之皆伏誅明年河北大饑人相食鼎經營賑救頗盡力徙建州其俗生子多不舉鼎爲條教禁止時盜販茶鹽者衆一切杖遣之監司數以爲言鼎弗爲變徙提點河北刑獄治奸賊益急所劾

舉不避貴勢召爲開封府判官改鹽鐵判官累遷司封員外郎淮南兩浙荆湖制置發運副使內侍楊永德奏請沿汴置鋪挽漕舟歲可省卒六萬鼎議以爲不可永德橫猾執政重違其奏乃命三司判官一員將永德就鼎議發入難永德不能復鼎因疏言陛下幸察用臣不宜過聽小人妄有所改以誤國計於是永德言不用居二年遂以爲使前使者多漁市南物因奏計京師持遺權貴鼎一無所市獨悉意精吏事事無大小必出於己凡調發綱吏度漕路遠近定先後爲成法於是勞逸均吏不能爲重輕官舟禁私載舟兵無以自給則盡盜官米爲奸有能居販自贍者市人持以法不肯償所逋鼎爲移州縣督償之舟人有以自給不爲奸而所運米未嘗不足也入爲三司鹽鐵副使數與包拯爭議不少屈拯素強然無如之何遷刑部郎中天章閣待制河北都轉運使徙使河東卒鼎性廉不欺嘗任其子族人欲增年以圖速仕鼎不可父死分諸子以財鼎悉推與其弟嘗知臨邛縣轉運使選攝新繁新繁多職田斗粟不以自入奉使契丹得千縑散之族人一日盡所至不擾唯市飲食日用物增直以償事繼

母孝教育孤姪甚至自奉養儉約當官明敏強直不可撓所薦士多知名有終身不識者然性猜忌其行部至于藥餌皆手自局鑄至路州八義館疾作不知人事左右遑遽發藥奩悉無題識莫敢進以迄於卒初鼎與弟豫皆有才氣好上書言事仁宗稱之以爲豫孟浪鼎所言多可用豫爲人不事羈檢以大理丞知伊闕縣有異政棄官浮游江湖間殖貨自給以卒

杜杞字偉長父鎬蔭補將作監主簿知建陽縣強敏有才閩俗老而生子輒不舉杞使五保相察犯者得重罪累遷尙書虞部員外郎知橫州時安化蠻寇邊殺知宜州王世寧出兵討之杞言嶺南諸郡無城郭甲兵之備牧守非才橫爲邕欽廉三郡咽喉地勢險阻可屯兵爲援邕管內制廣源外控交趾願擇文臣識權變練達嶺外事者以爲牧守使經制邊事改通判真州徙知解州權發遣度支判官盜起京西掠商鄧均房焚光化軍授京西轉運按察使居數月賊平會廣西區希範誘白崖山蠻蒙趕反有衆數千襲破環州帶溪普義鎮寧峇嶺外騷然擢刑部員外郎直集賢院廣南西路轉運按察安撫使行次真州先遣

急遞以書諭蠻聽其自新次宜州蠻無至者杞得州校出獄囚脫其械使入洞說賊不聽乃勒兵攻破白崖黃泥九居山砦及五峒焚毀積聚斬首百餘級復環州賊散走希範走荔波洞杞遣使誘之趕來降杞謂將佐曰賊以窮蹙降我威不足制則恩不能懷所以數叛不如盡殺之乃擊牛馬爲曼陀羅酒大會環州伏兵發誅七十餘人後三日又得希範醢之以遺諸蠻因老病而釋者纔百餘人御史梅摯劾杞殺降失信詔戒諭之爲兩浙轉運使明年徙河北拜天章閣待制環慶路經略安撫使知慶州杞上言殺降者臣也得罪不敢辭將吏勞未錄臣未敢受命因爲行賞蕃酋率衆千餘內附夏人以兵索酋而劫邊戶掠馬牛有詔責杞杞言彼違誓舉兵酋不可與因移檄夏人不償所掠則酋不可得旣而兵亦罷去杞性強記博覽書傳通陰陽數術之學自言吾年四十六死矣一日據廁見希範與趕在前訴冤叱曰爾狂僭叛命法當誅尙敢訴邪未幾卒有奏議十二卷兄植以文雅知名累任監司終少府監弟樞亦強敏爲比部員外郎有張彥方者温成皇后母越國夫人客也坐奸利論死語連越國夫人

開封不敢窮治執政以后故亦不復詰獄上中書遣樞慮問樞揚言將駁正亟改用諫官陳升之權倖切齒於樞前此御史中丞王舉正留百官班論張堯佐除宣徽使樞嘗出班問其故至是蓋累月矣坐是罪樞絀監衡州稅卒

楊旼字樂道保靜軍節度使重勛之曾孫進士及第授祕書省校書郎并州錄事參軍再遷大理寺丞知岳州慶曆三年湖南徭人唐和等劫掠州縣擢殿中丞提點本路刑獄專治盜賊事乃募才勇深入峒討擊然南方久不識兵士卒多畏懼及戰孤漿峒前軍斲大兵悉潰旼踣巖下藉淺草得不死卒厲衆平六峒以功遷太常博士未幾坐部將胡元戰死降知太平州歲餘賊益肆帝遣御史按視還言旼嘗戰山下人樂爲用今欲殄賊非旼不可乃授東染院使荆湖南路兵馬鈐轄賊聞旼至皆恐畏踰嶺南遁又詔往韶連等州招安之乃約賊使出峒授田爲民而轉運使欲授以官與賞納質使還旼曰賊剽攻湖廣七年所殺不可勝計今使飽貲糧據峒穴其勢不久必復亂明年春賊果復出陽山旼卽領衆出嶺外涉夏秋凡十五戰賊潰旼感瘴疾歸蠻平願還舊官改尙書

屯田員外郎直史館知隨州召還爲三司戶部判官奉使河東丁父憂會儂智高陷邕州召至都門外辭以喪服不敢見仁宗賜以服飾御巾入對便殿卽日除起居舍人知諫院廣南東西路體量安撫經制賊盜畋至韶州會張忠戰死智高自廣州回軍沙頭將濟畋令蘇緘棄英州蔣偕焚糧儲及召并贊岑宗閱王從政退保韶州賊勢愈熾畋不能抗遂殺蔣偕王正倫敗陳曙復據邕州畋坐是落知諫院知鄂州再降爲屯田員外郎知光化軍明年又降爲太常博士歲終徙邠州復起居舍人爲河東轉運使入爲三司戶部副使遷吏部員外郎奉使契丹以曾伯祖業嘗陷虜辭不行河北舊以土絹給軍裝三司使張方平易以他州絹畋旣同書奏聞外議籍籍又密陳其不可久之擢天章閣待制兼侍讀判吏部流內銓上言願擇宗室之賢者使侍膳禁中爲宗廟計嘉祐三年冬河北地震明年日食正旦復上疏曰漢成帝時日食地震哀平之世嫡嗣屢絕此天所以示戒也陛下宜早立皇嗣以答天意改知制誥李珣自防禦使遷觀察劉永年自團練使遷防禦畋當草制封還詞頭因言祖宗故事郭進戍西

山董遵誨姚內斌守環慶與強寇對壘各十餘年未嘗轉官移鎮重名器也今
珣等無尺寸功特以外戚故除之恐非祖宗意不報詔他舍人草制而范鎮言
朝廷如以畋言爲是當罷珣等所遷官倘以爲非乞復令畋命詞不允進龍圖
閣直學士復知諫院嘉祐六年京師大水畋上言洪範五行傳簡宗廟則水不
潤下又曰聽之不聰厥罰常水去年夏秋之交久雨傷稼澶州河決東南數路
大水爲沴陛下臨御以來容受直諫非聽之不聰也以孝事親非簡於宗廟也
然而災異數見臣愚殆以爲萬機之聽必有失於審者七廟之享必有失於順
者惟陛下積思而矯正之乃下其章禮官并兩制考議咸言南郊三聖並侑温
成皇后立廟皆違經禮於是詔自今南郊以太祖皇帝定配改温成廟爲祠殿
舊制內侍十年一遷官樞密院以爲僥倖乃更定歲數倍之畋言文臣七遷而
內侍始得一磨勘爲不均宜如文武官僚例增其歲考遂詔南班以上仍舊制
無勞而嘗坐罪徙者卽倍其年議者謂畋以士人比闈寺爲失卒贈右諫議大
夫畋出於將家折節喜學問爲士大夫所稱在山下討蠻家問至卽焚之與士

卒同甘苦破諸峒及用之嶺南以無功斥名稱遂衰性清介謹畏每奏事必發封數四而後上之自奉甚約爲郡待客雖監司菜果數器而已及卒家無餘貲特賜黃金二百兩其後端平贈講讀官御飛白書扇遣使特賜置其柩

周湛字文淵鄧州穰人進士甲科爲開州推官中身言書判改祕書省著作佐郎通判戎州俗不知醫病者以祈禳巫祝爲事湛取古方書刻石教之禁爲巫者自是人始用醫藥累遷尙書都官員外郎知虔州提點廣南東路刑獄初江湖民略良人鬻嶺外爲奴婢湛至設方略搜捕又聽其自陳得男女二千六百人給飲食還其家徙京西路鄧州美陽堰歲役工數十萬澆州縣職田而利不及民湛奏罷之爲鹽鐵判官三司帳籍浩煩吏胥離析爲弊欺湛爲立勘同法歲減天下計帳七千爲江南西路轉運使州縣簿領案牘淆混無紀次且多亡失民訴訟無所質至久不能決湛爲立號以月日比次之詔下其法諸路又以徭賦不均百姓巧于避匿因條其詭名挾佃之類十二事且許民自言凡括隱戶三十萬還爲戶部判官又爲夔州路轉運使雲安鹽井歲賦民薪茅至破產

責不已湛爲獨鹽課而省輸薪茅判鹽鐵勾院以太常少卿直昭文館爲江淮制置發運使陞辭仁宗誠以毋納苞苴于京師湛惶恐對曰臣蒙聖訓不敢苟附權要以謀進身湛治煩劇能得其要所至喜條上利害前後至數十百事天資強記吏胥滿前一見輒識其姓名大江歷舒州長風沙其地最險謂之石牌灣湛役三千萬工鑿河十里以避之人以爲利除度支副使舊制發運司保任軍將至三司不得考覆而皆遷之至是以名上者三十五人湛盡覆其濫者拜右諫議大夫使契丹辭不行知襄州襄人不善陶瓦率爲竹屋歲久侵據官道簷廡相逼火數爲害湛至度其所侵悉毀徹之自是無火患然豪姓不便提點刑獄李穆奏湛擾人徙知相州右司諫吳及疏曰湛裁損居民第爲官也百姓侵官而主司禁之其職然也況聞湛明著律令約民以信乃奉法行事百姓自知罪不敢訴郡從事高直温夏竦子壻也竦邸店最廣故加譖於穆且謂湛伐木若干株昔之民居侵越官道木在道側旣正其侵地則木在中衢固宜剪去又湛種楸桐千餘本課戶貯水以嚴火禁又于民居得衆汲舊井四廢而復興

人得其利道傍之井反在民居之下其侵越豈不白乎望詔執政大臣辨正湛穆是非明垂獎黜若謂湛已行之命憚於追改是傷風敗俗貽患于後不若追改之愈也湛守大郡於湛不爲重輕但國家舉錯有所未安奉職者將何以勸邪未幾卒湛爲人脫易少威儀然善射弩雖隔屋亦中的云

徐的字公準建州建安人擢進士第補欽州軍事推官欽土煩鬱人多死瘴癘的見轉運使鄭天監請曰徙州瀕水可無患請轉而上聞從之天監因奏留的使辦役的短衣持挺與役夫同勞苦築城郭立樓櫓以備戰守畫地居軍民爲府舍倉庫溝渠塵肆之類民皆便之遷大理寺丞知吳縣移梁山軍通判常州屬歲饑出米爲糜粥以食餓者累遷尙書屯田員外郎知臨江軍擢廣南西路提點刑獄安化州蠻攻殺將吏所部卒畏誅謀欲叛的馳騎至宜州慰曉之曰爾曹亡懼能出力討賊猶可立功以自贖若朝叛則夕死非計也衆皆斂手聽命奏復澄海忠敢軍後皆獲其用改知舒州徙荆湖北路轉運使辰州蠻彭士義爲寇的開示恩信蠻黨悔過自歸攝江陵府事城中多惡少年欲爲盜輒夜

縱火火一夜十數發的籍其惡少年姓名使相保任曰爾輩遞相察不然皆爾罪也火遂息太子洗馬歐陽景猾橫不法爲里人害的發其奸竄之嶺外以兵部員外郎爲淮南江浙荆湖制置發運副使奏通泰州海安如臯縣漕河詔未下的以便宜調兵夫濬治之出滯鹽三百萬計得錢八百萬緡遂爲制置發運使軍賊王倫起山東轉掠淮南的團兵待之會青州改遣裨將傅永吉追殺之歷陽的與賞遷工部郎中復治秦州西溪河發積鹽加直昭文館區希範蒙趕寇衡湘命的招撫之既至再宿會蠻酋相繼出降三司以郊祠近宜召還計事既還蠻復叛除度支副使荆湖南路安撫使至桂陽降者復衆其欽景石碓華陰水頭諸洞不降者的皆討平之斬其酋熊可清等千餘級卒於桂陽

論曰宋承平時書生知兵者蓋寡偕沿數上書言邊事策畫論議有得有失固皆一時之俊畋由將家子力學第進士再討猺賊前勝後敗兵家之常也杞的俱以征宜州蠻立功杞則殺降失信的則招徠以恩其優劣概可見矣湛強敏所至有治績史稱善射抑亦文臣之習武事者歟鼎性孝友自奉甚約而疎於

財居官清辨土俗有生子不舉者輒禁之獨發摘吏奸貽衆怒或以虎目之豈其然乎

姚仲孫字茂宗本曹南著姓曾祖仁嗣陳州商水令因家焉父擘舉進士第一官至著作佐郎仲孫早孤事母孝擢進士第補許州司理參軍民婦馬氏夫被殺指里胥嘗有求而其夫不應以爲里胥殺之官捕繫辭服仲孫疑其枉知州王嗣宗怒曰若敢以身任之耶仲孫曰幸毋遽決冀得徐辨後兩月果得殺人者調邢州推官徙資州轉運使檄仲孫詣富順監按疑獄全活數十人資州更二守皆昏老事多決於仲孫改大理寺丞知建昌縣初建昌運茶抵南康或露積于道間爲霖潦所敗主吏至破產不能償仲孫爲券吏民輸山木卽高阜爲倉邑人利之徙通判彭州嘗以天下久無事不可以弛兵備因上前世禦戎料敵之策名防邊龜鑑通判睦州徙滁州歲旱饑有詔發官粟以賑民而主吏不時給仲孫旣至州立劾主吏夜索丁籍盡給之累遷尙書屯田員外郎王巖守益州辟通判州事召爲右司諫入內都知閤文應求爲都知仲孫數其罪白上

曰方帝齋宿太廟而文應叱醫官聲聞行在郭皇后暴薨中外莫不疑文應寘毒者出文應爲泰州兵馬鈐轄又稱疾留復論奏乃亟去以起居舍人知諫院管勾國子監以尙書戶部員外郎兼侍御史知雜事時諫議大夫十二員仲孫曰諫議大夫蓋朝廷之選不宜以歲月序進今諸寺卿至前行郎中三十五員貼近職者猶不在數若以年勞授則數年之外諫議大夫員益多請艱其選以處材望之臣餘悉次補卿監乃詔當選者奏聽旨先是諸路復提點刑獄還朝多擢爲省府官仲孫請第其課爲三等升黜之卽詔仲孫司考課之法歷三司戶部度支鹽鐵副使進天章閣待制河北都轉運使大修城壘兵備仁宗賜詔褒之權知澶州河壞明公埽絕浮橋仲孫親總役堤上埽一夕復完權知大名府夜領禁兵塞金堤決河是歲澶魏雖大水民不及患進禮部郎中龍圖閣學士徙陝西都轉運使未行權三司使事屬西北備邊募兵益屯及賞賜聘問之費不可勝計仲孫悉心經度雖病未嘗輒廢事坐小吏詐爲文符出知蔡州因母憂喪一目卒

陳太素字仲華河南緱氏人中進士第嘗爲大理評斷官入審刑爲詳議官權大理少卿又判大理事任刑法二十餘年朝廷有大獄疑必召與議太素爲推原人情以傅法意衆皆釋然自以爲不及雖號明習法令然所論建亦或有不中每臨案牘至忘寢食大寒暑不變子弟或止之答曰囹圄之苦豈不甚于我也歷知江陰軍兗州明州有治迹在大理耳疾數求罷執政以爲任職弗許累官至尙書兵部郎中卒太素家行修治尤善論刑名常以爲有司議法當據文直斷不可求曲當法求曲當法所以亂也同時有馬尋者須城人舉毛詩學究累判大理寺以明習法律稱歷提點兩浙陝西刑獄廣東淮南兩浙轉運使知湖撫汝襄洪宣鄧滑八州襄州饑人或羣入富家掠困粟獄吏鞠以強盜尋曰此脫死爾其情與強盜異奏得減死論著爲例終司農卿又有杜曾者濮州人爲吏號知法嘗言國朝因唐大中制故殺人雖已傷未死已死更生皆論如已殺夫殺人者死傷人者刑先王不易之典律雖謀殺已傷則絞蓋甚其處心積慮陰致賊害爾至於故殺初無殺意須其已死乃有殺名苟無殺名而用殺法

則與謀殺孰辨自大中之制行不知殺幾何人矣請格勿用又言近世赦令殺人已傷未死者皆得原減非律意請傷者從律保辜法死限內者論如已殺勿赦皆著爲令

李虛己字公受五世祖盈自光州從王潮徙閩遂家建安父寅有清節仕江南李氏至諸司使江南國除授殿前承旨辭不拜時僞官皆入留京師而寅母獨在江南乃遣其長子歸養舉進士起家爲衢州司理參軍母老棄官以歸虛己亦中進士第歷沈邱縣尉知城固縣改大理評事累遷殿中丞提舉淮南茶場召知榮州未行改遂州時太宗勵精政事嘗手書累二十餘紙曰公勤潔己奉法除奸惠愛臨民者乃可書爲勞績月給奉以實錢命有司擇羣臣以治最聞者賜之仍諭曰除奸之要在乎奉法不可因以生事時虛己被賜因獻詩自陳父子遭遇榮及祖母帝悅爲批其紙尾曰虛己學古入官榮親事生奉書爲郡欲布新規朕得良二千石矣遂賜五品服又賜其祖母錢五十萬命翰林學士張洎會兩制三館儒臣徧閱所批詔其後以南郊恩封羣臣母妻虛己又請罷

其妻封以授祖母詔悉封之世以爲榮會遣使察川峽吏能否而州多不治唯
虛己與薛顏邵曄查道數人以能任職稱再遷尙書屯田員外郎以便親請通
判洪州是時寅已謝歸春秋高寅母尙無恙虛己雙轡迎侍寅至豫章樂其山
水曰此可以終吾身也遂臨州之東湖築第宇以居虛己爲侍御史出提點荆
湖南路刑獄徙淮南轉運副使累遷兵部郎中爲龍圖閣待制歷判大理寺久
之求補外真宗稱其儒雅循謹特遷右諫議大夫數月出知河中府召權御史
中丞未幾以疾辭進給事中知洪州遷尙書工部侍郎徙池州求分司南京卒
初寅之請老年未六十虛己分司而歸年六十九其季虛舟仕至餘干縣令坐
法免官不復言仕初太宗旣賜虛己錢翌日以語宰相曰虛己詩思可嘉予錢
五十緡矣宰相對以所予乃五十萬帝知其誤由是詔羣臣以章獻者閣門勿
受皆由中書門下閱而上之然論者謂虛己父子篤行家甚貧雖人主一時之
誤殆天賜也寅事親孝治家有法閨門之內肅如也虛己虛舟又以孝友清慎
世其家虛舟之子寬爲尙書金部郎中定爲司農少卿爲吏頗有能名虛己喜

爲詩數與同年進士曾致堯及其壻晏殊唱和初致堯謂日子之詞詩雖工而音韻猶啞虛己未悟後得沈休文所謂前有浮聲則後須切響遂精於格律有雅正集十卷

張傳字巖卿唐初功臣公謹之裔祖播爲亳州團練副使子孫因爲譙人傳進士及第稍遷祕書省著作佐郎知奉符縣時方脩會真宮天書觀及增治岳祠以辦事稱賜錢二十萬宰相向敏中冊東岳帝號還薦之知楚州會歲饑貽書發運使求貸糧不報因歎曰民轉死溝壑矣報可待邪乃發上供倉粟賑貸所活以萬計因拜章待罪詔獎之提點江西刑獄徙江東就除轉運使入權三司鹽鐵判官會河決濟北民多被害命安撫京東累遷工部郎中出爲兩浙轉運使改荆湖北路復爲鹽鐵判官再遷兵部爲陝西轉運使徙江淮發運使未至召還屬西京奏兵食乏因言馮翊華陰積粟多可運二十萬石繇三門下濟之遂留爲侍御史知雜事判吏部流內銓進三司度支副使以疾請外遷太常少卿知應天府逾月爲右諫議大夫徙青州遷給事中知鄆州復知應天府遂以

工部侍郎致仕卒傅強力治事七爲監司所至審覈簿書勾擿奸隱州縣憚之
傅曰奚爲我憚哉吾所以事事致察者正所以愛州縣也吏不敢慢則州縣不
復犯法矣人亦以爲然天禧中有術士自言數百歲少時嘗游秦悼王家歷見
唐肅宗代宗朝由是出入禁中見尊重人無敢詰其僞傅見之訊以唐事術士
語屈

俞獻卿字諫臣歙人少與兄獻可以文學知名皆中進士第獻可有吏稱歷吏
部郎中龍圖閣待制獻卿起家補安豐縣尉有僧貴寧積財甚厚其徒殺之詣
縣給言師出遊矣獻卿曰吾與寧善不告而去豈有異乎其徒色動因執之得
其所瘞尸一縣大驚再調昭州軍事推官會宜州陳進亂象州守不任事轉運
使檄獻卿往佐之及至守謀棄城獻卿曰臨難苟免可乎賊至尙當力擊不勝
有死而已奈何棄去初昭州積緡錢鉅萬獻卿盡用平糴至積穀數萬及是大
兵至賴以饋軍改大理寺寺丞爲本寺詳斷官歷知慎仁和二縣再遷太常博
士知南雄州徙潮州除殿中侍御史爲三司鹽鐵判官上言天下穀帛日益耗

物價日益高欲民力之不屈不可得也今天下穀帛之直比祥符初增數倍矣人皆謂稻苗未立而和糴桑葉未吐而和買自荆湖江淮間民愁無聊轉運使務刻剝以增其數歲益一歲又非時調率營造一切費用皆出於民是以物價積高而民力積困也陛下誠以景德中西北二邊通好最盛之時一歲之用較之天禧五年凡官吏之要冗財用之盈縮力役之多寡賊盜之增減較然可知其利害也況自天禧以來日侈一日又甚于前夫卮不盈者漏在下木不茂者蠹在內陛下宜知其有損於彼無益於此與公卿大臣朝夕圖議而揀正之帝納其言爲罷諸宮觀兵衛又命官除無名之費以鉅萬計淮浙鹽利不登命獻卿往經度之更立新法歲增鹽課緡錢甚衆會其兄爲鹽鐵副使徙開封府判官朝廷擇陝西轉運使宰相連進數人不稱旨他日獻卿在所擬中帝曰此可以除陝西轉運使時邊吏多因事邀功涇原路鈐轄擅於武英州鑿邊壕置堡砦獻卿度必招寇患亟檄罷之未幾賊果至殺將士塞所鑿壕而去徙京西因入對甚言趙振堪將帥范仲淹明鎬可大用及條上邊策甚備除福建轉運使

還判三司鹽鐵勾院累遷尙書刑部郎中直史館知荆南歷戶部度支鹽鐵副使以右諫議大夫集賢院學士知杭州暴風江潮溢決堤獻卿大發卒鑿西山作堤數十里民以爲便還勾當三班院知通進銀臺司最後知應天府以刑部侍郎致仕卒

陳從易字簡夫泉州晉江人進士及第爲嵐州團練推官再調彭州軍事推官王均盜據成都連陷綿漢諸郡彭人謀殺兵馬都監以應之時從易攝州事斬其首謀者召餘黨曉以禍福賁之衆皆呼悅乃率厲將吏脩嚴守械戒其家僮積薪舍後曰吾力不足以守當死於此賊聞其有備不敢入境賊平安撫使王欽若以狀聞召爲祕書省著作佐郎大理寺詳斷官遷太常博士出知邵武軍預脩冊府元龜改監察御史真宗宴近臣崇和殿召從易預賦詩稱旨遷侍御史改刑部員外郎直史館知虔州會歲大饑有持杖盜取民穀者請一切減死論凡生者千餘人天禧中坐薦送別頭進士失實降工部員外郎以父老求鄉郡宰相寇準惡其疎己除吉州從易因對自言改福州未行遭父喪服除糾察

在京刑獄出爲湖南轉運使徙知荆南擢太常少卿直昭文館知廣州又坐嘗課校太清樓書字非僞誤而從易妄判竄之降直史館明年復職在廣三年以清德聞入爲左司郎中知制誥初景德後文士以雕靡相尙一時學者鄉之而從易獨守不變與楊大雅相厚善皆好古篤行時朝廷矯文章之弊故並進二人以風天下兼史館脩撰遷左諫議大夫命使契丹以年老辭不行又辭職請補郡進龍圖閣直學士知杭州卒從易好學強記爲人激直少容喜別白是非多面折人或尤其過從易終不變王欽若最善之嘗謂人曰數日不見簡夫輒忽忽不懌及廢居南京時丁謂方用事人畏謂無敢往見欽若者從易將使湖南欲過之遇汴水旱涸遂告謂曰從易願使湖外者非獨爲貧也亦以王公在宋故就省之爾今汴涸義不可從他道進幸公許少留謂卽大喜曰王公之門獨君爲知我者留權糾察刑獄從易不敢當乃聽歸館須汴通乃行時寇準貶道州謂又謂從易曰廬陵之事可以釋憾矣從易對曰當以故相事之爾謂有愧色其行志多類此所著泉山集二十卷中書制藁五卷西清奏議三卷

楊大雅字子正唐靖恭諸楊虞卿之後虞卿孫承休唐天祐初以尚書刑部員外郎爲吳越國冊禮副使楊行密據江淮道阻不克歸遂家錢塘大雅承休四世孫也錢俶歸朝挈其族寓宋州大雅素好學日誦數萬言雖飲食不釋卷進士及第歷新息鄆陵縣主簿改光祿寺丞知新昌縣徙知潯州監在京商稅再遷祕書丞咸平中文趾獻犀因奏賦召試遷太常博士久之又上書自薦獻所爲文復召試直集賢院出知筠袁二州提舉開封府界諸縣鎮事爲三司鹽鐵判官知越州提點淮南路刑獄還考試國子監生坐失薦送降監陳州酒徙知常州判三司都磨勘司戶部勾院遷集賢殿脩撰知應天府還糾察在京刑獄以兵部郎中知制誥大雅初名侃至是避真宗藩邸諱詔改之居二歲拜右諫議大夫集賢院學士知亳州卒大雅朴學自信無所阿附直集賢院二十五年不遷有出其後者往往致榮顯或笑其違世自守大雅嘆曰吾不學乎世而學乎聖人由是以至此吾之所有不敢以薦於人而嘗自獻乎天子矣天禧中使淮南循江按部過金陵境上遇風覆舟得榜卒拯之及岸冠服盡喪時丁謂鎮

金陵遣人遺衣一襲大雅辭不受謂以爲歎宰相王欽若亦不悅之晚與陳從易並命知制誥大雅嘗因轉對上原治十七篇所著大隱集三十卷西垣集五卷職林二十卷兩漢博聞十二卷

論曰仲孫以才力自奮於時論事著效號爲能吏太素尋曾能知法意理官之良也虛己獻卿立朝雖微卓犖大節及爲他官所至有吏稱若從易拒釋憾之言大雅辭襲衣之遺卒使權奸愧歎抑又可尙哉

宋史卷三百

...

...

...

...

...

...

...

...

...

...

...

...

宋史卷三百一

元中書右丞相總裁脫脫等修

列傳第六十

邊肅宣撫使梅詢馬元方薛田

寇瑛本平賊楊日嚴李行簡章頻

陳琰李宥張秉張擇行

鄭向郭稹趙賀高觀

袁抗徐起張旨齊廓

鄭驤

邊肅字安國應天府楚邱人進士及第除大理評事知於潛縣累遷太常博士

三司使魏羽薦為戶部判官祀南郊超薦尚書度支員外郎帝以三司鈎取無

法至道初置行帳司以會財用之數命肅主之帳成遷工部郎中真宗幸大名

府命肅經度行在糧草改判開拆司出知曹州徙邢州會契丹大入先是地屢

震城堞摧圯無守備帝在澶州密詔肅若州不可守聽便宜南保他城肅匿詔不發督丁壯乘城而鬪諸門悉所部兵陣以代之騎傅城下肅與戰小勝契丹莫測也居三日引去時鎮魏深趙磁洛六州閉壁不出老幼趨城者肅悉開門納之擢樞密直學士徙宣州車駕朝陵徙河南府還勾當三班院出知天雄軍徙真定府累遷給事中以王嗣宗代肅嗣宗與肅有舊隙諷通判東方慶訟肅前在州私以公錢貿易規利遣吏彊市民羊買女口自入嗣宗上其事帝以肅近臣不欲屬吏遣劉綜任中正以章示之肅引伏以守城功止奪三官貶岳州團練副使久之徙武昌安遠軍節度副使起知光州以泰寧軍節度副使徙泗州又徙泰州卒子調終尙書兵部員外郎福建路轉運使

梅詢字昌言宣州宣城人少好學有辭辨進士及第爲利豐監判官後以祕書省著作佐郎御史臺推勘官預考進士於崇政殿真宗過殿廬奇其占對詳敏召試中書除集賢院李繼遷攻靈州急吳淑上書請遣使諭秦隴以西諸戎使攻繼遷詢亦請以朔方授潘羅支使自攻取帝問誰可使羅支者詢請行未至

而靈州陷還爲三司戶部判官詢自以爲遇主知屢上書陳論西北事時契丹數侵河北詢請遣大臣臨邊督戰募遊手擊賊又論曹瑋馬知節才可用傅潛楊瓊敗當誅田紹斌王榮等可責其效以贖過凡數十事其言甚壯帝欲命知制誥李沆力言其險薄望輕不可用後斷田訟失實降通判杭州知蘇州就徙兩浙轉運副使判三司開拆司坐議天書出知濠州爲湖北轉運使擅假驛馬與邵曄子省親疾而馬死奪官一級降通判襄州知鄂州徙蘇州爲陝西轉運使坐薦舉朱能貶懷州團練副使又以善寇準徙池州起知廣德軍歷楚壽陝州復直集賢院改直昭文館知荆南擢龍圖閣待制糾察在京刑獄歷龍圖閣直學士樞密直學士知通進銀臺司判流內銓爲翰林侍讀學士羣牧使累遷給事中知審官院仁宗御邇英閣讀正說養民篇覽歷代戶口登耗之數顧謂侍臣曰今天下民籍幾何詢對曰先帝所作蓋述前代帝王恭儉有節則戶口充羨賦斂無藝則版圖衰減炳然在目作鑒後王自五代之季生齒彫耗太祖受命而太宗真宗休養百姓天下戶口之數蓋倍於前矣因詔三司及編脩院

檢閱以聞病足出知許州卒故事侍讀學士無出外者天禧中張知白罷參知政事領此職始出知大名府非歷二府而出者自詢始詢性卞急好進而侈於奉養至老不衰然數爲朝廷言兵在濠州夢人告曰呂丞相至矣既而呂夷簡通判州事故待之甚厚其後援詢於廢斥中以至貴顯夷簡力也

馬元方字景山濮州鄆城人父應圖嘗知頓邱縣太宗攻幽州應圖部芻糧沒虜中元方去髮爲浮屠間行求父尸不得訴於朝上哀之爲官其兄元吉元方淳化三年進士及第爲韋城縣主簿改大理寺評事知萬年縣諸將討李繼遷關輔轉餉踰瀚海多失亡獨元方所部全十九以勞遷本寺丞爲御史臺推勘官遷殿中丞戶部使陳恕奏爲判官元方言方春民貧請預貸庫錢至夏秋令以絹輸官行之公私果便因下其法諸路知徐州改太常博士梓州路轉運使後知鄆州量括牧地數千頃爲京東轉運副使遷轉運使按部至濮州被酒毆知州蔣信降知宿州下詔切責之徙滑州爲京西轉運使知應天府累遷太常少卿擢右諫議大夫權三司使公事衆論不以爲允真宗謂宰臣曰元方在三

司何多謗也王旦曰元方盡心營職然其性卞急且不納僚屬議而醜言詆之
所以買怨帝曰僚屬顧不有賢俊邪歲餘以煩苛罷進給事中權知開封府以
樞密直學士知并州留再任賜白金五百兩詔中書諭以委屬之意官至兵部
侍郎卒

薛田字希稷河中河東人少師事种放與魏野友善進士起家丹州推官李允
正知延州辟爲從事向敏中至亦薦其材改著作佐郎知中江縣真宗祀汾陰
田時居父喪經度制置使陳堯叟奏起通判陝州還拜監察御史以母憂去會
祀太清宮又用丁謂奏起通判亳州遷殿中侍御史權三司度支判官改侍御
史益州路轉運使民間以鐵錢重私爲券以便交易謂之交子而富家專之數
致爭訟田請置交子務以權其出入未報及寇城守益州卒奏用其議蜀人便
之就除陝西轉運使進直昭文館知河南府復入度支爲副使使契丹還擢龍
圖閣待制知天雄軍未幾擢知開封府以樞密直學士知益州累遷左司郎中
代還知審刑院羌人內寇特遷右諫議大夫知延州久之以疾徙同州又徙永

與軍辭不行卒田性頗和厚初以幹敏數爲大臣所稱後屢更任使所治無赫
赫名

寇瑛字次公汝州臨汝人初母夢神人授珠吞之而娠生而眉目美秀擢進士
授蓬州軍事推官李順餘黨謝才盛等復起爲盜瑛設方略擒送京師徙開封
推官會施州蠻叛轉運使移瑛權領施州先是戍兵仰他州餽糧瑛至請募人
入米償以鹽軍食遂足而民力紓復招諭高州刺史田彥伊子承寶入朝得給
印紙爲高州官族未幾溪南蠻復內寇瑛率衆擒其酋領戮之以白芳子弟數
百人築柵守其險要就除大理寺丞知開州遷殿中丞通判河南府坐解送諸
料失實降監晉州稅以太常博士通判并州改監察御史真宗祀汾陰王嗣宗
知永興辟權通判專領祠事遷殿中侍御史爲開封府判官嘗奏事帝詢施州
備禦之術因諭之曰東川控蠻夷爾功已試其爲朕鎮撫之命爲梓州路轉運
使晏州多剛縣會斗望劫瀘州燒清井監殺官吏瑛趨富順監命部兵多張旗
幟踰山西北趨戎州盡取公私舟載糧甲具音樂合兩路兵至江安誘溪監順

史簡松南廣移悅等州刺史及八姓烏蠻首領使斷賊徑用夷法植竹爲誓門橫竹繫猫犬鷄各一於其上老夷人執刀劍謂之打誓呼曰誓與漢家同心擊賊卽刺牲血和酒而飲瑊給鹽及酒食針梳衣服等付以大榜約大軍至揭榜以別逆順不殺汝老少不燒汝欄柵夷人大喜帝遣內殿崇班王懷信議攻討招輯之宜瑊奏夷人嘗於二年春燒清井監殺吏民旣赦貸其罪復來寇邊聲言朝廷且招安得酒食衣服矣若不討除則戎瀘資榮富順監諸夷競起爲邊害矣詔發陝西兵益以白芳子弟合六千三百人緣清井溪轉鬪凡十一陣破之夷人相率來附納牛羊銅鼓器械甚衆而斗望猶旅拒不從瑊命懷信分兵拔其柵與都巡檢使符承順進戰思晏江口斗望等始驚遽勢稍却明日復分三道來拒王師懷信等格戰瑊乘其後大破之斗望衆萬餘囂不能軍溺死者衆遂降因籍軍之勇悍千人分五都以隸禁軍爲寧遠指揮使守清井監更建砦柵濬三壕以環之就加侍御史召爲三司鹽鐵判官逾月出爲河北轉運使天禧中河決澶淵瑊視役河上隄墊數里衆皆奔潰而瑊獨留自若須臾水爲

折去衆頗異之遷工部郎中上言契丹約和以來河北減戍卒之半而復刺土兵其實益三分之一而塞下軍儲不給請行入中鑿頭便糴三說之法入爲三司度支副使未幾以右諫議大夫集賢院學士知益州仁宗卽位遷給事中瑛與丁謂厚善帝謂輔臣曰瑛有吏幹毋深譴也徙鄧州坐失舉降少府監知金州復右諫議大夫會河決徙知滑州總領脩河旣而以歲饑罷役瑛言病民者特健芻耳幸調率已集若積之經年則朽腐爲棄物後復興工斂之是重困也乃再詔塞河河平擢樞密直學士明年復給事中知秦州又坐失舉奪一官召權三司使復其官如故時有議茶法者帝訪以利害瑛曰議者未知其要爾河北入中兵食皆仰給於商旅若官盡其利則商旅不行而邊民困於餽運茶法豈可以數更帝然之權知開封府戚里有毆妻至死更赦事發者太后怒曰夫婦齊體奈何毆致死邪瑛對曰傷居限外事在赦前有司不敢亂天下法卒免死天聖末再使契丹未行而卒瑛少孤鞠於祖母王氏及登朝以妻封邑回授之朝臣得回封祖母自瑛始性頗疎財通音律知術數初附丁謂故少達及謂

敗左遷鬱鬱不自得祕書丞彭齊賦喪家狗以刺之

楊日嚴字垂訓河南人進士及第試祕書省校書郎知安邱縣三司辟爲檢法官遷大理寺丞又爲本寺檢法官監都進奏院通判亳陳二州判吏部南曹兼登聞鼓院出知襄州徙廬鄆二州入爲開封府判官使契丹還爲兩浙轉運副使未行會青徐饑改京東轉運使因請江淮陝西轉粟五十萬以賑貧民又開清河八十里抵暖水河並堤起倉廩以便漕運加直史館徙益州轉運使又徙江淮制置發運使還歷三司戶部度支鹽鐵副使累遷太常少卿以右諫議大夫集賢院學士知河中府加樞密直學士知益州時用兵伐元昊三司急財用有詔析戶版爲十等第賦役民以歲租占佃官田廬者高其估募輸錢就市爲己業人苦其擾又陝西奏收市益梓利路溪洞馬而不知其實無馬也日嚴皆奏罷之遷勾當三班院知通進銀臺司聞後爲守者其政不便蜀人因進對猶從容言遠方所宜撫安之無容變法以生事遷給事中以龍圖閣學士知澶州召權知開封府史械囚不謹囚自殺坐是罷府事判太常司農寺同知審官院

卒日巖初爲益州轉運使無他治能及知益州頗爲蜀人所信愛兄日華歷官至太常少卿三司副使

李行簡字易從同州馮翊人家貧刻志於學讀六經每至夜分寒暑不易又聚木葉學書筆法遒勁與里中富人楊士元同學既而同時中進士第士元資遺行簡謝不取起家隴州司理參軍徙彭州軍事推官陵州富民陳子美父死繼母詐爲文書逐出之累訴不得直轉運使檄行簡劾正其獄改祕書省著作郎再遷太常博士知坊州御史中丞王嗣宗薦爲監察御史王旦數稱其才真宗雅亦知之再遷侍御史陝西旱蝗命往安撫發倉粟救乏絕又蠲耀州積年逋租還擢龍圖閣待制歷尙書刑部郎中帝數幸龍圖閣命講周易間訪大臣能否行簡所對無怨昵各道其所長人以爲長者久之拜右諫議大夫集賢院學士乾興初改給事中以足疾請外得知河中府徙號州卒

章頻字簡之建州浦城人與弟頤皆以進士試禮部預選會詔兄弟毋並舉頻卽推其弟棄去後六年乃擢第自試祕書省校書郎知南昌縣改大理寺丞知

九隴縣遷殿中丞眉州大姓孫延世僞爲券奪族人田久不能辨轉運使使按治之頻視券墨浮朱上曰是必先盜印然後書旣引伏獄未上而其家人復訴于轉運使更命知華陽縣黃夢松覆按無所異夢松用此入爲監察御史頻坐不時具獄降監慶州酒徙知長洲縣天禧初增置諫官御史十二人頻以選得召對稱旨擢監察御史陳亳間民訛言兵起老幼皆奔命安撫京西還爲三司度支判官青州麻士瑤殺從子温裕并其財遣往按治士瑤伏誅又詔鞠邛州牙校訟鹽井事皇城使劉美依倚后家受賂使人市其獄頻請捕繫真宗以后故不問忤旨出知宣州改殿中侍御史遷侍御史頻雅善丁謂謂貶左遷尙書比部員外郎監饒州酒起知信州進刑部員外郎知福州王氏時賦民官田歲輸租稅而已至是或謂鬻之可得緡錢二十餘萬頻疏以爲不可徙知潭州改廣西轉運使撻宜州守貪暴不法旣罷去反訟頻子許嘗被刑而冒奏爲祕書省校書郎頻坐謫知饒州復入爲度支判官累遷刑部郎中使契丹至紫濛館卒契丹遣內侍就館奠祭命接伴副使吳克荷護其喪以錦車駕橐駝載至中

京斂以銀飾棺又具鼓吹羽葆吏士持甲兵衛送至白溝詔遣其子訪乘傳扈其柩以歸訪官三班奉職卽許也

陳琰字伯玉澶州臨河人進士及第歷溧陽欒城縣主簿遷大理寺丞監真定府稅知金堂夏津二縣再遷太常博士轉運使盧士倫曹利用壻也怙勢聽獄不以直訟者不已付琰評決琰直之御史知雜韓億聞其事奏爲監察御史丁父喪哀毀墳木連理憂除遷殿中侍御史天聖五年祀南郊中外以爲丁謂復還琰上疏曰亂常肆逆將而必誅陰懷姦惡有殺無赦丁謂因緣險佞據竊公台賄賂包苴盈於私室威權請謁行彼公朝引巫師妖術厭魅宮闈易神寢龍岡冀消王氣今禋柴展禮渙汗推恩必慮謂潛輸琛貨私結要權假息遐荒冀移善地李德裕止因朋黨不獲生還盧多遜曲事王藩卒無牽復請不原赦帝然之爲三司度支判官遷侍御史歷京西河東河北轉運副使三司戶部度支鹽鐵副使汴倉納糧綱概量不實操舟者坐亡失所載或杖背徒重役琰始奏選官監視謂之定計斗面積遷至尙書工部郎中卒

李宥字仲嚴唐之後裔自吳徙青遂爲青人祖成五代末以詩酒遊公卿間善摹寫山水至得意處疑非筆墨所成人欲求者先爲置酒酒酣落筆煙景萬狀世傳以爲寶父覺見儒林傳宥幼孤不好弄長讀書屬文不雜交游舉進士調火山軍判官入館校勘書籍遷集賢校理遂直院知蘄州歲凶人散委嬰孩而去者相屬于道宥令吏收取計口給穀俾營婦均養之每旬閱視所活甚衆或殺人以米十石給傭者使就獄曰我重賄吏爾必不死宥得其情論如法提點荆湖刑獄權戶部判官利州轉運使判戶部勾院知制誥糾察在京刑獄同判太常寺舊宗廟五饗輔臣攝事中廢且久止差從官宥因對力言遂復故事以諫議大夫知江寧府民有告人殺其子者曰吾子去家時巾若巾今巾是矣民自誣服宥疑召問卒伸其枉府舍火宥畏兵亂闔門不救降祕書監致仕起分司南京改太子賓客判留司御史臺卒宥性清介然與物無忤好獎拔士人外族甚貧宥有別業以券畀之旣死家無餘財官賜錢十萬

張秉字孟節歙州新安人父諤字昌言南唐祕書丞通判鄂州宋師南伐與州

將許昌裔叶議歸款太祖召見勞賜良厚授右贊善大夫蜀平選知閬州太平
與國中卽除西川轉運副使先是土人罕習舟楫取峽江中競渡者給漕運役
覆溺常十四五諤建議置威權軍分隸管勾自是無覆舟之患累遷荆湖江浙
等道制置茶鹽副使卒秉舉進士儀狀豐麗屬詞敏速善書翰太宗喜之擢寘
甲科解褐將作監丞通判宣州遷監察御史深爲宰相趙普所器以弟之子妻
之會有薦其才得知鄭州召還直昭文館遷右司諫會以趙昌言爲制置茶鹽
使秉與薛映副之入爲右計司河南西道判官俄換鹽鐵判官度支員外郎知
制誥判吏部銓知審官院唐朝故事南省首曹罕兼掌誥多退爲行內諸曹郎
至是用此制其後進改多優遷首曹遂隳舊制矣遷工部郎中依前知制誥真
宗嗣位進秩兵部郎中判昭文館時草敕用官制有頃因微累謫於遐荒之語
上覽之曰若此則是先朝失刑矣遂除秉左諫議大夫連知潁襄二州徙鳳翔
府訴以母老貧窶詔給裝錢未行改江陵丁母憂起復知河南府景德初徙河
陽換澶州車駕將幸河上又徙知滑州道出韋城秉迎謁境上俾預從官侍食

遣與齊州馬應昌濮州張晟往來河上部丁夫鑿凌以防契丹南渡召歸闕復拜吏部銓拜工部侍郎同知審官院通進銀臺司糾察在京刑獄復與周起同試東封路服勤辭學經明行脩舉人出知永興軍府會祀汾陰爲東京留守判官轉禮部侍郎加樞密直學士復知并州將行懇求御詩爲餞上爲作五言賜之徙相州九年復糾察在京刑獄暴疾卒秉典藩府無顯赫譽及再至太原臨事少斷多與賓佐博弈雖久踐中外然無儀檢好諧戲人不以宿素稱之好飭衣服潔饌具每公宴及朋友家集會多自挈肴膳而往家甚貧常質衣以給費焉

張擇行字行先青州益都人進士起家歷北海臨沂主簿自宣州觀察推官爲大理寺丞初石亭縣掾檄將陵塞決河衆或登舟以濟擇行獨以爲不可皆笑其怯旣而舟果覆擇行坐堤上董役婦卒不潰除監察御史殿中侍御史改言事御史右司諫與唐介包拯共論張堯佐除節度宣撫兩使不當語甚切又論河北兵多財不足願分兵就食內地不報遷侍御史知雜事擢天章閣待制知

諫院累遷吏部員外郎御史皆言宰相陳執中嬖妾咎小婢死外舍擇行以爲主命妾咎婢於律不當坐御史固迫之因中風不能語除戶部郎中集賢殿脩撰提舉兗州仙源縣景靈宮踰年而卒

鄭向字公明開封陳留人舉進士中甲科爲大理評事通判蔡州累遷尙書屯田員外郎知濠州徙蔡州召試集賢院未幾除三司戶部判官脩起居注遷度支員外郎爲鹽鐵判官出爲兩浙轉運副使疏潤州蒜山漕河抵于江人以爲便復爲鹽鐵判官擢知制誥同勾當三班院使契丹再遷兵部郎中提點諸司庫務以龍圖閣直學士知杭州卒五代亂亡史冊多漏失向著開皇紀三十卷撫拾遺事頗有補焉

郭稹字仲微開封祥符人世寓鄭州舉進士中甲科爲河南縣主簿除國子監直講議者以其資淺罷還河南時孫奭馮元判監事因奏稹學問通博他選莫能及乃得留居二歲陳堯咨知大名辟簽書府判官事改大理寺丞奭等復薦爲直講奭出知兗州又薦稹與賈昌朝赴中書試講說而稹固辭召試學士院

爲集賢校理馮元知河陽辟爲通判徙通判河南府入爲三司度支戶部判官累遷尙書刑部員外郎同僚起居注康定元年使契丹告用兵西鄙契丹厚禮之與同出觀獵延稹射稹一發中走兔衆皆愕視契丹主遺以所乘馬及他物甚厚旣還轉兵部知制誥判吏部流內銓擢龍圖閣直學士權知開封府暴感風眩卒稹性和易文思敏贍尤刻意於賦好用經語對頗近於諧聚古書畫不計其貲購求之婦張悍嫉無子初稹幼孤母邊更嫁王氏旣而母亡稹解官服喪知禮院宋郊言稹服喪爲過禮詔下有司博議用馮元等奏聽解官申心喪語在禮志

論曰肅之守邢以羸兵却敵開門納避難之民功在王府元方爲并州有勤留之命其宜民可知宥在蘄則活饑氓在江寧則直冤獄吏之良者歟然皆不能無小累也日嚴行簡臨政視秉擇行向稹雖無瑕可指亦皆無赫赫名詢以厚呂夷簡復致貴顯城頻坐善丁謂並遭斥謫固無足議者琰言謂奸邪不當用南郊恩牽復與唐袁高論執盧杞正相類識者韙之

趙賀字餘慶開封封邱人少時嘗喪明久之遇異醫輒愈喜飲酒至終日不亂事繼母至孝舉毛詩及第補臨朐縣主簿賀有幹才知州寇準具知賀淳化中調丁壯塞澶州決河衆多逸去獨賀全所部而歸臨朐父老張樂迎賀準使由譙門過曰旌賀之能也改大理評事鹽池吏欺緡錢選賀往解州鈎校出入賀悉得其奸契丹入寇真宗決策澶淵遣使八人省州縣賀以太子中舍安撫京東改殿中丞歷通判明州宿州徙知漢州蜀吏喜玩法而賀精明吏不敢欺事更被賀多所究詰人目爲趙家關謂如關梁不可越也召權三司戶部判官真補度支判官出爲京東轉運副使徙京西又徙益州路轉運使尋糾察在京刑獄累遷尙書工部郎中提舉諸司庫務爲江淮制置發運使發運司占隸三司軍將分部漕船舊皆由主吏自遣受賕不平或數得詣富饒郡因以商販貧者至不能堪其役賀乃籍諸州物產厚薄分劇易爲三等視其功過自裁定由是吏巧不能得施歲漕米溢常數一百七十萬蘇州太湖塘岸壞及並海支渠多湮廢水侵民田詔賀與兩浙轉運使徐奭兼領其事伐石築堤浚積潦自吳江

東赴海流民歸占者二萬六千戶歲出苗租三十萬遷刑部郎中歷三司戶部度支鹽鐵副使知延同秦三州江陵府累遷光祿卿入判大理寺以右諫議大夫知永興軍徙鄧州歲餘判宗正寺出知越州坐失舉降知濠州改廬州遷給事中復判宗正寺知鄭蔡壽三州卒在臨胸時用轉運使李中庸薦改官中庸沒無子賀爲主葬圖其象歲時祀于家子宗道終集賢校理

高覲字會之宿州蘄人進士起家爲嘉興縣主簿後以孫奭薦改祕書省著作佐郎累遷尙書屯田員外郎通判泗州詔定淮南場茶法覲陳說利害不報擢提點利州路刑獄召爲三司戶部判官安撫河北還爲京西轉運使徙益州彭州廣積麗水二峽地出金宦者挾富人請置場募人夫採取之覲曰聚衆山谷間與夷獠雜處非遠方所宜且得不償失奏罷之王蒙正恃章獻太后親多占田嘉州詔勿收賦覲又極論其不可坐失察嘉州守張約受賕貶通判杭州徙知福州入爲三司鹽鐵判官歷陝西河北轉運使累遷兵部郎中復入戶部爲鹽鐵副使遷右諫議大夫河東都轉運使加集賢院學士判尙書刑部進給事

中知單州卒子秉常爲梓州路轉運使

袁抗字立之洪州南昌人舉進士得同學究出身調陽朔縣主簿薦補桂州司法參軍撫水蠻寇融州轉運使俞獻可檄抗權融州推官督兵糧與謀軍事蠻治舟且至抗卽楊梅石門兩隘建水柵二據其衝賊不得入後因置戍不廢事平特遷衡州推官改大理寺丞累遷國子博士知南安軍擢提點廣南東路刑獄浙東叛卒鄂鄰鈔閩越轉南海與廣州兵逆戰海中值大風有告鄰溺死者抗獨曰是日風勢趣占城鄰未必死後果得鄰於占城還爲度支三司判官以尙書金部員外郎爲梓州路轉運使徙益州路時三司歲市上供綾錦鹿胎萬三千匹抗言蜀民困憊願少紓其力以備秦中他日之用是年郊祀蠲其數之半黎州歲售蠻馬詔擇不任戰者卻之抗奏朝廷與蠻夷互市非所以取利也金山前後五部落仰此爲衣食一旦失利侵侮不知費直幾馬也臣念蜀久安不敢奉詔尋如舊制除江淮發運使召爲三司鹽鐵副使時抗老矣爲御史所劾罷知宣州累遷光祿少卿分司南京明堂覃恩改少府監卒抗喜藏書至萬

卷江西士大夫家鮮及也抗子陟少刻厲好學善爲詩終殿中丞

徐起字豫之濮州鄆城人舉進士試祕書省校書郎知隰川縣積官尙書都官員外知楚州樞密直學士張宗象薦之擢提點廣南西路刑獄入判三司開拆司歷開封三司度支判官館伴契丹使還奏所過州縣使官旣去官吏將校皆出郊旅賀燕飲久之城邑爲之空乃下約束禁止之出爲荆湖北路轉運使部有戍卒殺人繫獄其徒欲劫之起聞亟往按誅之分其徒隸他州徙江西知徐州就爲轉運使募富室得米十七萬斛賑餓殍又移粟以贍河北京西者凡三百萬與安撫使劉夔不相能徙京西又徙江東起請開長淮舊浦以便漕運知洪州徙兗州有都巡檢虐所部而部兵百餘人持兵至庭下州人大恐起不爲動以禍福開諭之衆感泣聽命因按致其首奏罷都巡檢復爲度支判官累遷祕書監知湖州卒

張旨字仲微懷州河內人父延嘉頗讀書不願仕州上其行賜號嵩山處士旨進保定軍司法參軍上書轉運使鍾離瑾願補一縣尉捕劇賊以自効瑾壯其

請爲奏徙安平尉前後捕盜三百餘人嘗與賊鬪流矢中臂不顧猶手殺數十人擢試祕書省校書郎知遂城縣遷著作佐郎明道中淮南饑自詣宰相陳揅荒之策命知安豐縣大募富民輸粟以給餓者旣而浚潁河三十里疏泄支流注芍陂爲斗門溉田數萬頃外築堤以備水患再遷太常博士知尉氏縣徙通判忻州元昊反特遷尙書屯田員外郎通判府州州依山無外城旨將築之州將曰吾州據險敵必不來旨不聽城垂就寇大至乃聯巨木補其罅守以強弩中外不相聞者累日人心震恐庫有雜綵數千段旨矯詔賜築城卒卒皆東望呼萬歲賊疑以救至也州無井民取河水以飲賊斷其路旨夜開門率兵擊賊小卻以官軍壁兩傍使民出汲復以渠泥覆積草賊望見以爲水有餘督居民乘城力戰賊死傷者衆隨解去以功遷都官員外郎徙知萊州葉清臣舉材堪將帥召對改知邢州擢提點河東路刑獄范仲淹歐陽脩復言其驚武有謀略除閣門使固辭進工部郎中知鳳翔府加直史館知梓州以直龍圖閣知荆南入判尙書刑部累遷光祿卿知潞晉二州以老疾權判西京御史臺尋卒

齊廓字公闢越州會稽人舉進士第自梧州推官累遷太常博士知審刑詳議官知通泰州提點荆湖南路刑獄潭州鞫繫囚七人爲強盜當論死廓訊得其狀非強付州使劾正乃悉免死平陽縣自馬氏時稅民丁錢歲輸銀三萬八千兩民生子至壯不敢束髮廓奏蠲除之歷三司度支開封府判官出爲江淮西南轉運使時初兼按察同時奉使者競爲苛刻邀聲名獨廓奉法如平時人以爲長厚入判鹽鐵勾院加史館知荆南府徙明舒湖三州積官光祿卿直祕閣以疾分司南京改祕書監卒廓寬柔恭謹人犯之不校弟唐爲吉州司理參軍博覽強記嘗舉賢良方正對策入等越州蔣堂奏廓及唐父母垂老窮居鄉里二子委而之官唐復久不歸省於是罷唐令歸侍養廓方使湖南雖置不問然士論薄之

鄭驤字士龍河南人登進士第更慶汝鄭秦州推官改祕書省著作郎知垣曲縣康繼英辟僉書衛州判官事劉從德代繼英又表驤有善狀進一官尋監左藏庫遷太常博士知乾州提點益州路刑獄爲三司度支判官建言蜀人引江

水漑田率有禁歲旱利不均宜弛其禁又言京西旱舊禁粟無出國門可且勿禁慶曆中與魚周詢刺陝西民兵十餘萬除陝西轉運按察使兼三門發運使加直史館河北轉運使入爲度支副使河決德州入王紀口議欲徙州詔驥往視之還言州不當徙已而州果無患又爲河北轉運使王則反討平之除天章閣待制知鳳翔府先是皇甫泌夏安期皆爲轉運使泌先謫去安期後至不及賞驥固辭不受願命推功與二人復爲河北都轉運使累遷尙書工部郎中以疾知華州卒

論曰歷觀數子風跡雖不同其爲政愛民謙己利物有古道焉若旨浚渾河覲罷採金抗論互市起賑窮戢暴驥推功與人皆無所愧矣趙賀不忘李中庸而齊廓兄弟棄親以徇榮用心何其不同哉

宋史卷三百二

元中書右丞相國總之裁脫脫等修

列傳第六十一

王臻

魚周詢

賈黯

李京

吳鼎臣附

呂景初 馬遵附

吳及

范師道

李絢

何中立

沈邈

王臻字及之潁州汝陰人始就學能文辭曾致堯知壽州有詩名臻以文數十篇往見致堯覽之歎曰潁汝固多奇士舉進士第為大理評事歷知舒城與會昌縣通判徐定二州以殿中丞知兗州特遷監察御史中使就營景靈宮太極觀臻佐助工費有勞遷殿中侍御史擢淮南轉運副使時發運司建議濬淮南漕渠廢諸堰臻言揚州召伯堰實謝安為之人思其功以比召伯不可廢也濬渠亦無所益召為三司度支判官而發運司卒濬渠以通漕臻坐前異議降監察御史知睦州道復官徙福州閩人欲報仇或先食野葛而後趨仇家求鬪即

宋

史

卷三百二

列傳

中華書局聚

死其處以誣仇人臻辨察格鬪狀被誣者往往釋去俗爲之少變又民間數以火訛相驚悉捕首惡杖之流海上民乃定仁宗卽位遷提舉在京諸司庫務歷三司戶部度支副使擢龍圖閣待制權知開封府累遷尙書工部郎中姦人僞爲皇城司刺事卒嚇良民以取賕臻購得其主名黥竄三十餘人都下肅然以右諫議大夫權御史中丞建言三司開封府諸曹參軍及赤縣丞尉率用貴游子弟驕惰不習事請易以孤寒登第更仕宦書考無過者爲之又言在京百司吏人入官請如長定格歸司三年皆可其奏未幾卒臻剛嚴善決事所至有風跡

魚周詢字裕之開封雍邱人早孤好學舉進士中第爲大理評事歷知南華分宜靜海三縣遷太常博士通判漢州城中夜有火部衆掠之植劍於前曰攘一物者斬火止民無所失亡以尙書屯田員外郎知真州徙提點荆湖南路刑獄求便郡知安州徙蔡州召爲侍御史陝西用兵科斂煩數命安撫京西路還賜緋衣銀魚爲開封府判官又使陝西刺民兵判三司理欠憑由司進起居舍人

知諫院固辭乃以尙書戶部員外郎兼侍御史知雜事爲三司鹽鐵副使時渭州城水洛尹洙鄭戩爭未決詔周詢與都轉運使程戡相利害周詢是戡議遂城之遷吏部員外郎擢天章閣待制知成德軍徙河北都轉運使拜右諫議大夫權御史中丞慶曆八年手詔近臣訪天下之務周詢對曰陛下患西陲禦備天下繹騷趣募兵士急調軍食雖常賦有增而經用不足臣以謂唐季及五代疆臣專地中國所制疆域非廣及祖宗有天下俘吳楚蜀晉北捍禦鬻中服羌戎所用甲兵所入租賦比之于今其數尙寡然而摧堅震敵庫府無空虛之弊縣官無煩費之勞蓋賞信罰必將選兵精之效也近元昊背惠西方宿師朝廷用空疎闡茸者爲偏裨以游惰怯懦者備行伍故大舉卽大敗小戰輒小奔徒日費千金度支不給賣官鬻爵滄雜仕流以鐵爲錢隳壞國法而又官立鹽禁驅民齋輦蕩析恆產怨咨盈路去秋水旱繼作今春饑饉相屬生靈重困於茲爲劇今元昊幼子新立乃朝廷寬財用惜民力之時也速宜經度以紓匱乏願委安撫使與本路守邊掌計臣僚同議裁減冗兵節抑浮費禁止橫斂廩假貧

民去武臣之庸懦出守宰之貪殘仍冀特發宸衷出內帑錢助關陝費使通鹽商之利改錢幣之法宣布德澤與民休息然後勸勉農桑隱括稅籍收遺利抑兼并則公有羨財私有餘力矣陛下患承平寢久仕進多門人污政濫員多闕少滋長奔競糜費廩祿臣以爲國家於制舉進士明經之外復有任子流外之補負瑕釁服輿臺者亦寘班列歷年旣久紛猥塞路求人任事適用者鮮而又亟更數易交錯道塗額置有常詔除無限凡守一闕動踰再期預閫籍服武弁者坐費水衡之給虛計歲攷之期赴銓調守選格者居多困乏之數行寡廉恥之風官冗之弊一至於此願陛下特詔進士先取策論諸科兼通經義中第解褐無令過多其文武班奏薦并流外出官者權停五七年自然名器不濫奔競衰息矣陛下患牧守之職罕聞奏最臣聞漢宣帝勉勵二千石其有治效者增秩賜金或爵至關內侯公卿缺則以次用之故良吏爲盛國家鑒諸侯專地之患一切用郡守治之而班行寢冗序遷者衆乃有地處蕃宣秩爲卿監而未歷省府提轉則爲沉抑內重外輕何以求治改絃易轍正在此時願詔兩府大臣

選委兩制臺諫官參舉如兩任通判可充知州軍京朝官依次除補若治狀尤異卽升省府提轉其常例入知州者一切停罷則進擢得人牧守重矣陛下患將帥之任艱於稱職臣聞晏子薦司馬穰苴曰文能附衆武能威敵是知將帥之材非文武兼備則不可爲我朝自二邊款附久不用兵近歲有西北之警補授帥臣出於遽猝非自卒伍卽恩澤侯無信義以結士心無莊嚴以正師律退則奔北進則被擒虧損威靈取侮夷狄命將之失未有若今之甚也願擇名臣選舉深博有謀知兵練武之士不限資級試以邊任臨軒敦遣假以威權如祖宗朝任郭進李漢超輩閩外之事俾得專之無以謗讒輕有遷徙使其足以取重則安有不稱職之憂乎陛下患西北多故邊情罔測獻奇譎空言者多陳悠久實效者少備豫不虞理當先物臣聞國家和約北戎爵命西夏偃革止戈踰四十載而守邊多任庸人不嚴武備因循姑息爲敵所窺致元昊悖逆耶律張皇未免屈己爲民息兵講好皆用苟安之謀而無經遠之策此班固所謂不選武略之臣恃吾所以待寇而行貨賂割剝百姓以奉寇讎者也願陛下特議減

三路兵馬之驚冗者以紓經費以息科斂然後選將帥擇偏裨使戢肅驕兵飭利戎器識山川形勝用兵奇正河朔曠平可施車陣亦宜講求其法雖二邊異時侵軼恃吾有以待之庶幾無患矣時執政及近臣所對多疎闊仁宗頗嘉周詢詳敏知恩州張得一誅坐失舉出知永興軍數日改知成德軍未行卒帝嗟悼之特贈尚書工部侍郎周詢性和易聞見該洽明吏事在安州時園吏見大蛇垂蘭楯卽視之乃周詢醉而假寐世傳其異

賈黯字直孺鄧州穰人擢進士第一起家將作監丞通判襄州還爲祕書省著作佐郎直集賢院遷左正言判三司開拆司黯自以年少遭遇備位諫官果於言事首論韓琦富弼范仲淹可大用杜樞覆張彥方獄將駁正忤執政意執政以他罪絀樞黯言樞無罪且旨從中出不因臣下彈奏恐自此貴幸近習言一得入則將陰肆讒毀害及善良不可不察時言者或論事亡狀輒戒勵窮詰黯奏諫官御史跡旣疎遠未嘗預聞時政不免採於傳聞一有失言而詰難沮辱隨之非所以開廣言路請如唐太宗用王珪魏徵故事每執政奏事聽諫官一

人隨入執政又患言事官旅進論議上前不肯止乃詔凡欲合班上殿者皆稟中書俟旨黯論以爲今得進見言事者獨諫官御史若然言路將壅陛下不得聞外事矣請如故便皆弗許儂智高反余靖知桂州楊旼安撫廣南東西路皆許便宜行事黯言二人臨事指蹤不一則下將無所適從又靖專節制西路若賊東嚮則非靖所統無以使衆不若并付靖經制兩路從之皇祐四年同脩起居注徙判鹽鐵勾院遷左司諫建言天下復置義倉下其說諸路而論者不一黯亦反復辨析卒不果行宰相劉沆請中外薦舉陳乞一切以詔令從事每用例論者以爲非便黯奏罷之狄青除樞密副使黯言國初武臣宿將扶建大業平定列國有忠勳者不可勝數然未有以卒伍登帷幄不報會靈觀災又言天之意所欲廢當罷營繕赦守衛者罪以示儆懼脩省之意擢知制誥初仁宗視事退御邇英閣召侍臣講讀而脩起居注官獨先出黯言君臣訪對動關政體而史臣不得預聞請并召侍經筵許之初邇英延義二閣講讀官自有記注至是乃罷焉直龍圖閣錢延年擢天章閣待制黯當命辭卽詆延年不才不宜污

侍從封詞目還中書命遂寢判吏部流內銓益州推官乘澤父留鄉里死三年矣澤爲弗知者而調京師旣覺而去黯奏劾廢終身福州推官劉抃挾數術言人禍福多遊公卿門黯奏以爲靈臺郎時詔兩制兩省官唯公事許至中書樞密院見執政羣臣心知其非而嫌於自言後黯知許州乃言他官皆得見執政而侍從近臣反疎斥疑間如此嘗聞先朝用王禹偁請百官候謁宰相並於政事堂樞密使亦須聚坐接見以防請託令下左正言謝泌上書以謂非人主推赤心待大臣大臣展四體報人主之誼卽時追寢前詔徙襄州迎父之官而父有故人在部中遣直廳卒致問黯輒答卒父恚一夕歸鄉里他日疾且亟黯內懷不自安請徙郡及解官就養不報乃棄官去而御史吳中復等劾黯輒委州印撓朝廷法絀知郢州未及任父死服除勾當三班院爲翰林學士唐介等坐言陳升之不當柄用皆外補黯奏介等敢言請寬之以疾請郡改侍讀學士知鄧州未行疾愈復以爲翰林學士知審官院時官吏有以祖父嫌名援律爲請授他官黯言禮不諱嫌名二名不偏諱律府號官稱犯祖父名而冒榮居之又

上書若奏事犯祖廟諱罪皆有差又曰若嫌名及二名偏犯者不坐今官吏許避嫌名則或有如此而不自言者可坐以冒榮之律乎國朝雍熙中嘗詔除官犯私諱者三省御史臺五品文班四品以上許用式奏改餘不在此制請約雍熙詔書自某品而上以禮律從事詔非嫌名及二名不以品秩高下皆聽避累遷尚書左司郎中權知開封府兩軍獄囚歲瘐死者衆而吏不任其責黯言吏或怠於視囚饑渴疾病因以致死請歲計死者多少而賞罰之府吏額七百人以罪廢復敘者皆數外補之黯請敘者須有闕乃補然所斷治或出己見人不以爲允御史中丞王疇與其屬陳經呂誨傅堯俞諫官司馬光龔鼎臣王陶皆言黯剛愎自任赦書下府罪應釋者反重刑之罷爲同提舉在京諸司庫務英宗卽位遷中書舍人受詔撰仁宗實錄權知審刑院爲羣牧使時封拜皇子並除檢校太傅黯言太師太傅太保是爲三師天子之所師法子爲父師於義不可蓋前世因循弗思之過請自今皇子及宗室屬卑者皆毋兼師傅官隨其遷序改授三公下兩制議請如黯奏而中書亦謂自唐以來親王無兼師傅者國

朝以三師三公皆虛名故因而授之宜正其失詔可遷給事中權御史中丞未幾以呂誨知雜事誨嘗彈治黯逡巡引避黯言嘗薦誨爲御史知其方正謹厚一時公言非有嫌怨願終與共事誨乃就職時帝初卽位王廣淵周孟陽以藩邸之舊數召對黯言俊又滿朝未有一被召者獨親近一二舊人示天下以不廣請如太宗故事召侍從館閣之臣以備顧問帝嘗從容謂黯曰朕欲用人少可任者黯對天下未嘗乏人顧所用如何爾退而上五事一知人之明二養育以漸三材不求備四以類薦舉五擇取自代後與兩制合議請以濮王爲皇伯執政弗從數詣中書爭論會大雨水時黯已被疾疏言簡宗室逆天時則水不潤下今二三執政知陛下爲先帝後乃阿諛容說違背經義建兩統貳父之說故七廟神靈震怒天降雨水流殺人民旣病求出以翰林侍讀學士知陳州未行卒年四十四口占遺奏數百言猶以濮王議爲請贈尙書禮部侍郎初黯母陳歸宗繼母史在堂後迎陳歸二母不相善黯能安以事之黯脩潔自喜在朝數言事或從或否人稱其介直然卞急初通判襄州疑優人戲己以人齒噉之

在開封爲罪人所詈又噉以人齒言者亦以是詆之

李京字伯升趙州人進士中第歷平定軍判官冀州推官改大理寺丞知魏縣奉法嚴正吏不便欲以奇中京遂相率遁去監司果議以苛刻斥京知府任布曰如此適墮吏計中京賴以免徙永昌縣通判趙州王拱辰薦爲監察御史裏行遷監察御史時太史言日當食不食羣臣皆賀京上疏曰陛下因天之戒恐懼脩省避正殿減常膳故精意感格日當食而陰雲蔽虧雖宋景公之熒惑退舍商太戊之桑穀並枯無以異也然臣區區竊有所疑者自寶元初定襄地震壞城郭覆廬舍壓死者以數萬人殆今十年震動不已豈非西北二邊有窺中國之意乎二月雷發聲在易爲豫言萬物出地皆悅豫也八月收聲在易爲歸妹言雷聲入地避羣陰之害也今孟夏雷未發聲豈非號令不信乎願陛下飭邊臣備夷狄戒輔臣慎出命以厭禍于未形又尙美人棄外館多年比聞復召入臣慮假媚道以爲蠱惑宜亟絕之苗繼宗嬪御子弟乃緣恩私爲府界提點宜割帷薄之愛重名器之分庶幾不累聖政仁宗嘉納授右正言直集賢院同

管勾國子監加史館修撰數上書論事宰相賈昌朝不悅京嘗屬侍御史吳鼎臣薦推直官李實鼎臣希昌朝意以告中丞高若訥若訥爲鼎臣上京簡謫京太常博士監鄂州稅旣至引令狐峘錢徽事言臣爲御史諫官首尾五年凡六上章四親對自陳疾故懇求外補臣之出處粗有本末向者在臺見入閣圖三院御史立班各異聞元日將入閣而御史王贄何郟皆謁告歸會推直官李實歲將滿因簡鼎臣宜留實補御史鼎臣亦謂議協公望不意逾兩月乃誣臣與實爲朋黨臣初被黜閱諸橐中鼎臣所遺私書別紙故在臣令男謹亟悉焚毀臣與實僚友鼎臣鄉曲之舊鼎臣爲御史臣延譽推引實有力焉待之不疑因以誠告豈謂傾險包藏甘爲鷹犬惟陛下察之未幾卒官詔錄謀爲郊社齋郎鼎臣棣州人旣逐京會昌朝罷夏竦自北京召爲相鼎臣先論竦在并州杖殺私僕復與諫官御史言竦論議與陳執中異不可共事竦旣罷遂以刑部員外郎知諫院上言朝廷方與契丹保誓約而揚懷敏增廣塘水輒生事民或怨叛雖斬懷敏無及矣遂爲河北體量安撫令經度塘水利害而鼎臣更顧望依違

不能決昌朝與都轉運使施昌言議河事不合鼎臣自度支副使拜天章閣待制代昌言數月卒

呂景初字沖之開封酸棗人以父蔭試祕書省校書郎舉進士歷汝州推官改著作佐郎知夏陽縣僉書河南府判官通判并州高若訥薦爲殿中侍御史張貴妃薨有司請依荆王故事輟視朝五日或欲更增日聽上裁乃增至七日景初言妃一品當輟朝三日禮官希旨使恩禮過荆王不可以示天下妃旣追冊爲皇后又詔立忌景初力爭乃罷時兵冗用度乏景初奏疏曰聖人在上不能無災而有救災之術今百姓困窮國用虛竭利源已盡惟有減用度爾用度之廣無如養兵比年招置太多未加揀汰若兵皆勇健能捍寇敵竭民膏血以啗之猶爲不可況羸疾老怯者又常過半徒費粟帛戰則先奔致勇者亦相牽以敗當祖宗時四方割據中國纔百餘州民力未完耕植未廣然用度充足者兵少故也而所征皆克自數十年來用數倍之兵所嚮必敗以此知兵在精不在衆也議者屢以爲言陛下不卽更者由大臣媮安避怨論事之臣又復緘默則

此弊何時而息望詔中書樞密院議罷招補而汰冗濫又言坐而論道者三公也今輔臣奏事非留身求罷免未嘗從容獨見以評講治道雖願治如堯舜得賢如稷契而未至於治者抑由此也願陛下於輔臣侍從臺諫之列擇其忠信通治道者屢詔而數訪之幸甚又與言事御史馬遵吳中復奏彈梁適與劉宗孟連姻而宗孟與冀州富人共商販下開封府劾治所言不實皆坐謫景初通判江寧府徙知衡州復召還臺嘉祐初大雨水景初曰此陰盛陽微之誠也乃上疏稱商周之盛並建同姓兩漢皇子多封大國有唐宗室出爲刺史國朝二宗相繼尹京是欲本支盛強有磐石之安則奸雄不敢內窺而天下有所倚望矣願擇宗子之賢者使得問安侍膳於宮中以消奸萌或尹京典郡爲夾輔之勢時狄青爲樞密使得士卒心議者憂其爲變景初奏疏曰天象謫見妖人訛言權臣有虛聲爲兵衆所附中外爲之恟恟此機會之際間不容髮蓋以未立皇子社稷有此大憂惟陛下蚤爲之計則人心不搖國本固矣數請中書白執政請出青文彥博以青忠謹有素外言皆小人爲之不足置意景初曰青雖忠

如衆心何蓋爲小人無識則或以致變大臣宜爲朝廷慮毋牽閭里恩也知制誥劉敞亦論之甚力卒出青知陳州李仲昌以河事敗內遣中人置獄景初意賈昌朝爲之卽言事無根原不出政府恐陰邪用此以中傷善良乃更遣御史同訊遷右司諫安撫河北還奏比部員外郎鄭平占籍真定有田七百餘頃因請均其徭役著限田令以戶部員外郎兼侍御史知雜事判都水監改度支副使遷吏部員外郎擢天章閣待制知諫院以病未入謝而卒

馬遵者字仲塗饒州樂平人嘗以監察御史爲江淮發運判官就遷殿中侍御史爲副使入爲言事御史謫知宣州後復爲右司諫以禮部員外郎兼侍御史知雜事改吏部直龍圖閣卒性樂易善議論其言事不爲激訐故多見推行杜衍范仲淹皆稱道之

吳及字幾道通州靜海人年十七以進士起家爲侯官尉閩俗多自毒死以誣仇家官司莫能辨及悉爲讞正前後活五十三人提點刑獄移其法於一路辟大理寺檢法官徙審刑院詳議累遷太常博士是時仁宗春秋旣高無子及因

推言闈寺以及繼嗣事至和元年上疏曰臣聞官師相規工執藝事以諫臣幸
得待罪法吏輒原刑法之本以効愚忠切惟前世肉刑之設斷支體刻肌膚使
終身不息漢文感緹縈之言易之鞭箠然已死而笞未止外有輕刑之意其實
殺人祖宗鑒既往之弊蠲除煩苛始用折杖之法新天下耳目茲蓋曠古聖賢
思所未至陛下深惻民隱親覽庶獄歷世用刑無如本朝之平恕宜乎天降之
祥而方當隆盛之時未享繼嗣之慶臣竊惑焉或者宦官太多而陛下未悟也
何則肉刑之五一曰宮古人除之重絕人之世今則宦官之家競求他子勦絕
人理希求爵命童幼何罪陷於刀鋸因而夭死者未易悉數夫有疾而天治世
所羞況無疾乎有罪而宮前王不忍況無罪乎臣聞漢永平之際中常侍四員
小黃門十人爾唐太宗定制無得踰百員且以祖宗近事較之祖宗時宦官凡
幾何人今凡幾何人臣愚以謂胎卵傷而鳳凰不至宦官多而繼嗣未育也伏
望順陽春生育之令濬發德音詳爲條禁進獻宦官一切權寵擅宮童幼實以
重法若然則天心必應聖嗣必廣召福祥安宗廟之策無先於此書奏帝異其

言欲用爲諫官而及以父憂去嘉祐三年始擢祕閣校理踰月改右正言復上
疏曰帝王之治必敦骨肉之愛而以至親夾輔王室詩曰懷德惟寧宗子惟城
故同姓者國家之屏翰儲副者天下之根本陛下以海宇之廣宗廟之重而根
本未立四方無所係心上下之憂無大於此謂宜發自聖斷擇宗室子以備儲
副以服屬議之則莫如親以人望言之則莫如賢既兼親賢然後優封爵以寵
異之選重厚樸茂之臣以教導之聽入侍禁中示欲爲後使中外之人悚然瞻
望曰宮中有子矣陛下他日有嫡嗣則異其恩禮復令歸邸於理無嫌於義爲
順弭覬覦之心屬天下之望宗廟長久之策也既而又言開寶詔書內侍臣年
三十無養父者聽養一子爲嗣并以各上宣徽院違者抵死比年此禁益弛天
絕人理陰累聖嗣願詔大臣明示舊制上順天意以綏福祐明年遂權罷內臣
進養子管勾登聞檢院又上書論政事謂倉廩空虛內外匱乏其弊在於官多
兵冗請汰冗兵省冗官然後除民之疾苦因條上十餘事多施用之建請擇館
職分校館閣書并求遺書於天下語在藝文志明年日食三朝及言日食者陰

侵陽之戒在人事則臣陵君妻乘夫四夷侵中國今大臣無姑息之政非所謂臣陵君失在陛下淵默臨朝使陰邪未盡屏也后妃無權橫之家非所謂妻乘夫失在左右親倖驕縱亡節也疆場無虞非所謂四夷侵中國失在將帥非其人爲敵所輕也因言孫沔在并州苛暴不法燕飲無度龐籍前在并州輕動寡謀輒興堡砦屈野之岷爲國深恥沔繇此坐廢又言春秋有告糴陛下恩施動植視人如傷然州郡官司各專其民擅造閉糴之令一路饑則鄰路爲之閉糴一郡饑則鄰郡爲之閉糴夫二千石以上所宜同國休戚而坐視流離豈聖朝子育兆民之意哉遂詔鄰州鄰路災傷而輒閉糴論如違制律久之還右司諫管勾國子監在職數年以勁正稱遇事無小大輒言嘗請毋納羣臣上尊號出後宮私身及非執事人毋以御寶白劄子賜近侍家人冠帔及比邱尼紫衣并責執政大臣因循苟簡畏避怨謗宜用唐李吉甫故事選拔賢俊約杜預遺法旌擢守令復置將作監官屬專領營造論入內都知任守忠陵轅駙馬都尉李璋及干求內降會諫官陳升之建請裁節班行補授下兩制臺諫官集議主鐵

冶者舊得補班行至是議罷之既定藁及與御史沈起輒增注與國軍磁湖鐵冶如舊制主磁湖冶者大姓程叔良也翰林學士胡宿等卽劾及與起職在臺諫而爲程氏經營占錮恩例請詔問狀皆引伏及出爲工部員外郎知廬州進戶部直昭文館知桂州卒錄其弟齊爲太廟齋郎及當官有守初爲檢法官三司請重鑄鐵錢法至死下有司議及爭不可主者恚曰立天下法當由一檢法邪及曰義理爲先安有高下卒不爲詘

范師道字貫之蘇州長洲人進士及第爲撫州判官後知廣德縣縣有張王廟民歲祠神殺牛數千師道禁絕之通判許州累遷都官員外郎吳育舉爲御史奏請罷內降推恩擇宰相久其任選宗室賢者養宮中備儲貳初皇祐中賈昌朝上議置五輔郡設京畿轉運使提點刑獄號爲拱輔京師而論者謂宦官謀廣親事親從兵欲取京畿財賦贍之因以收事柄師道力奏非便遂復舊制又以四年貢舉士苦淹久請易爲三年宰相劉沆護葬温成皇后禮官議稱陵師道以爲非典制數疏爭沆惡之引著令臺官滿二年當補外出知常州臺諫官

共言師道不當去不報徙廣南東路轉運使舊補攝官皆委吏胥無先後遠近之差師道爲置籍次第之召爲鹽鐵判官道改兩浙轉運使遷起居舍人同知諫院管勾國子監後宮周氏董氏生公主諸閹女御多遷擢師道上疏曰禮以制情義以奪愛常人之所難惟聰明睿哲之主然後能之近以宮人數多而出之此盛德事也然而事有係風化治亂之大而未以留意臣敢爲陛下言之竊聞諸閹女御以周董育公主御寶白劄並爲才人不自中書出誥而掖庭覬覦遷拜者甚多周董之遷可矣女御何名而遷乎才人品秩既高古有定員唐制止七人而已祖宗朝宮闈給侍不過二三百居五品之列者無幾若使諸閹皆遷則不復更有員數矣外人不能詳知止謂陛下於寵幸太過恩澤不節耳夫婦人女子與小人之性同寵幸太過則瀆慢之心生恩澤不節則無厭之怨起御之不可不以其道也且用度太煩須索太廣一才人之奉月直中戶百家之賦歲時賜予不在焉況誥命之出不自有司豈盛時之事耶恐斜封墨勅復見於今日矣時大星隕東南有聲如雷又上疏曰漢晉天文志天狗所下爲破軍

殺將伏尸流血甘氏圖天狗移大賊起今朝廷非無爲之時也而備邊防盜未見其至雖有將帥不老則愚士卒雖多勁勇者少小人思亂伺隙乃作必有包藏險心投隙而動者宜揀拔將帥訓練卒伍詔天下預爲備禦仁宗晚年尤恭儉而四方無事師道言雖過每優容之遷兵部員外郎兼侍御史知雜事判都水監與諫官御史數奏樞密副使陳升之不當用升之罷師道亦出知福州頃之以工部郎中入爲三司鹽鐵副使感風眩遷戶部直龍圖閣知明州卒師道勵風操前後在言責有聞卽言或獨爭或列奏如陳執中家人殺婢卒坐免奪王拱辰宣徽使李淑翰林學士及王德用程戡領樞密宦官石全彬閻士良升進皆嘗奏數其罪焉

李絢字公素邛州依政人少放蕩亡檢兄絢教之書嚴其課業而出絢遨自若比暮絢歸絢徐取書視之一過輒誦數千言絢奇之稍長能屬文尤工歌詩嘗以事被繫旣而逸去擢進士第再授大理評事通判邠州元昊犯延州並邊皆恐邠城障不完絢方攝守卽發民治城僚吏皆謂當言上遲報絢不聽帝聞之

喜因詔他州悉治守備還爲太子中允直集賢院歷開封府推官三司度支判官爲京西轉運使是時范雍知河南王舉正知許州任中師知陳州任布知河陽並二府舊臣絢皆以不才奏之未幾召脩起居注糾察在京刑獄時宰相杜衍各拔知名士實臺省惡衍者指絢爲其黨絢嘗舉陸經經坐贓貶而任布又言絢在京西苛察出知潤州改太常丞徙洪州時五溪蠻寇湖南擇轉運使帝曰有館職善飲酒者爲誰今安在輔臣未諭帝曰是往歲城邠州者其人才可用輔臣以絢對遂除湖南轉運使絢乘驛至邵州戒諸部按兵毋得動使人諭蠻以禍福蠻罷兵受約束復脩起居注權判三司鹽鐵勾院復糾察在京刑獄以右正言知制誥奉使契丹知審官院遷龍圖閣直學士起居舍人權知開封府治有能名絢夜醉晨奏事酒未解帝曰開封府事劇豈可沉湎於酒邪改提舉在京諸司庫務權判吏部流內銓初慈孝寺亡章獻太后神御物盜得而絢誤釋之詘知蘇州未行卒絢疎明樂易少周遊四方頗練世務數上書言便宜仁宗春秋高未有繼嗣絢因祀高禱還獻賦大旨言宜遠嬖寵近賢良則神降

之福子孫繁衍帝嘉納之性嗜酒終以疾死

何中立字公南許州長社人幼警邁與狄遵度遊遵度曰美才也其父裴遂以女妻之進士及第授大理評事歷僉書鎮安武勝二鎮節度判官遷殿中丞召試學士院爲集賢校理改太常博士修起居注遷祠部員外郎知制誥權發遣開封府事初有盜慈孝寺章獻皇太后神御服器者旣就繫李絢以屬吏考掠不得其情輒釋去中立至人復執以來中立曰此真盜也窮治之卒伏罪遷兵部員外郎糾察在京刑獄除龍圖閣直學士知秦州言者以爲非治邊才改慶州奏曰臣不堪於秦則不堪於慶矣願守汝不報戍卒有告大校受贓者中立曰是必挾他怨也鞭卒竄之或曰貸姦可乎中立曰部曲得持短長以制其上則人不自安矣還判太常寺遷刑部郎中進樞密直學士知許州改陳州訛言大水至居人皆恐中立捕誅之又徙杭州暴中風卒中立頗以文詞自喜然嗜酒無行慶曆中集賢校理蘇舜欽監進奏院爲賽神會預者皆一時知名士中立亦在召中已而辭不往後舜欽等得罪中立有力焉

沈邈字子山信州弋陽人進士及第起家補大理評事知侯官縣通判廣州累遷都官員外郎歷知真州福州慶曆初爲侍御史時呂夷簡罷相輔臣皆進官邈言爵祿所以勸臣下非功而授則爲濫今邊鄙屢警未聞廟堂之謀有以折外侮無名進秩臣下何勸焉又論夏竦除樞密使而竦陰交內侍劉從愿使從愿內濟狡譎竦外專機務姦黨得計人主之權去矣其言甚切權鹽鐵判官轉兵部員外郎時選諸路轉運加按察使邈與張昷之王素首被選邈加直史館使京東歲餘入爲侍御史知雜事未幾擢天章閣待制知澶州徙河北都轉運使又徙陝西歲中加刑部郎中知延州卒邈疎爽有治才然性少檢在廣州時歲遊劉王山會賓友縱酒而與閩里婦女笑言無間

論曰慶曆以來任諫官御史各有風采見推於時者繇臻京之輩凡數十人觀其所陳蓋不虛得及之論闈宦真仁人之言其最優乎絢中立邈亦有美才致位通顯然皆以酒失自累故不能無貶焉

宋史卷三百三

元中書右丞相總裁脫脫等修

列傳第六十二

張昱之

魏瓘第璠

滕宗諒劉越附

李防

趙湘

唐肅子詢

張述

黃震

胡順之

陳貫子安石

范祥子育

田京

張昱之字景山父祕自有傳昱之進士及第補樂清尉潤州觀察推官校勘館閣書籍遷集賢校理通判常州知温州蔡齊薦其材可用擢提點淮南南路刑獄楊崇勳知亳州恃恩為不法誣蒙城知縣王申罪械送獄昱之廉得冤狀乃出申配姦吏若干人徙廣南東路轉運使夷人有犯其酋長得自治而多慘酷請一以漢法從事權度支判官為京西轉運使加直史館徙河北被邊諸州發卒斬西山木卒逃入契丹者歲數百人敵既利其所開地又得亡卒故不爭昱之戒斬伐毋得深入北地卒亦不敢逃還為鹽鐵副使擢天章閣待制河北都轉

運按察使保州廣信安肅軍自五代以來別領兵萬人號緣邊都巡檢司亦曰策先鋒以知州軍爲使置副二人分所領卒爲三部使援隣道太祖嘗用之有功詔每出巡別給糧錢以優之其後州將不復出內侍爲副數出巡部卒偏得廩賜軍中以爲不均通判保州石待舉言於昱之請合三部兵更出入季一出卽別給錢糧餘悉罷仍請以武臣代內侍時楊懷敏方任邊事尤不悅巡檢司雲翼卒惡石待舉遂殺之以作亂昱之自魏馳至城下召諸將部分攻城使人請懷敏曰不卽來當以軍法從事旣至又以兵自衛昱之曰諸將方集獨敢以兵隨將欲反邪叱去衛者城開田沅潛殺降兵數百人昱之預知其謀除戶部副使旣而坐前事奪職知號州王則反貝州有言昱之在河北捕得妖人李教不殺使得逸去今乃爲則主謀事乎無其人會冀州人段得政詣闕自言嘗爲叔父屯田郎中曇賊免緣坐且言曇以書屬昱之乃下御史按劾雖不得書猶奪三官監鄂州稅知漢陽軍稍遷刑部郎中復待制知湖州徙揚州以光祿卿致仕卒昱之喜吏事所至有聲退居築家廟率子弟歲時奉祠

魏瓘字用之父羽奏補祕書省校書郎監廣積倉知開封府倉曹參軍持法精
審明吏事上元起綵山闕前張燈與宦者護作宦者挾氣視瓘年少輒誅索侵
擾瓘密以聞詔杖宦者遣之瓘門人魏綱上疏詆天書流海島瓘亦坐是停官
復監鄧州稅鄂州茶以大理寺丞知衡山縣通判壽州歷知循隨安州提點廣
南西路刑獄邕州獠戶緣逋負沒婦女爲傭者一千餘人悉奏還其家就除轉
運使劉鋹時計口以稅雖舟居皆不免至是而雷化欽廉高州猶未除瓘爲除
之減柳州無名役四百人召權度支判官尋以罪降知洪州徙梓州路轉運使
還知蔡州潭州爲京西轉運使江淮制置發運使自主客郎中遷太常少卿知
廣州築州城環五里疏東江門鑿東西澳爲水閘以時啓閉焉拜右諫議大夫
再任臨江軍判官史沆性險詖嘗爲瓘所劾免會廣州封送貢餘椰子煎等餉
京師輒邀留之飛奏指以爲珍貨詔遣內侍發驗無有沆坐不實廢瓘亦降知
鄂州未踰年復爲陝西轉運使徙河北以給事中知開封府政事嚴明吏民憚
之內東門索命婦車得賂遺掖庭物付府驗治獄未上內降釋罪諫官吳奎言

法當執奏而瓘不卽奏行請以廢法論降知越州儂智高寇廣東西獨廣州城堅守不能下於是論築城功遷工部侍郎集賢院學士復知廣州兼廣東經略安撫使給禁卒五千聽以便宜從事屬狄青已破賊召還糾察在京刑獄議者請開六塔河塞商胡北流宰相主其說命瓘按視還奏以爲不可塞下溪州蠻彭士義叛將發兵討除進龍圖閣直學士知荆南瓘以爲五溪之險師行烏道諸將貪功生事於國家何所利因條上三策以招徠爲上守禦爲下攻取爲失不報後卒如瓘議徙澶州滑州又徙鄧州不行請老以吏部侍郎致仕卒瓘所至整辦與人置對未嘗屈史沆王逵以善訟名天下瓘旣廢沆又嘗奏抵逵罪專任機數不稱循吏弟琰

琰字子浩以父恩授祕書省正字爲吏強敏名齊于瓘嘗通判陳州適歲饑百姓相率強取人粟坐死者甚衆琰曰此迫於窮餓豈得已者坐其首鯨之歷知壽潤滁安州壽州盜殺寺童子有司執僧答服琰憫其非罪命脫械縱去一府爭以爲不可後數日得真盜富人犯法當死而死獄中琰曰是嘗欺匿異籍孤

弱者財所以自斃覲不可窮治爾其吏受賕而爲之謀乎後有告者如琰所料累官司農卿知福州徙廣州以疾告得知江寧府晚昏耗縱私人亂法日笞扑無罪吏卒監司劾奏召判刑部仍致仕進衛尉卿卒

滕宗諒字子京河南人與范仲淹同年舉進士其後仲淹稱其才乃以泰州軍事推官召試學士院改大理寺丞知當塗邵武二縣遷殿中丞代還會禁中火詔劾火所從起宗諒與祕書丞劉越皆上疏諫宗諒曰伏見掖庭遺燼延熾宮闈雖沿人事實繫天時詔書亟下引咎滌瑕中外莫不感動然而詔獄未釋鞫訊尙嚴恐違上天垂戒之意累兩宮好生之德且婦人柔弱筆楚之下何求不可萬一懷冤足累和氣祥符中宮掖火先帝嘗索其類寘之法矣若防患以刑而止豈復有今日之虞哉況變警之來近在禁掖誠願修政以禳之思患以防之凡逮繫者特從原免庶災變可銷而福祥來格也疏奏仁宗爲罷詔獄時章獻太后猶臨朝宗諒言國家以火德王天下火失其性由政失其本因請太后還政而越亦上疏太后崩擢嘗言還政者越已卒贈右司諫而除宗諒左正言

劉越者字子長大名人少孤貧有學行亦宗諒同年進士嘗知襄城固始二縣有能名既贈官又官其一子賜其家錢十萬宗諒後遷左司諫坐言宮禁事不實降尚書祠部員外郎知信州與范諷雅相善及諷貶宗諒降監池州酒久之通判江寧府徙知湖州元昊反除刑部員外郎直集賢院知涇州葛懷敏軍敗於定州諸郡震恐宗諒顧城中兵少乃集農民數千戎服乘城又募勇敢諜知寇遠近及其形勢檄報旁郡使爲備會范仲淹自環慶引蕃漢兵來援時天陰晦十餘日人情憂沮宗諒乃大設牛酒迎犒士卒又籍定州戰沒者於佛寺祭酌之厚撫其孥使各得所於是邊民稍安仲淹薦以自代擢天章閣待制徙慶州上言朝廷旣授范仲淹韓琦四路馬步軍都總管經略安撫招討使而諸路亦帶招討稱號非所宜詔罷之御史梁堅劾奏宗諒前在涇州費公錢十六萬貫及遣中使檢視乃始至部日以故事犒賚諸部屬羌又間以饋遺遊士故人宗諒恐連逮者衆因焚其籍以滅姓名仲淹時參知政事力救之止降一官知號州御史中丞王拱辰論奏不已復徙岳州稍遷蘇州卒宗諒尙氣倜儻自任

好施與及卒無餘財所蒞州喜建學而湖州最盛學者傾江淮間有諫疏二十餘篇

李防字智周大名內黃人舉進士爲莫州軍事推官隨曹彬入契丹授忠武軍節度推官括磁相二州逃戶田增租賦十餘萬因請均定田稅又請縣有破逃五十戶者令佐降下考百戶殿三選二百戶停所居官能招攜者旌賞之改祕書省著作佐郎通判潞州遷祕書丞體量二浙民饑建言逃戶田宜卽召人耕種使人不敢輕去畍畝而官賦常在又請京師置折中倉聽人入粟以江浙荆湖物償之擢開封府推官請與判官間三五日卽府司軍巡院察冤獄出爲陝路轉運副使先是沿江水遞歲役民丁甚衆頗廢農作防悉以城卒代之會分川陝爲四路徙防梓州路轉運使累遷尙書工部員外郎爲三司戶部判官景德初江南旱詔與張知白分東西路安撫上言秦羲嘗增江淮兩浙荆湖權酷錢民頗煩擾江南以歲饑權罷而淮南荆湖未被德音詔悉罷之仍詔羲等毋得復增權酷之利遂爲江南轉運淮南舊不禁鹽制置司請禁鹽而官自鬻之

使兵夫輦載江上且多漂失之患防請令商人入錢帛京師或輸芻糧西北邊而給以鹽則公私皆利後采用之徙知應天府鑿府西障口爲斗門洩汴水淤旁田數百畝民甚利之又徙興元府入爲三司鹽鐵判官失舉免官後起通判河南府徙知宿延亳三州爲利州路轉運使累遷兵部郎中糾察刑獄擢右諫議大夫知永興軍進給事中復知延州更耀潞二州卒防好建明利害所至必有論奏朝廷頗施行之其精力過人防在江南晏殊以童子謁見防命賦詩使還薦之後至宰相

趙湘字巨源華州人進士甲科歷彰武永興昭武三軍節度推官遷祕書省著作佐郎知新繁縣以吏最命知商州徙隴州興元府再遷太常博士上補政忠言十篇召判宗正寺賜白金二百兩久之上書言元德李太后母育聖躬請祔太宗廟室後用其說冊趙德明假尙書禮部員外郎爲官告副使擢殿中侍御史權判三司勾院上言漢章帝以月令冬至之後有順陽助生之文而無鞠獄斷刑之政遂定令毋以十一月十二月報囚今季冬誕聖之月而決大辟不廢

願詔有司自仲冬留大辟弗決俟孟春臨軒閱視情可矜惻者貸之他論如法
真宗曰此固善矣然慮繫囚益淹久吏或因緣爲姦爾湘又上書請封禪未幾
命管勾南宮北宅事東封泰山爲東京留守推官禮成遷侍御史昇州火命湘
往致祠兼問民疾苦還言轉運使劉炤弛職不按部知洪州馬景病不任事皆
罷黜之糾察刑獄改尙書刑部員外郎兼侍御史知雜事湘又言舊制文武常
參官日趨朝並赴待漏院俟禁門闢今則辰漏止始放外朝故朝者多後時乃
入望敕正衙門主者察晚至以懲其慢若風雨寒暑託病不朝者罪之時帝親
製五箴以自儆湘因言宗室風化所本宜有以訓厲願特製銘以賜南北邸帝
悅爲製宗室座右銘賜寧王元偓以下并及湘且諭之曰卿宗姓也故賜卿祀
汾陰爲考制度副使請如周官置土訓錄所過州縣山川與俗好惡日上奏御
兼判宗正寺歷三司戶部度支副使祀太清宮管勾留司三司事爲鹽鐵副使
再遷工部郎中直昭文館出知河南府徙河中府爲京西轉運使又徙鳳翔府
延州遷太常少卿知襄州又知應天府進右諫議大夫復知河南爲集賢院學

士以疾徙號州卒

唐肅字叔元杭州錢塘人當錢俶時始七歲能誦五經名聞其國中後與孫何丁謂曹商游學者慕之舉進士調郿縣主簿徙泰州司理參軍有商人寓逆旅而同宿者殺人亡去商人夜聞人聲往視之血沾商人衣爲捕吏所執州趣獄具肅探知其冤持之後數日得殺人者後守雷有終就辟爲觀察推官遷祕書省著作佐郎歷知聞喜福昌縣通判陝州召拜監察御史或薦肅爲羣牧判官真宗曰朕欲別用肅遂提點梓州路刑獄遷殿中侍御史入爲三司戶部判官出知舒州遷侍御史爲福建路轉運使判三司開拆司再遷工部郎中知洪州尋爲江南東路轉運使擢三司度支副使奉使契丹還遷刑部爲龍圖閣待制登聞檢院知審刑院卒子詢

詢字彥猷以父任爲將作監主簿天聖中詔許天下士獻文章應詔者百數有司第其善者詢數人而已詔賜進士及第知長興縣後以太常博士知歸州用翰林學士吳育薦爲御史未至喪母服除育方參政事宰相賈昌朝與詢有親

嫌育數與昌朝言詢用故事當罷御史昌朝欲留詢不得已以知廬州凡官外徙者皆放朝辭而詢獨不用比入見中丞張方平乃奏留詢育爭不能得詢由是怨育而附昌朝昌朝雅不善育詢希其旨上奏曰賢良方正直言極諫茂才異等科漢唐皆不常置若天見災異政有闕失則詔在位薦之不可與進士同時設科若因災異非時舉擢宜如漢故事親策當世要務罷祕閣之試育亦奏言三代以來取士之盛莫如漢唐漢詔舉賢良文學直言極諫之士非有災異而舉唐制科之盛固不專於災異也況災異之出或彌年所無則此舉奚設或頻歲而有則於事太煩令禮部進士數年一舉因以制科隨之則事與時宜又從而更張之使遺材絕望非所以廣賢路也仁宗是育言詔禮部自今制科隨進士貢舉其著爲令時育由制科進帝以爲得人故詢力肆排詆意在育不在制科也育弟婦故駙馬都尉李遵勗妹有六子而寡詢又奏育弟婦久寡不使更嫁欲用此附李氏自進後詢終以故事罷御史除尙書工部員外郎直史館知湖州徙江西轉運使會詔淮南江浙荆湖六路轉運司移文發運使如所屬

詢爭以爲不可乃移福建路還爲三司戶部判官又判磨勘司出爲江東轉運使上言執政純取科名顯者修起居注非故事未幾起居注闕人帝特用詢遂知制誥以參知政事曾公亮親嫌出知蘇州徙杭青二州進翰林侍讀學士累遷右諫議大夫召還勾當三班院判太常寺進給事中卒贈禮部侍郎有集三十卷詢少刻勵自修已而不固所守及知湖州悅官妓取以爲妾好畜硯客至輒出而玩之有硯錄三卷子垆附王安石爲監察御史裏行自有傳

論曰宋承平日久吏多以嚴刻爲治晷之辨冤獄配姦吏瓘奏還婦女爲傭者若干人琰吏事不下於瓘脫械縱囚審知姦弊何其明且決也宗諒劉越以孤生立朝請太后還政越年不逮用聲名與宗諒同矣防請罷權酷與水利湘廉問疾苦按不稱職者肅明於獄訟皆不多見也然晷之以殺降而奪官瓘以能置對而興謗詢傳會喜進竊非其據雖列侍從君子所不與也

張述字紹明遂州小溪人舉進士調咸陽縣主簿改大理寺丞遷太常博士皇祐中仁宗未有嗣述上書曰生民之命繫於宗廟社稷而繼嗣爲之本匹夫有

百金之產猶能定謀託後事出于素況有天下者哉陛下承三聖之業傳之千萬年斯爲孝矣宗廟社稷未有託焉此臣所以夙夜彷徨而爲陛下憂也謂宜慎擇宗親才而賢者異其禮秩試以職務俾內外知聖心有所屬則天下大幸至和元年復上疏曰臣聞明兩作離大人以繼明照四方離爲日君象也二明相繼故能久照東昇西沒晝夜迭運數之常也陛下御天下且三紀矣是日之正中也而未聞以繼照爲慮臣竊疑之歷觀前世或令出宮闈或謀起闍寺或姦臣首議利幼主以專政假後宮以盜權安危之機發於頃刻朝議恬然曾不爲計此臣拳拳爲陛下言也述前後七上疏最後語尤激仁宗終不以爲罪述慷慨喜論事歷通判延州知泗州皆有政跡後以尙書職方員外郎爲江浙荆湖福建廣南路提點坑冶鐵錢事行至萬州道病卒

黃震字伯起建州浦城人進士及第累遷著作佐郎通判遂州嘗給兩川軍士緡錢詔至西川而東川獨不及軍士謀爲變震白主者曰朝廷豈忘東川邪殆詔書稽留爾卽開州帑給錢如西川衆乃定明日詔至累遷尙書都官員外郎

提點湖北路刑獄還判三司磨勘司擢江淮發運使先是李溥自三司小吏爲發運使十餘年姦賊狼藉丁謂黨之無敢言者震將行上書自陳辭頗憤激真宗知其意在溥也諭之曰卿當與人和震對曰廉正公忠臣職也負陛下任使者臣不敢與之和既至發溥姦賊數十事溥坐廢而震亦爲溥訟奪一官罷畏謂權不敢自直及謂貶乃復官知饒州徙廣東轉運使廣南歲進異花數千本至都下枯死者十八九道路苦其煩擾震奏罷之震在真宗朝數論事既卒詔進其官一等

胡順之字孝先原州臨涇人登進士第試祕書省校書郎知休寧縣民有汪姓者豪橫縣不能制歲租賦常不入適以訟逮捕不肯出順之曰令不行何以爲政命積薪環而焚之豪大駭少長趨出叩頭伏辜推其長械送州致之法爲青州從事高麗入貢中貴人挾以爲重使州官旅拜於郊順之曰青大鎮也在唐押新羅渤海柰何卑屈如此獨不拜大姓麻士瑤陰結貴侍匿兵械服用擬尙方親黨僕使甚多州縣被陵蔑莫敢發其姦會士瑤殺兄子溫裕其母訴于州

衆相視曰孰敢往捕者順之持檄徑去盡得其黨有詔鞫問士瑤論死其子弟坐流放者百餘人改著作佐郎知常熟縣遷祕書丞分司南京仁宗卽位遷太常博士天聖明道間再上宰相書乞太后還政宰相匿不以聞太后崩順之附疾置自言求其書出宰相家仁宗嘉其忠特遷尙書屯田員外郎其後數論朝廷事仲淹愛其才然挾術尙權喜縱橫捭闔以目失明廢州里皆憚焉

陳貫字仲通其先相州安陽人後葬其父河陽因家焉少倜儻數上疏言邊事舉進士真宗識貫名擢寘高第爲臨安縣主簿以祕書省著作佐郎爲刑部詳覆官改祕書丞爲審刑院詳議官歷知衛州涇州督察盜賊禁戢不肖子弟簿書筦庫賦租出入皆自檢覈嘗謂僚屬曰視縣官物如己物容有姦乎州人憚其嚴擢利州路轉運使歲饑出職田粟賑饑者又帥富民令計口占粟悉發其餘徙陝西累遷尙書度支員外郎入爲三司鹽鐵判官領河北轉運使請疏徐鮑曹易四水興屯田徙河東歷三司戶部鹽鐵副使以刑部郎中直昭文館知相州還朝卒貫喜言兵咸平中大將楊瓊王榮喪師而歸貫上書曰前日不斬

傳潛張昭允使瓊輩畏死不畏法請自今合戰而奔者主校皆斬大將戰死裨校無傷而還與奔軍同軍劔城圍別部力足救而不至者以逗留論真宗嘉納之又嘗上形勢選將練兵論三篇大略言地有六害今北邊既失古北之險然自威虜城東距海三百里沮澤磽确所謂天設地造非敵所能輕入由威虜西極狼山不百里地廣平利馳突此必爭之地凡爭地之利先居則佚後起則勞宜有以待之昔李漢超守瀛州契丹不敢視關南尺寸地今將帥大抵用恩澤進雖謹重可信卒與敵遇方略何從而出邪故敵勢益張兵折於外者二十年方國家收天下材勇以備禁旅賴廩給賜予而已恬于休息久不識戰可以衛京師不可以戍邊境請募土人隸本軍籍丁民爲府兵使北捍契丹西捍夏人敵之情僞地勢之險易彼皆素知可不戰而屈人之兵矣後以疾卒著兵略世頗稱之子安石

安石字子堅以蔭鎖廳及第嘉祐中爲夔峽轉運判官民蓄蠱毒殺人捕誅其魁并得良藥圖由是遇毒者得不死提點陝西刑獄攝帥鄜延能用謀者敵動

靜輒先聞嘗敕邊民戒嚴旣而數萬騎奄至無所獲而去璽書嘉之歷使京西河東淮南京東知蘇州邠州河中府戶部副使韓絳鎮太原議行鹽法與監司多不合加安石集賢殿修撰爲河東都轉運使議始定謂其僚曰興事當有漸急則擾乃出鹽付民而俾之券使隨所得貿易鬻畢而歸券私販爲減進天章閣待制官軍西征時遣縣令佐督餉安石謂文吏畏怯武人邀功乃但取敢行者申約束以防衆潰曰事不豫警俟其犯而誅之是罔民也王中正帥東師而西報安石持四十日糧而師駐白草平彌月安石深念曰吾頓兵益久而秦甲未至倘不足於食將以乏軍興罪我卽擅發民再餉乃以聞李舜舉劾其專詔置獄於潞安石自麟州會逮俄而他路餽糧多不繼神宗察其無罪赦之尙書省初建召爲戶部侍郎嘗與右曹李定同奏事帝目留之曰卿豈非在淮南曰不肯保李定持服者乎對曰詔問臣臣不敢不以實奏帝曰以實事君朕所與也進吏部侍郎選人將改京官須次久臨當引對率困於刑寺審問或沮以微文則一跌不復安石請罷再問以絕曩弊遂爲後法出知永興軍鄧襄陳鄭州

河陽至龍圖閣直學士紹聖元年卒年八十一

范祥字晉公邠州三水人進士及第自乾州推官稍遷殿中丞通判鎮戎軍元昊圍城急祥帥將士拒退之請築劉璠堡定川砦從之歷知慶汝華三州提舉陝西銀銅坑冶鑄錢祥曉達財利建議變鹽法後人不敢易稍加損益人輒不便語在食貨志提點本路刑獄制置解鹽累遷度支員外郎權轉運副使古渭州距秦州三百里道經啞兒峽邊城數請城之朝廷以餽餉之艱不許祥權領州事驟請修築未報輒自與役蕃部驚擾青唐族羌攻破廣吳嶺堡圍啞兒峽砦官軍戰死者千餘人坐削一官知唐州後復官提舉陝西緣邊青白鹽改制置解鹽使卒嘉祐中包拯言祥通陝西鹽法行之十年歲減權貨務使緡錢數百萬其勞可錄官其子孫景郊社齋郎熙寧中平洮岷疊宕河州數千里置郡縣以古渭爲通遠軍權陝西轉運副使張詵奏朝廷復洮隴故地自將帥至裨佐悉有功賞臣見洮渭父老言皇祐中轉運使祥因熟羌數被寇掠其部族願輸土置城以爲守禦乃卽古渭爲砦祥此舉足以消沮邊隙可謂知攻守之利

矣兵出少挫身黜謀廢臣竊悲之冀推原舊功少賜褻卹使天下知祥死猶被恩且舒祥忠義之氣詔贈祕書錄一子未官者子育

育字巽之舉進士爲涇陽令以養親謁歸從張載學有薦之者召見授崇文校書監察御史裏行神宗喻之曰書稱聖讒說殄行此朕任御史之意也育請用大學誠意正心以治天下國家因薦載等數人西夏入環慶詔育行邊還言寶元康定間王師與夏人三大戰而三北今再舉亦然豈中國之大不足以支夏人數郡乎由不察彼己妄舉而驟用之爾昨荔原之役夏人聲言我自修壘不與漢爭三犯之然後掩殺雖追奔亦不至境由是觀之其情大可見矣又使河東諭韓絳築囉兀二砦始調外郡稍遠邊城前後三十萬夫遼州最爲窮僻然猶上戶配夫四百三十四僦直計三千緡下者十六人其直十萬輦運所經二十二驛宣撫司不先告期轉運使臨時督辦致民皆破產上下莫敢言獨遼守李宏能約民力所勝而餽不失期願以訴其實翻令鞫罪願貸被劾官吏其芻糧在道者隨所至受之使已困之民咸蒙德澤神宗皆從之坐劾李定親喪匿

服罷御史檢正中書戶房固辭乃知韓城縣詔往鄜延議畫地界育言保疆不如持約持約不如敦信前日疆場嘗嚴矣一旦約敗兵拏鬪者跌於前耕者侵於後是封溝不足恃也使人左去而兵革右興金繒朝委而烽煙夕舉是持約不足恃也今我見利而加兵當講好之後復自立界不亦愧乎安南行營郭逵趙禹以兵十萬伐交趾行及長沙病死相屬逵禹又不輯睦育疏其不便不從久之知河中府加直集賢院徙鳳翔以直龍圖閣鎮秦州元祐初召爲太常少卿改光祿卿樞密都承旨劉安世暴其閹門不肅出知熙州時又議棄質孤勝如兩堡育爭之曰熙河以蘭州爲要塞此兩堡者蘭州之蔽也棄之則蘭州危蘭州危則熙河有腰膂之憂矣又請城李諾平汝遮川曰此趙充國屯田古榆塞之地也不報入爲給事中戶部侍郎卒高宗紹興中採其抗論棄地及進築之策贈寶文閣學士

田京字簡之世居滄州其後徙亳州鹿邑舉進士調蜀州司法參軍自秦州觀察推官改祕書省著作佐郎爲大理寺詳斷官趙元昊反侍讀學士李仲容薦

京知兵法召試中書擢通判鎮戎軍夏守贇爲陝西經略使奏兼管勾隨軍糧料入對陳方略賜五品服尋爲經略安撫判官守贇旣罷以武略應運籌決勝科及試祕閣與他科偕試六論京自以記誦非所長引去又參夏竦軍事會遣翰林學士晁宗慤卽軍中問攻守孰便衆欲大舉入討京曰夏人之不道久矣未易破也今欲驅不習之師深入敵境與之角勝負此兵家所忌師出必敗或曰不如講和京曰敵兵未嘗挫安肯降我哉未幾元昊使黃延德叩延州乞降以奇兵出原渭敗大將任福夏竦素不悅京坐是改通判廬州徙知邵武軍提點河北路刑獄事乃上言請擇要官守滄衛鑿西山石白廢道以限戎馬義勇聚教復給糧置卒守烽燧用奇正法訓兵徙戰馬內地以息邊費凡十餘事仁宗頗嘉納之入爲開封府判官坐械囚送獄道死出知蔡州徙相邢二州復提點河北刑獄事王則據恩州反京縋城趣南關入驍健營撫士卒保州振武兵焚民居欲應賊京捕斬之乃定賊遣其黨崔象僞出降京以其持妖言惑衆又斬以徇由是營兵二十六指揮在外者皆懾服不敢叛州之南關民衆多如城

中得不陷賊京有功焉京督士攻城甚力賊係京妻子乘城迫使呼曰毋亟攻城中將屠我輩矣京叱諸軍益進攻注矢仰射殺其家四人賊知京無所顧乃牽妻子去恩州平以不能預察賊降監鄆州稅先是駐泊都監田斌亦以賊發不能捕待罪兵間及城破從諸將入以功遷宮苑副使而京獨被謫御史言失察賊過輕忘家爲國義獨重不宜左遷乃徙通判兗州又徙知江陰軍知密州歷提點淮南刑獄事京西轉運使累遷兵部員外郎直史館知滄州轉運使京能招輯流民爲之給田除稅租凡增戶萬七千特遷工部郎中然傳者謂流民之數多不實又強爲人田非其所樂侵民稅地倣古屯田法其後法不成所給種錢牛價民多不償鞭笞督責至累年不能平公私皆患之擢天章閣待制陝西都轉運使改兵部郎中復知滄州拜右諫議大夫卒京喜論議然語繁而迂頗通兵戰曆算雜家之術爲人尚氣節少時與常山董士廉汾陰郭京相友善俱以僮聞著天人流術通儒子十數書又有奏議十卷

論曰人臣之職當奮不顧身而庸人怯夫於國事則噤喑而不言若胡越肥瘠

之不相干如張述者其亦忠且果矣黃震指李溥忤權臣胡順之擊強宗爲衆人所不敢爲陳貫論兵事范祥畫邊計皆一時雋士妖盜竊發京出孤力保城南置妻孥之憂先登示賊其勇蓋可壯也

宋史卷三百三

宋史卷三百四

元中書右丞相總裁脫脫等修

列傳第六十三

周渭

梁鼎

范正辭

子

諡

劉師道

王濟

方偕

曹穎叔

劉元瑜

楊告

趙及

劉湜

王彬

仲簡

周渭字得臣昭州恭城人幼孤養于諸父力學工為詩劉鋹據五嶺昭州皆其地也政繁賦重民不聊生渭率鄉人六百踰嶺將避地零陵未至賊起斷道絕糧復還恭城則廬舍煨燼遂奔道州為盜所襲渭脫身北上建隆初至京師為薛居正所禮上書言時務召試賜同進士出身解褐白馬主簿縣大吏犯法渭即斬之上奇其才擢右贊善大夫時魏帥符彥卿專恣朝廷選常參官強幹者益其屬邑以渭知永濟縣彥卿郊迎渭揖于馬上就館始與相見略不降屈縣

有盜傷人而逸渭捕獲并暴搜匿者按誅之不以送府乾德中通判興州州領
置口砦多戍兵監軍敖很縱其下爲暴居人苦之渭馳往諭以禍福斬其軍校
衆皆懾服詔書嘉獎命兼本砦鈐轄開寶元年鳳州七房冶主吏盜隱官銀擇
渭往代周歲羨課數倍賜緋魚又遷知棣州殿直傅延翰爲監軍謀作亂走契
丹爲部下所告渭擒之以聞命械至闕下鞫得實斬於西市渭在郡以簡肅稱
及還吏民遮道泣留俄詔賜錢百萬太平興國二年爲廣南諸州轉運副使初
渭之入中原妻子留恭城開寶三年平廣南詔昭州訪求賜錢米存卹之及是
渭始還故里鄉人以爲榮渭奏去劉鋹時稅筭之繁者重定田賦興學校遷殿
中丞屬有事交趾主將逗撓無功有二敗卒擐甲先至邕州中奪民錢渭捕斬
之後至者悉令解甲以入訖無敢犯移書交趾諭朝廷威信將刻日再舉黎桓
懼卽遣使入貢就加監察御史在嶺南凡六年徙知揚州進殿中侍御史改兩
浙東西路轉運使入爲鹽鐵判官遷侍御史歷判戶部度支二勾院出知亳州
賜金紫俄授宋州加職方員外郎爲益州轉運使坐從子違詔市馬黜爲彰信

軍節度副使咸平二年真宗聞其清節召還將復用詔下而卒年七十七上閱其貧不克葬賻錢十萬以其子建中爲乘氏主簿渭妻莫荃賢婦人也渭北走時不暇與荃訣二子孩幼荃尙少父母欲嫁之荃泣誓曰渭非久困者今違難遠適必能自奮於是親蠶績確舂以給朝夕二子皆畢婚娶凡二十六年復見渭時人異之朱昂著莫節婦傳紀其事

梁鼎字凝正益州華陽人祖鉞仕蜀爲劍門關使父文獻乘氏令鼎太平興國八年進士甲科解褐大理評事知秭歸縣再遷著作佐郎端拱初獻聖德徽號頌萬餘言試文遷殿中丞通判歙州以能聲聞有詔嘉獎徙知吉州民有蕭甲者豪猾爲民患鼎暴其凶狀杖脊黥面徙遠郡太宗尤賞其強幹代還賜緋魚舊例當給銀寶瓶帶太宗特以犀帶賜之記其名於御屏淳化中上言曰書云三載考績三考黜陟幽明此乃堯舜氏所以得賢人治天下也三代而下典章尙存兩漢以還沿革可見至於唐室此道尤精有考功之司明考課之令下自簿尉上至宰臣皆歲計功過較定優劣故人思激厲績効著聞五代兵革相繼

禮法陵夷顧惟考課之文祇拘州縣之輩黜陟既異名存實亡且夫今之知州卽古之刺史治狀顯著者朝廷不知方略蔑聞者任用如故大失勸懲之理寢成苟且之風是致水旱荐臻獄訟填溢欲望天下承平豈可得也伏惟陛下繼二聖之丕圖爲億兆之司牧念百官之未乂思四海之未康特詔有司申明考績之法庶幾官得其人民受其賜矣俄爲開封府判官遷太常博士三司右計判官又爲總計判官會復三部換度支判官至道初鼎洎陳堯叟建議與三白渠及陳許鄧潁蔡宿亳數州用水利墾田事具食貨志遷都官員外郎江南轉運副使就改起居舍人徙陝西二年五將分道擊李繼遷李繼隆擅出赤檉路無功還奏軍儲失期鼎坐削三任復爲殿中丞領職如故以母老求郡歷知徐密二州真宗踐位復舊官咸平四年遷兵部員外郎知制誥賜金紫時三司督逋負嚴急有久被留繫者命鼎與薛映按籍詳定多所蠲免踰月拜右諫議大夫度支使時西鄙未寧建議陝西禁解池鹽所在官鬻詔從之以鼎爲制置使楊覃爲轉運使張賀副之又以內殿崇班杜承睿同制置鹽事議者多言邊民

舊食青鹽其價甚賤洎禁青鹽以困賊令商買入粟運解鹽於緣邊價直與蕃鹽不相遠故蕃部齎鹽至者不能貨鬻今若禁解池鹽與內地同價則民必冒禁復市青鹽乃資盜糧也時劉綜爲陝西轉運使鼎奏罷之綜歸朝亦密陳其非便鼎旣行卽移文禁止鹽商所在約束乖當延州劉廷偉慶州鄭惟吉皆不從規畫又鼎奏運咸陽倉粟以實邊粟已陳腐鼎卽與民俟秋收易新粟朝廷聞而止之上封章密陳其煩擾者甚衆鼎始謀多沮遂令林特乘傳與永興張詠會鼎等同議可否於是依舊通鹽商鼎坐首議改作非是詔罷度支使守本官未幾丁內艱起復景德初知三班院通進銀臺司兼門下封駁事出知鳳翔府以居憂哭泣傷目表求判西京留司御史臺三年卒年五十二賜二子出身鼎偉姿貌磊落尙氣有介節居官峻厲名稱甚茂好學工篆籀八分嘗著隱書三卷史論二十篇學古詩五十篇子申甫吉甫

范正辭字直道齊州人父勞謙獲嘉令正辭治春秋公羊穀梁登第調補安陽主簿開寶中判入等遷國子監丞知戎州改著作佐郎代還治逋欠於淄州轉

運使稱其能轉左贊善大夫就知淄州太宗征河東諸州部糧多不及期正辭所部長山縣吏張秀督民輸受錢二千卽杖殺之郡中畏服太平興國中改殿中丞通判棣深二州遷國子博士御史中丞劉保勳奏充臺直會有言饒州多滯訟選正辭知州事至則宿繫皆決遣之胥吏坐淹獄停職者六十三人會詔令料州兵送京師有王興者懷土憚行以刃故傷其足正辭斬之興妻詣登聞上訴太宗召見正辭廷辨其事正辭曰東南諸郡饒實繁感人心易動與敢扇搖苟失控馭則臣無待罪之地矣上壯其敢斷特遷膳部員外郎充江南轉運副使賜錢五十萬饒州民甘紹者積財鉅萬爲羣盜所掠州捕繫十四人獄具當死正辭按部至引問之囚皆泣下察其非實命徙他所訊鞫旣而民有告羣盜所在者正辭潛召監軍王愿掩捕之愿未至盜遁去正辭卽單騎出郭二十里追及之賊控弦持鎗來逼正辭大呼以鞭擊之中賊雙目執之賊自刃不殊餘賊渡江散走追之不獲旁得所棄賊賊尙有餘息正辭卽載歸令醫傅藥創旣愈按其姦狀伏法而前十四人皆得釋端拱二年代歸與洛苑副使綦仁擇

西京作坊副使尹宗諤同監折中倉先是令商人輸米豆而以茶鹽酬其直謂之折中復有言其弊罷之至是復置焉遷倉部員外郎同知幕府州縣官考課改判刑部歷戶部鹽鐵二判官遷考功員外郎通判定揚杭三州真宗卽位遷膳部郎中召判三司勾院俄復爲鹽鐵判官咸平二年出爲河東轉運使三年以本官兼侍御史知雜事時李昌齡自忠武行軍起知梓州董儼知壽州王德裔楊緘皆任轉運使後失官宰畿邑正辭上言昌齡輩貪墨著聞願陛下罷其民政詔追還儼敕餘悉代之又言治民之官牧宰爲急舉吳奮等五人堪任大郡復請令奮等各舉知縣縣令從之坐鞫任懿獄貶滁州團練副使會赦復爲倉部考功員外郎通判鄆州知淮陽軍復膳部郎中以年老求監兗州商稅大中祥符三年四月卒年七十五子識諷並進士及第

諷字補之以蔭補將作監主簿獻東封賦遷太常寺奉禮郎又獻所爲文召試入等出知平陰縣會河決王陵埽水去而土肥失阡陌田訟不能決諷分別疆畔著爲券民持去不復爭諷辨數激昂喜爲名聲然亦操持在己吏不敢欺爲

縣存視貧弱至豪猾大家峻法治之舉進士第遷大理評事通判淄州歲旱蝗他穀皆不立民以蝗不食菽猶可藝而患無種諷行縣至鄒平發官廩貸民縣令爭不可諷曰有責令無預也卽出貨三萬斛比秋民皆先期而輸徙知梁山軍以母老不行得通判鄆州時知州李迪貶衡州副使宰相丁謂戒使者持詔書促上道諷輒留迪數日爲治裝祖行詔塞決河州募民入芻犍而城邑與農戶等諷曰貧富不同而輕重相若農民必大困且詔書使度民力今則均取之此有司誤也卽改符使富人輸三之二因請下諸州以鄆爲率朝廷從其言徙知廣濟軍民避水堤居凡給徭於官者諷悉縱使護其家奏除其租賦累遷太常博士以疾監舒州靈仙觀尙御藥張懷德至觀齋祠諷頗要結之懷德薦于章獻太后遂召還問所欲言對曰今權臣驕悍將不可制蓋指曹利用也利用貶拜右司諫三司度支判官百官轉對敕近臣閱視其可行者類次以聞諷奏曰非上親覽決可否則誰肯爲陛下極言者玉清昭應宮災下有司治火所起諷曰此天之戒告乃復置獄以窮治之非所以應天也獄由是得解議者疑復

修諷上書諫山木已盡人力已竭宮必不成臣知朝廷亦不爲此其如疑天下何宜詔示四方使明知之於是下詔罷修改尙書禮部員外郎兼侍御史知雜事錢惟演自許州來朝圖相位諷奏惟演嘗爲樞密使以皇太后姻屬罷之示天下以不私固不可復用遂以惟演守河南使契丹道過幽州北見原野平曠慨然曰此爲戰地不亦信哉遼人相目不敢對擢天章閣待制知審刑院出知青州再遷戶部郎中時山東饑宰相王曾青人家積粟多諷發取數千斛濟饑民因請遣使安撫京東入爲右諫議大夫權御史中丞又請益漕江淮米百萬自河陽河陰東下以賑貸之錢惟演倡議獻懿二太后宜祔真宗廟室諷彈奏之及言其在太后時權寵甚盛且與后族連姻請絀去仁宗不聽諷袖告身以對曰陛下不聽臣言臣今奉使山陵而惟演守河南臣早暮憂刺客願納此不敢復爲御史中丞矣帝不得已可之諷乃趨出遂貶惟演隨州陳堯佐罷參知政事有王文吉者告堯佐謀反仁宗遣中官訊問復以屬諷夜中被旨究詰旦得其誣狀奏之時上章懿皇后諡宰相張士遜樞密使楊崇勳日中不赴慰班

諷彈士遜與崇勳俱罷諷嘗侍對帝語及郭后亡子諷言亡子大義當廢陰合
帝旨以龍圖閣直學士權三司使時狄棐爲直學士已久諷盛氣凌棐宰相李
迪右之遂特詔班棐上論者非之尋轉閣學士以疾免三司使改翰林侍讀學
士管勾祥源觀徙會靈觀復改閣學士給事中知兗州既至郡而龐籍爲廣南
東路轉運使未行上言嚮爲侍御史嘗奏彈諷以三司使曲爲左藏監庫吳守
則奏課遷官尙美人同父弟娶守則女諷以銀鞍勒遺守則相結納既出兗州
乃給言貧假翰林白金器數千兩自隨而增產於齊州市官田虧平估置獄于
南京劾之諷坐方聽旨擅馳驛還兗州當贖籍所奏有不實當免官宰相呂夷
簡嫉諷詭激特貶諷武昌軍節度行軍司馬貸籍止降官知臨江軍由是宰相
李迪等坐親善諷皆斥歲中徙保信軍聽居舒州持母喪又許歸齊州日飲酒
自縱爲時所譏服除改將作少監知淮陽軍遷光祿卿知陝州道改潞州入見
帝言元昊不可擊獨以兵守要害捍侵掠久當自服倘內修百度躬節儉如祖
宗故事則疆事不足憂復給事中卒諷嘗建議朝廷當差擇能臣留以代大臣

之不稱職者大臣聞而惡之又數短參知政事王隨于帝前因奏外人謂臣逐隨將取其位願先出臣爲陛下引姦邪去而朝廷清矣又嘗與張士遜議事不合諷曰世謂大事未易可議小事不足爲所爲終何事邪及爲龐籍訟人謂大臣陰諷籍焉諷類曠達然裨闔圖進不守名檢所與游者輒慕其所爲時號東州逸黨山東人顏太初作逸黨詩刺之而姜潛者又嘗貽書以疏其過云子寬之終尙書刑部郎中知濠州

劉師道字損之一字宗聖開封東明人父澤右補闕師道雍熙二年舉進士初命和州防禦推官歷保寧鎮海二鎮從事凡十年王化基呂祐之樂史薦于朝擢著作佐郎纔一月會考課又遷殿中丞出知彭州就加監察御史轉運使劉錫馬襄上其治跡召歸會浦洛之敗奉詔劾白守榮輩獄成太宗獎其勤面賜緋魚川陝豪民多旁戶以小民役屬者爲佃客使之如奴隸家或數十戶凡租調庸斂悉佃客承之時有言李順之亂皆旁戶鳩集請釋旁戶爲三者長迭主之疇歲勞則授以官詔師道使兩川議其事師道以爲迭使主領則爭忿滋多

署以名級又重增擾害廷奏非便卒罷之改祠部員外郎出爲京東轉運使真宗嗣位進秩度支咸平初范正辭薦其材堪長民徙知潤州三年改淮南轉運副使兼淮南江浙荆湖發運使四年以漕事入奏特遷司封俄爲正使改工部郎中代查道爲三司度支副使七月擢樞密直學士掌三班俄擢三司使從幸澶淵判隨駕三司充都轉運使師道第幾道舉進士禮部奏名將廷試近制悉糊名較等陳堯咨當爲考官教幾道於卷中密爲識號幾道既擢第事泄詔落其籍永不預舉師道固求辨理詔曹利用邊肅閻承翰詣御史府推治之坐論奏誣罔責爲忠武軍行軍司馬堯咨免所居官爲鄆州團練副使一年以郊祀恩起爲工部郎中知復州換秀州大中祥符二年以兵部郎中知潭州遷太常少卿師道敏於吏事所至有聲吏民畏愛長沙當湖嶺都會剖煩析滯案無留事歲滿復加樞密直學士換左司郎中留一任七年李應機代還應機未至郡六月師道暴病卒年五十四錄幾道爲試祕書省校書郎師道性慷慨尙氣善談世務與人交敦篤工爲詩多與楊億輩酬唱當時稱之

王濟字巨川其先真定人祖卿有詞辨趙王鎔召置幕府鎔政衰卿懼禍避地深州饒陽遂爲縣人父恕後唐時童子及第開寶中知秀州會盜起城陷爲盜所殺將并害濟濟伏柩號慟謂賊曰吾父已死吾安用生爲但恨力不能殺汝以報父讎爾賊義之捨去濟攜父骨匿山谷間旣而官軍大集濟脫身謁其帥朱乙陳討賊之計乙嘉之遺以束帛奏假驛置遣歸先是濟母終於岳陽權窆佛舍至是乃併護二喪還饒陽州將以聞太祖召見以其尙少且俾就學雍熙中上書自陳死事之孤得試學士院補龍溪主簿時調福建輸鶴翎爲箭羽鶴非常有物有司督責急一羽至直數百錢民甚苦之濟諭民取鵝翎代輸仍驛奏其事因詔旁郡悉如濟所陳縣有陂塘數百頃爲鄉豪幹其利會歲旱濟悉導之分溉民田汀州以銀冶構訟十年不決逮繫數百人轉運使使濟鞠之纔七日情得止坐數人再調胙城尉徙臨河主簿轉運使王嗣宗被詔舉法官以濟名聞遷光祿寺丞權大理丞改刑部詳覆官通判鎮州牧守多勳舊武臣倨貴陵下濟未嘗撓屈戍卒頗恣暴不法夜或焚民舍爲盜一夕報有火濟部壯

士數十潛往偵伺果得數輩并所盜物卽斬之馳奏其事太宗大悅都校孫進使酒無賴毆折人齒濟不俟奏杖脊送闕下繇是軍城畏肅就遷太子中舍詔書獎勞召判登聞鼓院拜監察御史上疏陳統天下之術節民物之道大者有十擇左右別賢愚正名器去冗食加奉祿謹政教選良將分兵戍修民事開仕進其言切於時詞多不載咸平初濟以刑網尙繁建議請刪定制敕乃命張齊賢領其事濟預焉刑統舊條持仗行劫不以賊有無悉抵死齊賢議貸不得財者濟曰刑期於無刑以死懼之尙不畏況緩其死乎因與齊賢廷爭數四濟詞氣甚厲目齊賢爲腐儒然卒從齊賢議人以濟爲刻改鹽鐵判官車駕巡師大名調丁夫十五萬修黃汴河濟以爲勞民詔濟馳往經度還奏省十六七齊賢時爲相以河決爲憂因對并召濟見齊賢請令濟署狀保河不決濟曰河決亦陰陽災沴宰相苟能和陰陽弭災沴爲國家致太平河之不決臣亦可保齊賢曰若是則今非太平邪濟曰北有契丹西有繼遷兩河關右歲被侵擾以陛下神武英略苟用得其人可以馴致今則未也上動容獨留濟問邊事濟曰陛下

承二聖之基擁百萬之衆蠢茲醜虜敢爾憑陵蓋謀謨當國之人未有如昔之比臣謂國家所恃獨一洪河耳此誠急賢之秋不然臣懼敵人將飲馬於河渚矣又著備邊策十五條以獻三年選官判大理寺上曰法寺宜擇當官不回者苟非其人或有冤濫卽感傷和氣王濟近數言事似有操持可試之遂令濟權判大理寺事福津尉劉瑩集僧舍屠狗羣飲杖一伶官致死濟論以大辟遇赦從流時王欽若知審刑與濟素不相得又以濟嘗忤齊賢乃奏瑩當以德音原釋齊賢王欽若議濟坐故入停官逾年復爲監察御史通判河南府景德初徙知河中府契丹南侵上幸澶淵詔緣河斷橋梁毀船舫稽緩者論以軍法濟曰陝西有關防隔閼舳艫遠屬軍儲數萬一旦沉之可惜又動搖民心因密奏寢其事上深嘉歎遣使褒諭未幾召拜工部員外郎兼侍御史知雜事三年判司農寺時周伯星見濟乘間言曰昔唐太宗以豐年爲上瑞臣願陛下日慎一日居安慮危則天下幸甚受詔與劉綜改定茶法頗易舊制由是忤丁謂林特劉承規輩因與欽若迭詆訾之四年拜本曹郎中出知杭州上面加慰諭仍戒以

朝廷闕失許密上言遷刑部郎中郡城西有錢塘湖溉田千餘頃歲久湮塞濟命工濬治增置斗門以備潰溢之患仍以白居易舊記刻石湖側民頗利之睦州有狂僧突入州廨出妖言與轉運使陳堯佐按其實斬之上嘉其能斷大中祥符三年徙知洪州兼江南西路安撫使屬歲旱民饑躬督官吏爲糜粥日親嘗而給之錄饑民爲州兵全活甚衆是歲卒年五十九遺奏大旨以進賢退諛佞罷土木不急之費爲言濟頗涉經史好讀左氏春秋性剛直無所畏避少時深州刺史念金鎖一見器之且託後於濟金鎖沒濟撫其孤援實祿仕素與內臣裴愈有隙愈坐事上怒甚命憲府鞠之濟適知雜事力爲辦理遂獲輕典子孝傑國子博士

論曰渭有清節臨事多從便文鼎好規畫師道喜論世務正辭按貪吏辨冤獄濟議論挺特無所畏避五臣者任不過監司郡守而名稱甚茂可尙哉

方偕字齊古興化莆田人年二十及進士第爲温州軍事推官歲饑民欲隸軍就廩食州不敢擅募偕乃詣提點刑獄呂夷簡曰民迫流亡不早募之將聚而

爲盜矣夷簡從之籍爲軍者七千人後遷汀州判官權知建安縣縣產茶每歲先社日調民數千鼓譟山旁以達陽氣偕以爲害農奏罷之遷祕書省著作佐郎歷知福清資陽縣累遷尙書屯田員外郎爲御史臺推直官澧州逃卒傭民家自給一日誣告民事摩駝神歲殺十二人以祭州逮其族三百人繫獄久不決偕被詔就劾令卒疏所殺主名按驗皆亡狀事遂辨卒以誣告論死知雜事龐籍薦爲御史裏行再遷侍御史南京鴻慶宮災偕引漢罷原廟故事請勿復脩元昊寇塞門廊延副總管趙振逗撓不出掾詔偕往按之法當斬偕奏兵寡不敵苟出以餌賊無益也振由是得不死爲開封府判官江南安撫三司歲出乳香綿綺下州郡配民偕奏罷之更鹽鐵判官遷兵部員外郎兼御史知雜事言以罪謫監當者監司勿得差權親民官判大理寺改度支副使擢天章閣待制江淮制置發運使知杭州遷刑部郎中偕以吏事進治杭州有能聲喜飲酒至酣宴無節數月暴中風以太常少卿分司西京遷光祿卿卒

曹穎叔字秀之亳州譙人初名熙嘗夢之官府見穎叔名遂更名穎叔進士及

第歷威勝軍判官渭州軍事推官御史中丞蔡齊薦爲臺主簿改大理寺丞韓億知亳州辟僉書節度判官事通判儀州韓琦文彥博薦其才徙夔州路轉運判官夔峽尙淫祠人有疾不事醫而專事神穎叔悉禁絕之乃教以醫藥提點陝西路刑獄夏人納款詔與戶部副使夏安期轉運使柳灝減戍卒吏員之冗者爲開封府判官時御史宋禧鞠衛士獄于內侍省禧不能辨及獄具內侍使禧自爲牒穎叔言禧爲制使辱命請寘之法元昊死爲夏國祭奠使除直史館知鳳翔府徙益州路轉運使權度支副使儂智高寇嶺南朝議以閩中久弛兵備擢天章閣待制知福州累遷右司郎中爲陝西都轉運使自慶曆鑄大鐵錢行陝西民盜鑄不已三司上權鐵之議穎叔曰鐵錢輕而貨重不可久行況官自權鐵乎請罷鑄諸郡鐵錢以三鐵錢當銅錢之一從之兩川和買絹給陝西兵而蜀人苦於煩斂穎叔爲歲出本路緡錢五十萬以易軍衣之餘者兩川之民始無擾焉進龍圖閣直學士知永興軍然年老漸昏耄事頗壅積人或嘲諑之卒于官

劉元瑜字君玉河南人進士及第補舞陽縣主簿改祕書省著作佐郎知雍邱縣通判隰并二州知郢州以太常博士爲監察御史上言考課之法自朝廷至員外郎郎中少卿須清望官五人保任始得遷故浮薄輩日趨權門非所以養廉恥也詔罷之提舉河北便糴會永寧雲翼軍士謀爲變吏窮捕黨與謀劫囚以反百姓竊知多逃避元瑜馳至斬爲首者其餘皆釋去不問歷京西河東轉運使遷右司諫劾奏集賢校理陸經謫官在河南日杖死爭田寡婦且貸民鏹監司列薦其才投託權要遂復館職請重實於法并坐保薦者詔屬吏遂竄經袁州又疏李用和曹琮李昭亮不可典軍梁適不當除翰林學士范仲淹以非罪貶旣復天章閣待制宜在左右尹洙余靖歐陽脩皆以朋黨斥逐此小人惡直醜正者也旣而與靖等相失反言前除夏竦爲樞密使諫臣數人撫其舊過召至都門而罷之自此以進退大臣爲己任激訐陰私爲忠直薦延輕薄列之館閣以唱和爲朋比近除兩府出自聖斷獨黨人以進用不出於己議論紛然臣恐復被疏罷矣前日孫甫薦葉清臣毀丁度效此也因論靖知制誥不宜兼

領諫職且奉使契丹對契丹主傲六國語辱國命請加罪脩靖深惡之繇是論者以元瑜爲奸邪後除三司鹽鐵副使以天章閣待制知潭州徭人數爲寇元瑜使州人楊謂入梅山說酋長四百餘人出聽命因厚犒之籍以爲民凡千二百戶徙桂州固辭降鄧州坐在潭州擅補畫工易元吉爲畫助教降知隨州又失保任改信州徙襄州富人子張銳少孤弱同里車氏規取其財乃取銳父棄妾他姓子養之比長使自訴陰賊吏爲助州斷使歸張氏銳莫敢辨既同居逾年車卽導令求析居元瑜察知窮治得奸狀鯨車竄之人伏其明歷河中府以左諫議大夫知青州卒元瑜性貪至竊販禁物親與小人爭權時論鄙之楊告字道之其先漢州綿竹人父允恭西京左藏庫使數任事有功旣死賜告同學究出身調廬江尉時張景答吏死而吏捕急逃歸告懼告不見納告曰君勿憂也吾死生以之景卒免改豐城主簿邑有賊殺人投屍于江人知主名而畏不敢言告聞親往擒賊有言賊欲報怨者告不爲動旣而果乘夜欲刺告告又捕得致於法境內肅然再調南劍州判官知南安六合錢塘寧國縣改大理

寺丞通判江寧州盜殺商人鑿舟沉屍江中有被誣告者答服獄具告疑其無狀後數日果得真盜徙知池州累遷尙書司封員外郎開封府推官開拆司爲趙元昊旌節官告使元昊專席自尊大告徙坐卽賓位莫之屈也除京西轉運副使屬部歲饑所至發公廩又募富室出粟賑之民伐桑易粟不能售告命高其估以給酒官民獲濟者甚衆以疾權管勾西京留臺頃之判三司憑由理欠司爲淮南轉運使徙制置發運使除三司戶部副使更度支安撫河東改鹽鐵副使歷祠部度支司封郎中以少府監復爲制置發運使拜右諫議大夫知鄭州徙江寧府壽州告曉法令頗知財利而不務苛刻時號能吏然喜事權貴以要進一子力學有文數爲近臣薦召試賜同進士出身未幾卒告悲傷之尋卒趙及字希之其先幽州良鄉人父的事契丹爲蔚州靈邱令雍熙中王師北征乃歸授偃師令因家焉及舉進士爲慈州軍事推官徙廣信軍判官改祕書省著作佐郎知魏縣徙九隴以母老監葉縣稅歷黃河御河催綱通判青州大名府累遷尙書屯田員外郎被舉爲殿中侍御史權宗正丞詔劾夏守恩獄內侍

岑守中用賄撓法及劾正其罪遷侍御史夏守贇經略西鄙還及言其無功不可復樞府又疏罷郭承祐團練使未幾請知懷州徙徐州還為三司戶部判官遷兵部員外郎京東轉運按察使知萊州張周物貪暴及劾奏貶周物嶺外擢兼侍御史知雜事數論時政權判吏部流內銓初銓吏匿員闕與選人為市及奏闕至即榜之吏部榜闕自及始遷戶部副使以疾改刑部郎中直昭文館知衛州召為鹽鐵副使又以疾請知汝州歲除復召為副使不赴徙知河中府特拜天章閣待制右司郎中祀明堂遷右諫議大夫還判大理寺流內銓出知徐州疾甚求解近職還州事乃以本官管勾南京留司御史臺未赴卒及和厚謙退內行尤篤所治有聲民吏愛之

劉湜字子正徐州彭城人舉進士為澶州觀察推官再調湖南節度推官改祕書省著作佐郎知益都縣徙陰平再遷太常博士通判劍州審闈州獄活死囚七人王堯臣安撫陝西薦之擢知耀州富平有盜掠人子女者既就擒陽死伺間逸去捕得復陽死守者以報湜趣焚其屍拜監察御史王德用自隨州詔還

近臣言其有反相湜保右之歷開封府推官三司鹽鐵判官遷殿中侍御史上言轉運使倚撫郡縣苛束官吏人不得騁其材宜稍寬假不爲改者繩治之詔詣渭州劾尹洙私用公使錢頗傳致重法以故洙坐廢還爲尙書禮部員外郎兼侍御史知雜事同判吏部流內銓除鹽鐵副使議者謂湜探宰相意深致洙罪故得優擢焉明年宴紫宸殿副使當坐殿東廡湜不卽坐趣出閣門奏之坐謫知沂州徙兗州又坐沂州誤出囚死罪降知海州起爲河東轉運使遷戶部員外郎復爲鹽鐵副使兼領河渠事汴水絕鑿河陰新渠通漕運如故會江南饑擢天章閣待制知江寧府奏運蘇州米五十萬斛以貸饑民除戶部郎中知廣州儂智高初平湜練士兵葺械器作鐵鎖斷江路有盜據山敕貸罪招之不肯降湜知並山民資之食卽徙民絕餉盜困蹙乞降民安之居二年母老求內徙遂徙徐州湜喜曰昔布衣隨計今以待從官三品復典鄉郡過始望矣又以左司郎中知鄆州遷龍圖閣直學士知慶州湜少賤母更嫁營卒旣登第具袍笏趨卒舍迎母里人觀歎然嗜酒持法少恕改知密州以病卒

王彬光州固始人祖彥英父仁侃從其族人潮入閩潮有閩土彥英頗用事潮惡其逼陰欲圖之彥英覺之挈家浮海奔新羅新羅長愛其材用之父子相繼執國政彬年十八以賓貢入太學淳化三年進士及第歷雍邱尉皇城司陰遣人下畿縣刺史多厲民令佐至與爲賓主彬至捕鞠之得所受賂致之法自是詔親事官毋得出都城易右班殿直辭不受後以祕書省著作佐郎通判筠州歷知撫州撫州民李甲饒英恃財武斷鄉曲縣莫能制甲從子詈縣令人告甲語斥乘輿彬按治之索其家得所藏兵械又得服器有龍鳳飾甲坐大逆棄市并按英嘗強取人孥配嶺南州里肅然擢提點荆湖南路刑獄徙知潭州入判三司戶部勾院出爲京西轉運使徙河北部吏馬崇正倚章獻太后姻家豪橫不法彬發其姦賊下吏忤太后意徙京東又徙河東陝西復爲三司鹽鐵判官判都理欠憑由司累遷太常少卿卒

仲簡字畏之揚州江都人以貧傭書楊億門下億教以詩賦遂舉進士歷通判鄭州河南府推官改祕書省著作佐郎知蕪湖縣通判楚州累遷尙書都官員

外郎改侍御史安撫京東遷知真州入爲三司度支判官經制陝西糧草就遷兵部員外郎直史館知陝州徙江東轉運使除侍御史知雜事爲三司鹽鐵副使工部郎中奉使陝西多任喜怒以馬箠擊軍士流血仁宗面詰之不能對出爲河東轉運使逾年復爲鹽鐵副使再遷兵部擢天章閣待制知廣州儂智高犯邕州沿江而下人告急簡輒囚之仍榜于道敢妄言惑衆者斬以是人不復爲避賊計比智高至始令民入城民爭道競以金帛遺闔者相蹂踐至死者甚多其不得入者皆附賊賊既去以其能守城徙知荆南旣而言者論之遂落職又降刑部郎中知筠州復爲兵部郎中徙洪州卒

論曰士抱一藝者思奮勵以功名自效況其設施見於政事者乎方偕曹穎叔楊告趙及王彬之流皆文吏能推恩行利剗煩去蠹其治不下古人劉元瑜劉涖輩亦不減此數人然而元瑜譏詆余靖涇文致尹洙公議所不與也仲簡小才所謂斗筲之器也何足道哉

宋史卷三百五

元中書右丞相總裁脫脫等修

列傳第六十四

楊億

第偉

從子絃

晁

迥

子宗懋

劉筠

薛映

楊億字大年建州浦城人祖文逸南唐玉山令億將生文逸夢一道士自稱懷玉山人來謁未幾億生有毛被體長尺餘經月乃落能言母以小經口授隨卽成誦七歲能屬文對客談論有老成風雍熙初年十一太宗聞其名詔江南轉運使張去華就試詞藝送闕下連三日得對試詩賦五篇下筆立成太宗深加賞異命內侍都知王仁睿送至中書又賦詩一章宰相驚其俊異削章爲賀翌日下制曰汝方髫鬣不由師訓精爽神助文字生知越景絕塵一日千里予有望于汝也卽授祕書省正字特賜袍笏俄丁外艱服除會從祖徽之知許州億往依焉務學晝夜不息徽之間與語歎曰興吾門者在汝矣淳化中詣闕獻文改太常寺奉禮郎仍令讀書祕閣獻二京賦命試翰林賜進士第遷光祿寺丞

屬後苑賞花曲宴太宗召命賦詩于坐側又上金明池頌太宗誦其警句于宰相明年三月苑中曲宴億復以詩獻太宗訝有司不時召宰相言舊制未貼職者不預卽以億直集賢院表求歸鄉里賜錢十五萬至道初太宗親製九絃琴五絃阮文士奏頌者衆獨稱億爲優賜緋魚二年春遷著作佐郎帝知其貧屢有霑賚嘗命爲越王生辰使時公卿表疏多假文於億名稱益著真宗在京府徽之爲首僚卽中書疏悉億草定卽位初超拜左正言詔錢若水脩太宗實錄奏億參預凡八十卷而億獨草五十六卷書成乞外補就養知處州真宗稱其才長於史學留不遣固請乃許之任郡人周啓明篤學有文深加禮待召還拜左司諫知制誥賜金紫咸平中西鄙未寧詔近臣議靈州棄守之事億上疏曰臣嘗讀史見漢武北築朔方之郡平津侯諫以爲罷弊中國以奉無用之地願罷之上使辨士朱買臣等發十策以難平津平津不能對臣以爲平津爲賢相非不能折買臣之舌蓋所以將順人君之意爾舊稱朔方地在要荒之外聲教不及元朔中大將軍衛青奮兵掠地列置郡縣今靈州蓋朔方之故墟僻介西

鄙數百里間無有水草烽火亭障不相望當其道路不壅鑿饋無虞猶足以張大國之威聲爲中原之扞蔽自邊境屢驚兇黨猖熾爵賞之而不恭討罰之而無獲自曹光實白守榮馬紹忠及王榮之敗資糧屣履所失至多將士丁夫相枕而死以致募商人輸帛入穀償價數倍孤壤築城邊民繹騷國帑匱乏不能制邊人之命及濟靈武之急數年之間兇黨逾盛靈武危堞巋然僅存河外五城繼聞陷沒但堅壁清野坐食糗糧閉壘枕戈苟度朝夕未嘗出一兵馳一騎敢與之角此靈武之存無益明矣平津所言罷弊中國以奉無用之地正今日謂也臣以爲存有大害棄有大利國家輓粟之勞士卒流離之苦悉皆免焉堯舜禹聖之盛者也地不過數千里而明德格天四門穆穆武丁成王商周之明主也然地東不過江黃西不過氐羌南不過蠻荆北不過太原而頌聲並作號爲至治及秦漢窮兵拓土肝腦塗地校其功德豈可同年而語哉昔西漢賈捐之建議棄朱崖當時公卿亦有異論元帝力排衆說奮乎獨見下詔廢之人頌其德故其詔曰議者以棄朱崖羞威不行夫通於時變卽憂萬民之饑餓危孰

大焉且宗廟之祭凶年不備況乎避不嫌之辱哉臣以爲類於靈武也必以失地爲言卽燕薊八州河湟五郡所失多矣何必此爲臣竊惟太祖命姚內斌領慶州董遵誨領環州統兵裁五六千悉付以閩外之事士卒効命疆場晏然朝廷無旰食之憂疆場無羽書之警臣乞選將臨邊賜給廩賦資以策略許便宜而行倘寇擾內屬撓之以勁兵示之以大信懷荒振遠諭以賞格彼則奔潰衆叛安能與大邦爲敵哉若欲謀成廟堂功在漏刻臣以爲彼衆方黠積財猶豐未可以歲月破也直須棄靈州保環慶然後以計困之爾如臣之策得驍將數人提銳兵一二萬給數縣賦以資所用令分守邊城則寇可就擒而朝廷得以無虞矣景德初以家貧乞典郡江左詔令知通進銀臺司兼門下封駁事時以吏部銓主事前宜黃簿王太冲爲大理評事億以丞吏之賤不宜任清秩卽封詔還未幾太冲補外俄判史館會脩冊府元龜億與王欽若同總其事其次次體制皆億所定羣寮分撰篇序詔經億竄定方用之二年召爲翰林學士又同脩國史凡變例多出億手大中祥符初加兵部員外郎戶部郎中五年以疾在

告遣中使致太醫視之億拜章謝上作詩批紙尾有副予前席待名賢之句以久疾求解近職優詔不許但權免朝直億剛介寡合在書局唯與李繼路振刁衍陳鉞劉筠輩厚善當時文士咸賴其題品或被貶議者退多怨謗王欽若驟貴億素薄其人欽若銜之屢挾其失陳彭年方以文史售進忌億名出其右相與毀訾上素重億皆不惑其說億有別墅在陽翟億母往視之因得疾請歸省不待報而行上親緘藥劑加金帛以賜億素體羸至是以病聞請解官有疾憲官劾億不俟命而去授太常少卿分司西京許就所居養療嘗作君可思賦以抒忠憤冊府元龜成進秩祕書監七年病愈起知汝州會加上玉皇聖號表求陪預卽代還以爲參詳儀制副使知禮儀院判祕閣太常寺天禧二年冬拜工部侍郎明年權同知貢舉坐考較差謬降授祕書監丁內艱屬行郊禮以億典司禮樂未卒哭起復工部侍郎令視事四年復爲翰林學士受詔注釋御集又兼史館脩撰判館事權景靈宮副使十二月卒年五十七錄其子紘爲太常寺奉禮郎億天性穎悟自幼及終不離翰墨文格雄健才思敏捷略不凝滯對客

談笑揮翰不輟精密有規裁善細字起草一幅數千言不加點竄當時學者翕然宗之而博覽強記尤長典章制度時多取正喜誨誘後進以成名者甚衆人有片辭可紀必爲諷誦手集當世之述作爲筆苑時文錄數千篇重交游性耿介尙名節多周給親友故廩祿亦隨而盡留心釋典禪觀之學所著括蒼武夷潁陰韓城退居汝陽蓬山冠鰲等集內外制刀筆共一百九十四卷弟偉景德中舉進士得第三等及第以億故升爲第二等億無子以從子紘爲後弟偉偉字子奇幼學于億天禧元年獻頌召試學士院賜進士及第以試祕書省校書郎知衢州龍游縣再補蘄州錄事參軍國子監薦爲直講駙馬都尉李遵勳守澶州辟僉書鎮寧軍節度判官事遷大理寺丞知河間縣再遷太常博士用近臣薦爲集賢校理通判單州會巡檢部卒李素合州卒二百餘人謀殺巡檢使入鼓角門州將不敢出偉挺身往問曰若屬何爲而反俱曰將有訴于州非反也偉曰持兵來非反而何若屬皆有父母妻子以一朝忿而欲魚肉之乎悉令投兵坐籍首惡得十餘人斬之徙知祥符縣提點開封府界諸縣鎮公事權

開封府判官又判三司開拆司累遷尙書兵部員外郎同僚起居注偉清慎無治劇才常秉小笏以朝知制誥缺中書以偉名進仁宗曰此非秉小笏者邪遂命知制誥權諫院嘗曰諫臣宜陳列大事細故何足論然當時譏其亡補遷刑部郎中爲翰林學士祀明堂遷右司郎中判太常寺爲羣牧使兼侍讀學士進中書舍人卒贈尙書禮部侍郎

紘字望之以蔭歷官知鄞縣鄞濱海惡少販魚鹽者羣居洲島或掠商人財物入海吏不能禁紘至設方略使識者質惡少船及歸始給還且戒諭之由是不敢爲盜以億文獻賜進士出身通判越州知筠州提點江東刑獄除轉運按察使江東饑紘開義倉賑之吏持不可紘曰義倉爲民也稍稽人將殍矣紘御下急常曰不法之人不可貸去之止不利一家爾豈可使郡邑千萬家俱受害邪聞者望風解去或過期不敢之官與王鼎王綽號江東三虎坐降知衡州徙越州爲荆南轉運使徙福建不赴知湖州復爲江東轉運使官至太常少卿卒紘性嚴雖家居兒女不敢妄言笑聚書數萬卷手抄事實名窺豹篇

晁迥字明遠世爲澶州清豐人自其父侁始徙家彭門迥舉進士爲大理評事歷知岳州錄事參軍改將作監丞稍遷殿中丞坐失入囚死罪奪二官復將作丞監徐婺二州稅遷太常丞真宗卽位用宰相呂端參知政事李沆薦擢右正言直史館獻咸平新書五十篇又獻理樞一篇召試除右司諫知制誥判尙書刑部帝北征雍王元份留守京師加右諫議大夫爲判官進翰林學士未幾知審官院爲明德章穆二園陵禮儀使同修國史知大中祥符元年貢舉封泰山祀汾陰司太常詳定儀注累遷尙書工部侍郎使契丹還奏北庭記加史館修撰知通進銀臺司獻玉清昭應宮頌其子宗操繼上景靈宮慶成歌帝曰迥父子同獻歌頌搢紳間美事也史成擢刑部侍郎進承旨時朝廷方脩禮文之事詔令多出迥手嘗夜召對帝令內侍持燭送歸院方盛暑爲蠲宿直令三五日一至院迥辭以非故事乃聽俟秋還直遷兵部侍郎請分司西京特拜工部尙書集賢院學士判西京留司御史臺賜一子官河南以就養仁宗卽位遷禮部尙書居臺六年累請老以太子少保致仕給全俸歲時賜賚如學士天聖中迥

年八十一召宴太清樓免舞蹈子宗慤爲知制誥侍從同預宴迥坐御史中丞之南與宰相同賜御飛白大字旣罷所以寵賚者甚厚進太子少傅後復召對延和殿帝訪以洪範兩暘之應對曰比年變災荐臻此天所以警陛下願陛下修飭王事以當天心庶幾轉亂而爲祥也旣而獻斧戾慎刑箴大順審刑無盡燈頌凡五篇及感疾絕人事屏醫藥具冠服而卒年八十四罷朝一日贈太子太保謚文元迥善吐納養生之術通釋老書以經傳傳致爲一家之說性樂易寬簡服道履正雖貴勢無所屈歷官臨事未嘗挾情害物真宗數稱其好學長者楊億嘗謂迥所作書命無過褒得代言之體喜質正經史疑義標括字類有以術命語迥迥曰自然之分天命也樂天不憂知命也推理安常委命也何必逆計未然乎所著翰林集三十卷道院集十五卷法藏碎金錄十卷耆智餘書隨因紀述昭德新編各三卷子宗慤

宗慤字世良以父蔭爲祕書省校書郎屢獻歌頌召試賜進士及第又除館閣校勘三遷大理寺丞集賢校理兼注釋御集檢閱官迥領西臺宗慤求便養通

判許州仁宗卽位遷殿中丞同修起居注天聖中百官轉對宗慤請減上供墾
閑田擇獄官令監司舉縣令累遷尙書祠部員外郎知制誥宋綬嘗謂自唐以
來唯楊於陵身見其子嗣復繼掌書命今始有晁氏焉父憂奪喪管勾會靈觀
入翰林爲學士母亡又起復兼龍圖閣學士權發遣開封府事辨雪疑獄有能
名元昊反關中久宿師以宗慤安撫陝西與夏竦議攻守策未還道拜右諫議
大夫參知政事會朝廷以金飾胡床及金抹器賜喃廝囉宗慤曰仲叔子奚辭
邑請繁纓孔子曰不如多與之邑繁纓諸侯之馬飾猶不可與陪臣況以乘輿
之器賜外臣乎必欲優其禮不若加賜金帛後從帝郊祠感疾數求罷除資政
殿學士給事中數日卒贈工部尙書諡文莊宗慤性敦厚事父母孝篤於故舊
凡任子恩皆先其族人在翰林一夕草將相五制褒揚訓戒人得所宜嘗密詔
訪邊策陳七事頗施用之

劉筠字子儀大名入舉進士爲館陶縣尉還會詔知制誥楊億試選人校太清
樓書擢筠第一以大理評事爲祕閣校理真宗北巡命知大名府觀察判官事

自邊鄙罷兵國家閒暇帝垂意篇籍始集諸儒考論文章爲一代之典筠預脩圖經及冊府元龜推爲精敏真宗將祀汾睢屢得嘉獎召筠及監察御史陳從易崇和殿賦歌詩帝數稱善車駕西巡又命筠纂土訓是時四方獻符瑞天子方興禮文之事筠數上賦頌及冊府元龜成進左正言直史館脩起居注嘗屬病予告滿輒再予積二百日每詔續其奉遷左司諫知制誥加史館脩撰出知鄧州徙陳州還糾察在京刑獄知貢舉遷尙書兵部員外郎復請鄧州未行進翰林學士初筠嘗草丁謂與李迪罷相制旣而謂復留令別草制筠不奉詔乃更召晏殊筠自院出遇殊樞密院南門殊側面而過不敢揖蓋內有所愧也帝久疾謂浸擅權筠曰姦人用事安可一日居此請補外以右諫議大夫知廬州仁宗卽位遷給事中復召爲翰林學士踰月拜御史中丞先是三院御史言事皆先白中丞筠榜臺中御史自言事毋白丞雜知天聖二年貢舉數以疾告進尙書禮部侍郎樞密直學士知潁州召還復知貢舉進翰林學士承旨兼龍圖閣直學士同修國史判尙書都省祀南郊爲禮儀使請宿齋太廟日罷朝饗玉

清昭應宮俟禮成備鑾駕恭謝從之筠素愛廬江遂築室城中構閣藏前後所賜書帝飛白書曰真宗聖文祕奉之閣再知廬州營塚墓作棺自爲銘刻之既病徙于書閣卒筠景德以來居文翰之選其文辭善對偶尤工爲詩初爲楊億所識拔後遂與齊名時號楊劉凡三入禁林又三典貢部以策論升降天下士自筠始性不苟合遇事明達而其治尙簡嚴然晚爲陽翟同姓富人奏求恩澤清議少之著冊府應言榮遇禁林肥川中司汝陰三入玉堂凡七集一子蚤卒田廬沒官包拯少時頗爲筠所知及拯顯奏其族子爲後又請還所沒田廬云薛映字景陽唐中書令元超八世孫後家于蜀父允中事孟氏爲給事中歸朝爲尙書都官郎中映進士及第授大理評事歷通判綿宋昇州累遷太常丞王化基薦爲監察御史知開封縣太宗召對爲江南轉運使改左正言直昭文館爲江淮兩浙茶鹽制置副使改京東轉運使徙河東兼河西隨軍求便親知相州再領漕京東積遷尙書禮部郎中擢知制誥權判吏部流內銓兼制置羣牧使司梁顥安撫河北還權判度支映以右諫議大夫知杭州映臨決蠶銳庭無

留事轉運使姚鉉移屬州當直司毋得輒斷徒以上罪映卽奏徒流笞杖自有科條苟情狀明白何必繫獄以累和氣請詔天下凡徒流罪於長吏前對辨無所異聽遣決之朝廷施用其言與鉉既不協遂發鉉納部內女口及鬻銅器抑取其直又廣市綾羅不輸稅真宗遣御史臺推勘官儲映劾鉉得實貶連州文學映坐常召人取告鉉狀當贖金帝特賞之在杭五年入知通進銀臺司兼門下封駁事封泰山爲東京留守判官遷給事中勾當三班院出知河南府祀汾陰還駐蹕西京以映有治狀賜御書嘉獎遷工部尙書侍郎集賢院學士判尙書都省進樞密直學士知昇州建言州以牛賦民出租牛死租不得蠲帝覽章矍然曰此朝廷豈知邪因令諸州條奏悉蠲之頃之糾察在京刑獄再判都省歷尙書左丞知揚州徙并州又徙永興軍拜工部尙書兼御史中丞仁宗卽位遷禮部再爲集賢院學士判院事知曹州分司南京卒贈右僕射諡文恭映好學有文該覽強記善筆扎章奏尺牘下筆立成爲治嚴明吏不能欺每五鼓冠帶黎明據案決事雖寒暑無一日異也子耀卿祕閣校理孫紳直龍圖閣

